

BHIHITA METAA NEBUHINO

LUKAS

Kaatono Wamba

Buhino kitabi aini dokonae Lukas. Anoa ini seemie foagono (o dotoro) suano Yahudi, nopobhai'ao Paulus defolele Bhihita Metaa (Kol 4:14; 2Tim 4:11; Flm 24). Tula-tulano Yesus nofo'onue mai'ao ne mie mande'aane, nofotinda-tindae, maka suli nobuhie ne kitabino Bhihita Metaa ini (1:1-4).

Weo kitabi aini Lukas notalesaane putae Yesus, Omputo Fosalamatino nedhandi'aono Lahata'ala, suano kaowu so miendo Yahudi tamaka so kosasawindo umati manusia (2:10; 2:30-32; 3:6; 24:47). Yesus nohato ne dhunia ini neowa Bhihita Metaa ne mie mokae bhe mie kumadee-dee (6:20; 7:22; 14:11-13; 21:1-4), nofotiwoha rahamati bhe kataano lalono Lahata'ala ne mie kodhosa (5:30; 7:37-50; 15:1-2). Notiwoha dua kabhalano ka'ondofaono Yesus ne hobhine'i (7:11-17; 8:2-3; 10:38-42) bhe kaana-ana'i (8:41-42, 54-55; 9:38-42; 9:46-48; 18:15-17).

Weo kitabi aini nobhahi tula-tula pata nebuhi weo kitabi Bhihita Metaa sigao'ano, peda adhono tula-tulano kalente'ano Yohanes Fokadiuno (psl 1), tula-tulano dhaga'ino dhumba we Betlehem (2:8-20), tula-tulano Yesus we Lambuno Lahata'ala wakutuu umuhuno ompulu haa ta'u (2:41-52), kapalendano mieno Samaria metaano lalo (10:25-42) bhe kapalendano ana mo'ane miinae'ano (15:11-32).

Patudhuno kitabi aini

1:1-4

1 Teofilus nefosibhalaku! Dobhahimo mie mebuhino bhihitano sabhaha kadhadhia ne olotantoomu. ²Nebuhindo na'a nopokantibha bhe bhihita netahimantoomu ne mie moha'aono wuntano matano kadhadhia ana'a mpini kabhao-bhaono bhe molelenomo dua bhihita ana'a. ³Dadi'anomo pada afotinda-tindae sabhaha kadhadhia amaiane mpini pakatandano, saoku netaa dua abuhiangkoe weo kitabi amangkafi tulu-tulungano, ⁴neanomo mande'aane kantoo- no sabhaha kafoguhu netahimamu.

Bhihita so kalente'ano Yohanes Fokadiuno
1:5-25

⁵Ne dhamanino Herodes nembali kolaki we kadieno Yudea, nandoo seemie imamu konea'ano Zakaria nomai'ao ne kase'isendo imamu Abia.^a Neano hobhineno Elisabet, sampu'ano dua imamu Harun. ⁶Kohoduando sanea mie lumebe ne pomatano Lahata'ala, dodadi doangkafi kosasawi'ae pahinta bhe tubhono Ompu, miina dakonilempagia. ⁷Ampamo kaowu miina dakoanaa mba'inomo Elisabet no'afa, pakade kohoduando dokamungkulamo.

⁸Sewakutuu nohatomo pali'ano kase'isendo, Zakaria nodhalangi takano nembali imamu ne wiseno Ompu we Lambuno Lahata'ala. ⁹Kaneando imamu dopodaduane mbali dofotantu'ao la'ae so nekantibhano taka. Gaha'a Zakaria nekantibhano taka namesua weo Lambuno Lahata'ala naetunu dupa weo boloku mongkilo. ¹⁰Tangasano notunu dupa na'a kosasawindo umati dohompu we simbali dosambahea we kadete. ¹¹Gaha'a seemie mala'ekatino Ompu tanosifotiwoha'amo wutono ne Zakaria. Mala'ekati ana'a neeche-ehe ne suanano medha kaetunu'a dupa. ¹²Nowoha peda maitu Zakaria nokohedu bhe note'i. ¹³Tamaka mala'ekati ana'a nopugaumo ambano, “Koe mote'ia Zakaria, kapa'amo sambaheamu notitahimamo. Hobhinemu Elisabet naefolenteangko seemie ana'i mo'ane maka tabeano kumonae Yohanes. ¹⁴Hintu mo'ia bhe naowula lalomu, pakade daobhahi dua mie sigao'ano so mo'iano mba'inomo kalente'ano ana'i ana'a. ¹⁵Ana'i ana'a naembali kabhala ne pomatano Ompu, paise naoho'u angguru tawa kafoho'u kaololanu'a sigao'ano. Rohino Lahata'ala nakumabhintie mpini weo haebu. ¹⁶Naobhahi miendo Israel namodolida dasumuli ne Ompu Lahata'alando. ¹⁷Anoa nama'induluki Ompu, rohino bhe kuasano napototo bhe anabii Elia. Namodoli lalondo kamungkula ne ana'indo bhe namodoli totono lalondo mie pata meangkano ne fekihi-ndo mie banara. Nadamo na'a naefontaa-ntaa umati mantasi'ano so tumahimano Ompu.”^b

¹⁸Ambano Zakaria ne mala'ekati ana'a, “Nada amai amande'aane bhahaa putae tetewei nakumadhadhia? Kapa'amo idi ini akamungkulamo, hobhineku noko'umuhumo dua.” ¹⁹Notobhoosimo

^a 1:5 1Taw 24:10

^b 1:17 Mal 4:5-6

mala'ekati ana'a ambano, “Idimo ini Gabriel, palima-limano Lahata'ala, notudu kanau apotula-tulaangko, amohatoangko bhihita metaa ini. ²⁰Pugauku ini nahumato tempono tetewei nako'ula. Tamaka hampano miina marasaea kanau, kotu-kotu'u mobhea, pae sepali'a mooli pugaua ampa oleono bhahi-bhahi'ae na'a nakumadhadhia.”

²¹Gaha'a mie bhahi we kadete tadontaa-ntaamo Zakaria. Andoa domente, noafa nompona sepali'a neate-ate weo Lambuno Lahata'ala. ²²Hato nolimba gaha'a Zakaria miinamo namandea nopugaua, tanoale-aleandamo kaowu limano, mba'inomo nobheamo. Dadi'anomo mie bhahi dopande'aomo lalondo putae Zakaria nokopowoha weo Lambuno Lahata'ala.

²³Nokapo kaowu tempono takano, Zakaria nosulimo se lambuno. ²⁴Miina naomponaa Elisabet, hobhineno Zakaria nofowoowa-mo. Lima wula kaomponano miina namotiwoha wutono ne komie'ano, maka nopugau ambano, ²⁵“Pedamo aini habuno Ompu ne idi ini, aitu nonini'a kanaumo, nofosali kaambanoku ne pomatando mie.”

Kafohato so kalente'ano Yesus 1:26-38

²⁶Nokapo nomo wula Elisabet nofowoowa, Lahata'ala notudu-mo toha mala'ekati Gabriel nakumala we Galilea ne se'onu kota konea'ano Nasaret. ²⁷Ne itu nakumala ne seemie kalambe konea'ano Maria. Kalambe aini nopopohae bhe Yusuf sampu'ano omputo Daud. ²⁸Sapesuano weo lambuno Maria, mala'eakati nofeabhamo ambano, “Megau ae itua, hintu tibarakatino, Ompu nopobhaiangko.”

²⁹Maria nokohedu nofetingke peda na'a, sampe nofeena totono lalono, bhahaa o ae ma'anano kafeabha ana'a. ³⁰Ambano dua mala'ekati ana'a, “Koise mote'ia Maria, kapa'amo hintu me'awamo rahamatino Lahata'ala. ³¹Hintu fowoowa maka koana'ao seemie mo'ane bhe tabeano kumonae Yesus. ³²Ana'i ana'a naembali kabhala bhe dakumonae Anano Lahata'ala Foliuno Kuasa. Ompu Lahata'ala nasumangkee so omputo nameda omputo Daud awuano. ³³Anoa naembali omputo so mowano sampu'ano Yakub ampa suhue dhamani, kafopahinta'ano pae bhe kawoloa.”

³⁴Ambano Maria ne mala'ekati ana'a, “Nada amai nakumadhadhia bhahaa, ingka idi ini miina'o akomo'anea?” ³⁵Notobhoosimo mala'ekati, “Rohino Lahata'ala nasumampu ne hintu bhe kuasano

Lahata'ala foliuno kalangke nakumaputiko, dadi'anomo ana'i so lumentano na'a dakumonae Mie mongkilo, Anano Lahata'ala. ³⁶Amohatoko bhahitiemu Elisabet tangasano dua nofowoowa, mahinggamo nokamungkulamo, ampa aini nomo wulamo. Mie nekonando no'afa na'a nakoana'ao seemie mo'ane. ³⁷Kapa'amo so Lahata'ala miina bhe pata nepoolino." ³⁸Ambano Maria, "Ingka idi ini bhatuano Ompu, hunsa'anomo nakumadhadhia ne idi peda pugaumu na'a." Pada aitu mala'ekati na'a nohunsamo Maria.

Maria nokala nodongawi Elisabet

1:39-45

³⁹Miina naompona palusi ana'a Maria nokalamo te tombuno kabhawo ne se'onu liwu we kadieno Yudea. ⁴⁰Nohato ne itu nopesuamo ne lambuno Zakaria maka nofeabha ne Elisabet. ⁴¹Nofetingke kafeabhano Maria, ana'i newoowano Elisabet nebhapunda weo haebu maka Elisabet nokabhintie Rohino Lahata'ala. ⁴²Elisabet lasao nopugau nofekahaa-haa'i ambano, "Hintu tibarakatino foliuda sabhaha hobhine, notibarakati mpuu bhakeno wuto-mu so lumenteno itu. ⁴³La'ae bhahaa idi ini sampe inano Ompuku nodongawi kanau? ⁴⁴Kapa'amo sa'afetingke kafeabhamu, ana'i newoowaku ini nebhapunda'ao ka'ia. ⁴⁵Kodawua mpuu hintu, kapa'amo parasaea putae kafohato nefetingkemu ne Ompu tetewei nakumadhadhia."

Lagu katumpuno lalono Maria

1:46-56

⁴⁶Pada aitu nopugaumo Maria ambano,

“Apudhi afekakalabhia Ompu,

⁴⁷no'ia totono laloku hampano Lahata'ala Mosalamati
kanau,

⁴⁸kapa'amo nonini'a kanau,

idi bhatuano mepandano kaengkoha'a ini.

Sakotu'uno notandamo aini mieno sabhaha dhamani
dakumona kanau akodawua,

⁴⁹mba'inomo Kokuasano nofokonandoo kanau habu
kumalabhia.

Nongkilo mpuu neano.

⁵⁰Nopomantulu-ntulu nofotiwoha kabhelano lalono
ne mie mote'ino ne Anoa.

⁵¹ Ka'osano kabhalano kuasano
sampe limano negasa mie melangkeno diu,
bhe nohungga patudhundo.

⁵² Kabhala kokuasano nofosampuda mai'ao te
kaengkoha'ando,
tamaka mie mepandano kaengkoha'a nofononida.

⁵³ Mie mo'aho nofekawe'ianda sabhaha metaa'ano,
tamaka mie hangkaea notududa dakumala haa
mbali limando.

⁵⁴ Anoa notulumi Israel bhatuano,
noangkafi podhandino bhe awua'intoomu.

⁵⁵ Ompu miina naolimpu'ao podhandino;
nofotiwoha kabhelano lalo ne Abraham bhe
sampu'ano ampa suhue dhamani."

⁵⁶ Napetolu wula kaomponano Maria neate bhe Elisabet maka
nosuli we lambuno.

Kalente'ano Yohanes Fokadiuno

1:57-66

⁵⁷ Nokapo kaowu wulano, Elisabet nokoana'aomo seemie mo'ane.

⁵⁸ Santieneno bhe bhahitie'ino dofetingke putae Ompu nofotiwohamo kabhelano lalono ne Elisabet, dadi'anomo andoa dosimo'i-mo'ia'amo bhe anoa.

⁵⁹ Nokapo alu oleo andoa ini dosimai-mai'amo dasumuna ana'i ana'a, maka patudhundo dakumonae Zakaria dapototoane bhe neano amano. ⁶⁰ Tamaka ambano inano, "Koise, tabeano dakumonae Yohanes." ⁶¹ Ambado dua, "Ingka miina bhe bhahitiemiua konea'ano peda na'a." ⁶² Pada aitu dofetapamo ne amano depake tanda bhaha'i dakumonae la'ae ana'i amaitu. ⁶³ Zakaria nesalomo kontu kaebuhi'a maka nobuhie peda ini, "Neano Yohanes." Kosasawindo tadomente. ⁶⁴ Gaha'a Zakaria tamba'omo notobhoka nopugau, kapoka'uluno lelano notilensemo, lasao nopudhi Lahata'ala.

⁶⁵ Mie po'owati'ando dote'i sepali'a, sampe sabhaha kadhadhia ana'a nembalimo lansano wiwindo mie meateno te tombuno kabhawono Yudea. ⁶⁶ Kosasawindo mie metingkeno dokofekihi we lalondo, "Naembali ae bhahaa ana'i aini?" Kapa'amo nopobhaiane kuasano Ompu.

Lagu katumpuno lalono Zakaria

1:67-80

- ⁶⁷Zakaria amano ana'i ana'a nokabhintie Rohino Lahata'ala
maka nokosuahamo peda seemie anabii ambano,
⁶⁸“Fosibhala kaitaomu Ompu Lahata'alando miendo
Israel,
kapa'amo Anoa nodongawi umati natumulumida,
nomai notolosida.
- ⁶⁹Anoa nefoehe seemie fosalamatino kokuasano,
nomai'ao ne sampu'ano omputo Daud
palima-limano.
- ⁷⁰Aini nopobutu bhe bhoasaono endefi'ini,
nefosampendo ana-anabii mongkilono.
- ⁷¹Ambado Lahata'ala nafofosalamati mai'ao ne
kaewantoomu,
nafofolapa ne kuasando kosasawindo mie
fobansino.
- ⁷²Pedamo ana'a namotiwoha kabhelano lalono ne
awua'intoomu
bhe namekako'ula podhandino mongkilono.
- ⁷³Dhandino na'a nobhoasa'aane bhe notunda ne
Abraham awuantoomu
- ⁷⁴putae dalumapaomu mai'ao ne kuasano kaewa
bhe paemo dakate'i-te'ia dasumombai Anoa,
- ⁷⁵sadhia daongkilo bhe dadumadi metaa ne wiseno
suhue dadinto.
- ⁷⁶Hintu anaku dakumonako seemie anabiino Lahata'ala
Kokuasano,
kapa'amo hintu ma'induluki Ompu mebhongkaane
kaangka'a,
- ⁷⁷somo mohatono umatino putae Lahata'ala
namosalamatida,
hampano dhosando na'umamponie.
- ⁷⁸Kosasawi'ae ini hampano kanini kaasi bhe kabhelano
lalono Lahata'alantoomu,
Anoa nofodongawi nafotulumi,
tapedamo tilangano oleo bheteno te melangke'ano

⁷⁹na'umulawi mie dumadino weo kahohondo bhe mewisekino mate.

Anoamo so tumonda kaita ne kaangka'a humope'ano ne katohopono dadi.”

⁸⁰Ana'i ana'a dhulu kabhala dhulu kamatangka rohino. Anoa neate we pandaso bhalano ampa ne oleono namotiwoha wutono ne miendo Israel.

Kalente'ano Yesus

2:1-7

Mat 1:18-25

2 Wakutuu ana'a Omputo Kaisar Agustus nofondawu pahintano nofotudu dabuhi neando kosasawindo mie weo kafo-pahinta'ano Roma so dhiwa'a. ²Aini'aemo dhiwa'a kabhao-bhaono tangasano Kirenus nembali gubernur we kadieno Siria. ³Dadi'ano-mo kosasawindo mie dokalamo we kotando seemie-seemie defebuhi neando.

⁴Pedamo dua ana'a, Yusuf nomai'ao we Nasaret we kadieno Galilea nokala we kadieno Yudea, we Betlehem, kota kalente'ano omputo Daud, kapa'amo anoa lee walaka bhe sampu'ano Daud. ⁵Patudhuno dadhumiwada bhe Maria pohaeno. Ne na'a Maria nandoo nofowoowa. ⁶Gaha'a dohato we Betlehem, Maria nokapomo wulano nakokaana-ana. ⁷Nokoana'aomo seemie mo'ane, titiisano, nowawe'ianemo kabhini maka nofondolee weo kampo-maa'ando kadadi, kapa'amo miinamo datoolea'a ne lambu kabutu'a.

Dhaga'ino dhumba

2:8-20

⁸Alo ana'a nandoo dhaga'ino dhumba dodhagani kadadindo we pada ne owano liwu ana'a. ⁹Tamba'omo seemie mala'ekatino Ompu nee-he-ehe ne owando maka tilangano kakalabhiano Ompu tano-hehamo nokaputida sampe dote'i sepali'a. ¹⁰Nopugaumo mala'ekati ana'a ambano, “Koise mote'iomua, kapa'amo amohatoangkoomu bhihita metaa, so kaowula'ano lalondo kosasawindo mie. ¹¹Sealo itu we kotano Daud nolentemo so hintimiu Omputo Fosalamatino, Ompu Kristus. ¹²Nada ini katandaino, hintimiu me'awaomu seemie ana'i kane'o lumenteno dowawe'iane kabhini nendole-ndole weo kampo-maa'ando kadadi.”

¹³Tamba'omo notiwoha dua setagua bhalano mala'ekati sigao'ano dolibu-libu mala'ekati sa'ituini. Andoa dopudhi Lahata'ala ambado,

¹⁴“Nokalabhia mpuu Lahata'ala te wawono wawo, katohopo mpuu we dhunia, so manusia posahasi'ano lalo bhe Lahata'ala.”

¹⁵Dokundo kaowu mala'ekati na'a dosuli te surugaa, dhaga'ino dhumba amaitu dopugaumo sapada-pada andoa ambado, “Dokalaanaomu we Betlehem do'ondo'ao'omu kumadhadhia'ano ne watu peda nefohato'aono Ompu sa'ituini.” ¹⁶Pada aitu tado-poagohimo dokala maka do'awamo Maria bhe Yusuf bhe ana'i kahobu ana'a nendole-ndole weo kampomaa'ano kadadi. ¹⁷Dowohae peda maitu, dhaga'ino dhumba na'a detula-tula'aomo nefohato'aono mala'ekati nopulao'ao ana'i aitu. ¹⁸Kosasawindo mie tadomente dofetingke tula-tulando dhaga'ino dhumba ana'a. ¹⁹Tamaka Maria tanofekataa bhahi-bhahi'ae weo totono lalono bhe nofeki-fekihie kansuhu.

²⁰Dhaga'ino dhumba ana'a dosulimo we pada dopudhi dofekalabhia Lahata'ala, hampano kosasawi'ae nefetingkendo bhe newohando nopobutu sepali'a bhe nefohato'aono mala'ekati.

Yesus doowae ne wiseno Ompu we Lambuno Lahata'ala
2:21-40

²¹Nokapo alu oleo, ana'i ana'a dosunaemo, neano dokonea Yesus. Neamo aini nefohato'aono mala'ekati wakutuuno miina'o nawoowae inano.

²²Pada aitu nohatomo tempono Yusuf bhe Maria dofekangkilo wutondo, se'ise tutuha weo tubhono agama Yahudi tibuhino ne Kitabino Musa. Dadi'anomo dowowo'o Yesus we Yerusalem damowae ne wiseno Ompu. ²³Aini doangkafi tibuhino weo pahintano Ompu, “Kotika ana'i mo'ane titiisa tabeano damowae ne Lahata'ala mbali fehebuah'ano mongkilono.”^a ²⁴Andoa deowa dua so kapopanga peda nefotantu weo pahintano Ompu, sepasa burukou bhaha'i haa ulu anano dhaadhaha.^b

²⁵We Yerusalem nandoo seemie konea'ano Simeon. Anoa ini mie banara lumebeno, nontaa-ntaa kasalamati'ando miendo Israel. Rohino Lahata'ala nopobhaiane, ²⁶bhe padamo dua nofohatoe, pae'o namatea ane pae'o namoha Omputo Fosalamatino nedhandi'aono Ompu. ²⁷Kamungkula aini noatoe Rohino Lahata'ala se Lambuno Lahata'ala. Wakutuu ana'a nopobutu dua ana'i konea'ano Yesus

^a 2:23 Kel 13:2,12

^b 2:24 Im 12:6-8

dowowo'oe kamungkulano dopesua weo Lambuno Lahata'ala. Patudhundo damolapasiane tutuha peda tibuhino weo Kitabino Musa.
²⁸Simeon lasao noala ana'i aitu maka no'awie bhe nopudhi Lahata'ala ambano,

²⁹“Ompu, aitu hunsa'anomo bhatuamu ini nahumunsa dhunia ini peda dhandimu; notohopomo laloku.

³⁰Kapa'amo padamo awoha'ao wuntano matakuru Fosalamatino katudumu.

³¹Anoamo ini nefontaa-ntaamu so sabhaha bansano liwu,

³²Anoamo ini tapedamo tilanga umulawino sabhaha bansano liwu, somo dua meowano kakalabhia ne umatimu Israel.”

³³Inano bhe amano tadomente dofetingke sabhaha pugauno mulao'ano anando na'a. ³⁴Pada ana'a Simeon nobarakatidamo bhe nopugau ne Maria inano ana'i ana'a ambano, “Kotu-kotu'u ana'i aini nofotantuemo Lahata'ala so miendo Israel bhahino, siga'a namobinasada, siga'a namosalamatida. Anoa somo katandai mai'ao ne Lahata'ala, somo dapotaga-tagali'ao mie bhahi. ³⁵Nadamo ana'a natipande'aomo totono lalondo sabhaha mie. Gaha'a totono lalomu naopea kao-kaomo dakumansu'uane kampue.”

³⁶Ne itu nandoo dua seemie anabii hobhine neano Hana. Neano amano Fanuel nomai'ao ne sampu'ano Asyer. Anoa nokamungkulamo sepali'a; pada nogaa tamaka fitu ta'u kaowu dopomeatefi bhe mo'aneno. ³⁷Ampa aini nobhihinandamo, umuhuno alu fulu fato ta'umo. Anoa ini miina nagumaati Lambuno Lahata'ala, mentae mohondo nosombai Lahata'ala, sadhia nopoasa bhe nosambahea. ³⁸Pobutu doowa Yesus ne na'a, anoa nomaimo dua lasao nfoampe katumpuno lalo ne Lahata'ala. Pada aitu nopugaumo nopulao'ao ana'i amaitu ne kosasawindo mie ntumaa-ntaano kaitolosi'ano Yerusalem.

³⁹Nopalusi doala'i kosasawi'ae tutuha maraluu'ano peda pahintano Ompu, dosulimo we liwu kaeate'ando, liwuno Nasaret we kadieno Galilea. ⁴⁰Ana'i aitu dhulu kabhala dhulu ka'osa, dhulu dua kapande, sadhia nopobhaiiane kabarakatino Lahata'ala.

Yesus weo Lambuno Lahata'ala
2:41-52

⁴¹Seta'u-seta'u ne hohaea'ano Paska kamungkulano Yesus dokala we Yerusalem. ⁴²Wakutuuno Yesus noko'umuhu ompulu haa ta'u, peda kaneando dokalamo toha we Yerusalem dapohohaea. ⁴³Nopalusi hohaea'a na'a dosulimo, tamaka Yesus neate we Yerusalem; gaha'a miina damande'aanea kamungkulano. ⁴⁴Kuna'endomo ana'i maitu nosulimo dua dopoangka-angkafi bhe sabhangka'indo. Se'oleomo dokala kane'omo do'ondofie ne olotando bhahitie'indo bhe popande'ao'ando. ⁴⁵Miina kaowu daohae, dosulimo we Yerusalem poowa do'ondofie kansuhu. ⁴⁶Nopooli tolu oleo dopo'awaanemo weo Lambuno Lahata'ala, tangasano nengkoha-ngkoha ne wuntawuntando guru agama. Anoa nofeti-fetingkeda bhe nofee-feena. ⁴⁷Kosasawindo metingkeno domenteane sepali'a kapandeno bhe katobhoosino.

⁴⁸Sadowohae kamungkulano tadotonto, maka nopugau inano ambano, “Noafa ka'asi habu kainsami peda itu, anaku? Amamu bhe idi sakenda handa mani ta'ondofiko.” ⁴⁹Tamaka Yesus tanotobhoosida ambano, “Noafa gaha'a ondo fi kanau'omu? Miina mande'aaneomua gaha'a Idi ini tabeano aeate weo lambuno Amaku?” ⁵⁰Tamaka andoa miina dalumosangi ma'anano pugauno na'a.

⁵¹Pada aitu Yesus nosulimo we Nasaret nopoowa-owa bhe kamungkulano. Ne itu Yesus sadhia neangka ne kamungkulano. Inano tanofekataa sabhaha kadhadhia amaitu weo totono lalono. ⁵²Yesus dhulu kabhala dhulu kapande, dhulu noasiane Lahata'ala bhe doasiane dua manusia.

Yohanes Fokadiuno

3:1-20 *Mat 3:1-12; Mrk 1:1-8; Yoh 1:19-28*

3 Ompulu lima ta'umo Tiberius nembali Omputo Kaisar. Ta'u ana'a dua Pontius Pilatus gubernur ne kadieno Yudea, Herodes noowa kadieno Galilea, Filipus bhahitieno Herodes noowa kadieno Iturea bhe kadieno Trakonitis, bhe Lisantias noowa kadieno Abilene. ²Wakutuu ana'a Imamu Bhalano Hanas bhe Kayafas. Ne ta'umo ana'a Lahata'ala nokobhoasaomo ne Yohanes anano Zakaria we pandaso bhalano. ³Pada aitu Yohanes nokalamo ne amai liwu ne koseka'ewa'ae kadie ne owano umelena Yordan nofosampe bhihita mai'aono ne Lahata'ala. Ambano, “Fetompa'ao'omu

dhosamiu, doliomu ne Lahata'ala bhe mefekadiu'omu maka Lahata'ala na'umamponi dhosamiu.”⁴ Aini nopokantibhamo bhe tibuhi-no weo Kitabino anabii Yesaya,

“Nandoo suaha mekei-keino we pandaso bhalano,

‘Mebhongaomu kaangka'ano Ompu,

fekalaa'ie'omu so kaangka'ano,

⁵ sabhaha lonso damo'awoe,

sabhaha kabhawo bhe gunu dapotateane,

kowego-wego'ano damekalaa'ie,

kontido-ntido'ano daposaheteane,

⁶ kosasawindo mie damoha kasalamatati mai'aono ne

Lahata'ala.’”^a

⁷Pada aitu Yohanes nopugaumo ne mie bhahi mai mefekadiuno, “Hintimiu sampu'ano ule modai, ambamo la'ae bhahaa lumapamu ne amahano Lahata'ala so humato'ano?”⁸ Dadi'anomo fotiwohomumu ne podiumiu ingka gaha'a fetompaanemoomu dhosamiu. Koise nokofekihi we lalomiu, ‘Ingka insaodi ini sampu'ano Abraham, [tetewei dasumalamati,]’ Kapa'amo amohatokoomu, Lahata'ala nokokuasa naefokonandoo sampu'ano Abraham mahinggamo namai'ao ne kontu ini.⁹ Polulu nokantaa-ntaamo ne pahakano sau. Sabhaha sau tapa mokesa'ano bhake tetewei datumu'oe maka da'umohoe weo efi.”

¹⁰Mie bhahi na'a dofeenaemo ambado, “Ane peda na'a, kaowu taeafamo bhahaa?”¹¹ Notobhoosimo Yohanes ambano, “Kobhadhuno haa tuwu, nasetuwu wa'ane tapa kobhadhuno, ko'otino dawue nada na'a dua.”

¹²Nandoo dua meala'ino sewa mai defekadiu bhe dofeena ambado, “Guru, insaodi ini taeafa'imo?”¹³ Ambano Yohanes, “Mesaloomu sewa peda netubho kaowu, koise nokolabhia!”

¹⁴Nandoo dua tantara'i mai meenano ambado, “Kaowu insaodi ini taeafamo?” Ambano Yohanes, “Koise mesaohi buku kodhoino, koise fosangkati so kaowu meala dhoi, netaamo kaowu dadi'ao gadhimu.”

¹⁵Wakutuu aitu mie bhahi notisangke lalondo sampe dofeena we lalondo, “Anoamo ini bhahaa Mesias, Omputo Fosalamatino nentaa-ntaantomu?”¹⁶ Dadi'anomo Yohanes nopugaumo ne mie bhahi maitu ambano, “Idi ini akadiuangkoomu oe, tamaka so humatono mada kaowu nofoliu kanau kuasa, mahinggamo alumense

^a 3:4-6 Yes 40:3-5

katapuno kaampinino pae amantasia. Anoa na'a nakumadiuangkoomu Rohino Lahata'ala bhe efino. ¹⁷ Katepi nontiintahaemo so natumepisao'ao pae ampa naonggela. Onuno pae nahumompunaane weo lambu kaentei'a oti, kulino bhe kansiano laano natumunuane efi tapa mopoopeono.”

¹⁸ Nobhahi dua katangahi sigao'ano nepakeno Yohanes nefolele Bhihita Metaa ne mie bhahi. ¹⁹ Mahingga kolaki Herodes mowano kadie aitu, notangahie dua Yohanes, mba'inomo nogaa bhe Herodias mieno lambuno bhahitieno, bhe sabhaha diu modai sigao'ano nehabuno. ²⁰ Gaha'a kolaki Herodes tanofodhulu kadaino diuno, nofopesua Yohanes weo katohongku.

Yesus dokadiu'e

3:21-22

*Mat 3:13-17;
Mrk 1:9-11; Yoh 1:32-34*

²¹ Nopalusi kosasawindo mie na'a nokadiuda, Yohanes nokadiumo dua Yesus. Gaha'a tangasano Yesus nosambahea, tanosimo-engka'amo lani, ²² maka Rohino Lahata'ala nosampu te wawono nokatu fute'o. Tanotifetingkemo dua suaha nomai'ao te lani, ambano “Hintumo Anaku timoasi'aono, Hintumo posahasi'aono laloku.”

Siwulu kamai'ao'ano Yesus

3:23-38

Mat 1:1-17

²³ Wakutuuno Yesus notandaki kahadhaano umuhuno napetolu fulu ta'umo. Weo fekihindo mie, Yesus anano Yusuf,

anano Eli, ²⁴ anano Matat,

anano Lewi, anano Malki,

anano Yanai, anano Yusuf,

²⁵ anano Matatias, anano Amos,

anano Nahum, anano Hesli,

anano Nagai, ²⁶ anano Maat,

anano Matatias, anano Simei,

anano Yosek, anano Yoda,

²⁷ anano Yohanan, anano Resa,

anano Zerubabel, anano Sealtiel,

anano Neri, ²⁸ anano Malki,

anano Adi, anano Kosam,

anano Elmadam, anano Er,

²⁹ anano Yesua, anano Elieser,

anano Yorim, anano Matat,
 anano Lewi, ³⁰ anano Simeon,
 anano Yehuda, anano Yusuf,
 anano Yonam, anano Elyakim,
³¹ anano Melea, anano Mina,
 anano Matata, anano Natan,
 anano Daud, ³² anano Isai,
 anano Obed, anano Boas,
 anano Salmon, anano Nahason,
³³ anano Aminadab, anano Admin,
 anano Arni, anano Hesron,
 anano Peres, anano Yehuda,
³⁴ anano Yakub, anano Ishak,
 anano Abraham, anano Terah,
 anano Nahor, ³⁵ anano Serug,
 anano Rehu, anano Peleg,
 anano Eber, anano Salmon,
³⁶ anano Kenan, anano Arpaksad,
 anano Sem, anano Nuh,
 anano Lamek, ³⁷ anano Metusalah,
 anano Henok, anano Yared,
 anano Mahalaleel, anano Kenan,
³⁸ anano Enos, anano Set,
 anano Adam, anano Lahata'ala.

Yesus nosobae Kafeompu'ando seetani we pandaso bhalano

4:1-13

Mat 4:1-11; Mrk 1:12-13

4 Yesus nokabhintiemu Rohino Lahata'ala. Nosuli mai'ao we umelenu Yordan noatoemo Rohino Lahata'ala we pandaso bhalano. ²Ne itu neate fato fulu'a kaomponano bhe nosoba-sobae Kafeompu'ando seetani. Kaomponano neate ne itu miina sepali'a naomaa'a. Panda-pandano no'ahomo. ³Nopugaumo Kafeompu'ando seetani ambano, "Ane hintu ini Anano Lahata'ala, soba tududa kontu ini daembali roti." ⁴Yesus tanotobhoosi ambano, "Nandoo notibuhi weo Kitabi, 'Suano kaowu ta'o roti kao'uhi'ando manusia.'" ^a

⁵Pada aitu Kafeompu'ando seetani nowowo'omo Yesus te melangke'ano maka setolinda'a nofotiwohaane kosasawi'ae kakolaki'ano dhunia. ⁶Nopugaumo ne Yesus ambano, "Kosasawi'ae kuasa

^a 4:4 Ul 8:3

bhe kahangkaeano ini ama'angkoehintu, kapa'amo kosasawi'ae ini padamo dowa'a kana'e idi maka akokuasa dua ama'ane ne me-poidaloku. ⁷Dadi'anomo ane sumudhu tumaohao sombamu ne idi, kosasawi'ae ini ama'angkoehintu so fehebua'amu.” ⁸Tamaka Yesus tanotobhoosi ambano, “Nandoo notibuhi weo Kitabi, ‘Taohao sombamu ne Ompu Lahata'alamu, ampamo kaowu Anoa so nefempuni'imua!’ ”^a

⁹Pada aitu nowowo'omo toha Yesus we Yerusalem, noampee te kabubuno Lambuno Lahata'ala maka nopugau ambano, “Ane hintu Anano Lahata'ala oho wutomu we panda watu, ¹⁰kapa'amo nandoo notibuhi weo Kitabi, ‘Lahata'ala natumudu mala'ekatino dadhumaganiko; ¹¹andoa dakumantafeke keana notompalo a'emu ne kontu.’ ”^b ¹²Yesus notobhoosimo ambano, “Nandoo bhoasaono Kitabi, ‘Koe sobaea Ompu Lahata'alamu.’ ”^c

¹³Nopalusi sabhaha kasobano na'a Kafeompu'ando seetani nokalamo maka neanta-antagi kasalawa metaa.

Yesus nosuli we Galilea

4:14-15

Mat 4:12-17; Mrk 1:14-15

¹⁴Weo kuasano Rohino Lahata'ala, Yesus nosulimo we Galilea. Bhihitano nolelemo ne koseka'ewa'ae kadie aitu. ¹⁵Yesus nofofoina'u ne lambu-lambu kasambahea'a ne itu, maka kosasawindo metingkeno dopudhi-pudhie.

Yesus dobansie we Nasaret

4:16-30

Mat 13:53-58; Mrk 6:1-6

¹⁶Yesus nohato dua we Nasaret, liwunomo ampa nobhala. Peda kaneano ne oleono Sabat nopesuamo weo lambu kasambahea'a maka noehe naebasa Kitabi. ¹⁷Dowa'anemo Kitabino anabii Yesaya. Hato nolengka kaluluno Kitabi aitu, no'awamo aeati peda ini,


¹⁸“Rohino Ompu nokabhinti kanau,
mba'inomo padamo nosangke kanau
so amosampe'ao Bhihita Metaa ne mie ngkumaasi-
asino.

Anoa notudu kanaumo afolele bhihita
putae mie netohongku damobebasida,

^a 4:8 Ul 6:13

^b 4:10-11 Mzm 91:11-12

^c 4:12 Ul 6:16



Kaluluno Kitabi

o kabunto sumuli dafowoha.

Notudu kanau dua amobebasi mie
nefompina-mpina,

¹⁹aefolele bhihitano putae tempono kabarakatino Ompu
nohatomo.”^a

²⁰Pada nebasa nosongkoemo,^b nofosulie ne dhagano lambu kasambahea'a na'a maka nengkoha nrafoina'u. Kosasawindo mie weo lambu kasambahea'a dosemata-mata ne Anoa. ²¹Netandakimo nofoina'uda ambano, “Se'oleo itu aeatino Kitabi ini noko'ulamo wakutuuno fetingkee'omu.”

²²Kosasawindo mie na'a do'uumbetie, domente'ao pugau mokesa nekobhoasa'aono. Ambado, “Ingka anoa ini anano Yusuf.” ²³Yesus nopugaumo dua ne andoa ambano, “Teteweimo patudhumi malenda kanau'omu peda ini, ‘Hintu foagono, feka'osa wutomu! Ingka padamo tafetingke mehabu sabhaha tanda timente'aono we Kapernaum; dadi'anomo habue dua ne liwu kamai'ao'amu ini.’ ” ²⁴Ambano dua Yesus, “Amohatokoomu, kotu-kotu'u miina bhe anabiia nefosibhala ne liwu kamai'ao'ano. ²⁵Amohatokoomu dua bhe pugauku ini nokotu'u, ne dhamanino anabii Elia o lani notisongko [miina nako'usea] tolu ta'u nomo wula, maka koseka'ewa'ae witeno Israel nofinda'ie gaba bhalano. Wakutuu ana'a nobhahi hobhine ne Israel bhihinandano. ²⁶Mahinggamo pedamo aitu anabii Elia miina natumudue Lahata'ala ne andoa maitu, tamaka ne

^a 4:18-19 Yes 61:1-2

^b 4:20 Sakotu'uno: *noluluemo*.

seemie bhihinanda we Sarfat ne kadieno Sidon.^a ²⁷Pedamo dua aitu, ne dhamanino anabii Elisa dobhahi mie kokuli modaino ne witeno Israel, tamaka bhe seemie miina bhe tifeka'osa'ano, mpahinomo Naaman miendo Siria.”^b

²⁸Dofetingke peda na'a kosasawindo mie weo lambu kasambahea'a ana'a nopa'i sepali'a lalondo. ²⁹Andoa dosiehe-ehe'amo dogihasi Yesus we sembalino kota maka dowowo'oe se wiwino pimpi, kaengkoha'ano kotando, patudhundo da'umohoe we panda. ³⁰Tamaka Yesus tanoangka ne olotando maka nokala.

Yesus weo lambu kasambahea'a we Kapernaum

4:31-37

Mrk 1:21-28

³¹Pada aitu Yesus nosampumo we Kapernaum, se'onu kota we kadieno Galilea maka ne oleono Sabat nofofoina'u ne itu. ³²Mie metingkeno kafoina'uno tadomente mba'inomo pugauno nopono'ao kuasa. ³³Gaha'a weo lambu kasambahea'a na'a nandoo seemie nepesuakino seetani. Mie na'a nokei nofekabhala-bhala ambano, ³⁴“Haa hintu Yesus miendo Nasaret! O ae patudhumu ne insaodi ini, mai mobinasa kainsami gaha'a? Apande'aangko hintu itu mie mongkilo mai'ao ne Lahata'ala.” ³⁵Tamaka Yesus nohandapie ambano, “Koise mohobhoa, limba'o toha mai'ao ne mie aini!” Gaha'a seetani ana'a nohambita'iao mie aitu ne wunta-wuntando mie bhahi maka nolimba bhe miina namekolea-lea'iea.

³⁶Kosasawindo mie tadomente maka dopugau sapada-pada andoa ambado, “Pahasili pugauno maitua! Ingka nokokuasa mpuu sampe nepahintangi seetani dalumimba, lasao dua dolimba.” ³⁷Maka bhihitano nolelemo ne ne'amai-ne'amai liwu ne kadie aitu.

Yesus nofeka'osa ponia hobhineno Simon Petrus bhe mie sigao'ano

4:38-41

Mat 8:14-17; Mrk 1:29-34

³⁸Pada aitu nohunsamo lambu kasambahea'a na'a maka nokala se lambuno Simon. Gaha'a ponia hobhineno Simon nosaki, nodaha sepali'a sodono maka desalo ne Yesus natumulumie. ³⁹Yesus no-ehemo ne sohihino kamungkula aitu, maka nobhoohai sodono na'a, lasao nopada. Hobhine aitu lasao nowanu maka netaganaanda daomaa.

^a 4:25-26 1Raj 17:1-16

^b 4:27 2Raj 5:1-14

⁴⁰Nosoo kaowu oleo, kosasawindo miendo liwu deowa'ianemo mie mosakino; saki nenamisindo tanofegiu. Yesus noteimo limano te wawondo seemie-seemie maka nofeka'osada. ⁴¹Dobhahi dua seetani dolimba domai'ao ne mie bhe dokei ambado, “Hintumo Anano Lahata'ala.” Yesus no'ele'aanda sepali'a damugau, mba'ino-mo dopande'aanemo putae Yesus Omputo Fosalamatino.

Yesus nofofoina'u we liwu-liwu sigao'ano

4:42-44

Mrk 1:35-39

⁴²Hato nomentae Yesus nokalamo we simbalino kota, we molino'ano. Gaha'a mie bhahi do'ondofie. Hato dopo'awaane, do'ulei-mo lalondo desalo keana nohunsada. ⁴³Tamaka Yesus tanopugau ambano, “Bhihita Metaa Kafopahinta'ano Lahata'ala tabeano amolelee dua we liwu-liwu sigao'ano, kapa'amo aitu'aemo patudhuno Lahata'ala notudu kanau we dhunia ini.” ⁴⁴Dadi'anomo Yesus nefolelemo Bhihita Metaa weo lambu-lambu kasambahea'a ne kadieno Yudea.

Yesus nosali'i anaguhu'ino kabhao-bhaono

5:1-11

Mat 4:18-22; Mrk 1:16-20

5 Sewakutuu Yesus neeche-ehe ne wiwino te'ino Genesaret, do-libu-libue mie bhahi dametingke bhoasaono Lahata'ala sampe tadoposeke-sekehemimo. ²Gaha'a nowohamo haa onu bhangka we ka'oti'a, mieno dosampumo tangasano dofekanggela'i pukando. ³Yesus nosawimo ne se'onu bhangka andoa maitu. Bhangka ana'a bhangkano Simon. Nohato te wawo nopugauanemo nadhumudhu bhangka na'a namekambakodo-kodo'oe. Yesus nengkoaha te wawo-nu bhangka na'a maka nofoina'u mie bhahi.

⁴Palusi nofofoina'u nopugaumo ne Simon ambano, “Bhose kaita we ndalo maka tabuhao pukamu dehakoomu kenta.” ⁵Simon notobhoosimo ambano, “Guru, kosekawanta'ae alo tagiu'e miina takonipoolia, tamaka hampano tudu kanau tadua atumabuhaomo puka inia.” ⁶Pada dotabuhao pukando nobhahi sepali'a kenta nekalibundo, noma'omo nobhensi bhe pukando. ⁷Dadi'anomo do-alemo sabhangkando we bhangka se'onuno damai datumulumida. Andoa domai dopoulea'ao kenta na'a sampe kohaa'onu bhangka'ae noma'o nakumalobu. ⁸Nowoha kadhadhia aitu, Simon Petrus no-longko nosudhu ne wiseno Yesus bhe nopugau ambano, “Ompu, hunsa kanau kapa'amo idi ini mie kodhosa.” ⁹Simon nopugau

peda na'a kapa'amo anoa bhe kosasawindo sabhangka'ino nopuli mentendo dowoha kabhahino kenta nepoolindo. ¹⁰Pedamo dua aitu Yakobus bhe Yohanes ana'ino Zebedeus posabhangka'aono Simon. Yesus nopugaumo ne Simon, “Koise mote'ia, notanda aitu mepukamo manusia.”

¹¹Pada dofoampe bhangkando te wite dohunsamo bhahi-bhahi'ae maka doangkafi Yesus.

Yesus nefeka'osa seemie kokuli modaino

5:12-16

Mat 8:1-4; Mrk 1:40-45

¹²Sewakutuu Yesus nandoo'e toha ne se'onu liwu. Ne itu nandoo seemie kokuli modaino nokabhintiemu kose'ulu-uluno. Sanowoha Yesus nolongkomo ne wite bhe nopugau ambano, “Waompu, ane umunda, tetewei naembali meka'osa kanau.” ¹³Yesus nofonsoho limano bhe nodampasi mie maitu bhe nopugau, “A'unda, mo'osa'o toha.” Mie aitu lasao no'osa, kulino nonggelamo. ¹⁴Yesus no'ele'aane naekapuna ne la'ae maka dua, bhe nopugau ambano, “Kalamo fotiwoha wutomu ne imamu. Namada aitu meowa kapopanga ne Lahata'ala peda neowilino anabii Musa so netandaindo mie bhahi putae hintu mo'osamo.”^a

¹⁵Tamaka bhihitano Yesus dhulu ka'ewa nolelea, sampe mie bhahi dosipumpu domai ne Anoa, dametingke'ao pugauno bhe dao'osa'ao mai'ao ne sakindo. ¹⁶Tamaka Yesus nofogaatimo wuto- no, nokalamo nosambahea ne molino'ano.

Yesus nefeka'osa seemie kalu

5:17-26

Mat 9:1-8; Mrk 2:1-12

¹⁷Se'oleo tangasano Yesus nofofoina'u nandoo seemie hodua mie- ndo Farisi bhe pande-pande Kitabi dengkoha-ngkoha dofetingke pugauno. Andoa domai'ao ne sabhaha liwu ne kadieno Galilea, Yudea bhe Yerusalem. Kuasano Ompu nokabhinti Yesus sampe nembali nefeka'osa mie mosaki. ¹⁸Gaha'a dohatomo mie de'owea seemie kalu ne kaodo'ano. Andoa do'ulei lalondo damopesua'e, patudhundo damondolee ne wiseno Yesus. ¹⁹Mba'inomo miina damooli dopesua hampano kabhahindo mie dofonimo te ato [potate'ano], dehungga ato maka dofosampu mie aitu bhe kaodo'ano ne wunta-wuntando mie bhahi nopobutu ne wiseno Yesus. ²⁰Nowoha kabhalano kapara- saeando maitu Yesus nopugaumo ambano, “Sabhangka, dhosamu

^a 5:14 Im 14:1-32

noti'amponimo.”²¹ Tamaka pande-pande Kitabi bhe miendo Farisi nokaduku we lalondo, “La'ae bhahaa mie aini pototo'aono wutono bhe Lahata'ala? La'ae gaha'a so me'amponino dhosa ane paise wutono Lahata'ala?”

²²Tamaka Yesus nopande'aane dukuno lalondo maka nopugau ne andoa, “Noafa gaha'a kofekihi'ao'omu peda aitu? ²³O ae so katandaino akokuasa? Apugau'ao 'Dhosamu noti'amponimo', bhaha'i apugau, 'Wanumo maka kala'? ²⁴Amotiwohaangkoomu Anano Manusia – Idimo ini – nokokuasa ne'amponi dhosa te dhunia ini.” Pada aitu Yesus nopugaumo ne mie kalu maitu ambano, “Wanu'o toha, sangke kaodo'amu itu maka suli se lambumu.”²⁵ Kalu ana'a lasao nowanu ne wisendo, nosangke kaodo'ano maka nosuli se lambuno bhe nopudhi Lahata'ala.

²⁶Kosasawindo mie tadomente bhe dopudhi Lahata'ala. Weo kate'indo dopugaumo ambado, “Oleo itu dowohaomu kadhadhia timente'aono sepali'a.”

Lewi mealano sewa noangkafi Yesus

5:27-32

Mat 9:9-13; Mrk 2:13-17

²⁷Pada aitu Yesus nokalamo nohunsa kota amaitu. Gaha'a no-wohamo seemie mealano sewa nengko-ha-ngko-ha ne kantorino sewa. Neano Lewi. Yesus nopugauanemo ambano, “Mai angkafi kanau!”²⁸ Lewi lasao noehe nohunsa kosasawi'ae na'a maka no-angkafi Yesus.

²⁹Palusi ana'a Lewi nehabumo hame bhalano se lambuno mbali Yesus. Dobhahi meala'ino sewa bhe mie sigao'ano dohumaa dopo-
mbali-mbali bhe Yesus.³⁰ Miendo Farisi bhe pande-pande Kitabi do-
kamuntu-muntu ne anaguhu'ino Yesus ambado, “Noafa gaha'a po-
mbali-mbali'ao'omu bhe meala'ino sewa bhe mie kodhosa maitu?”

³¹Tamaka Yesus tanotobhoosida ambano, “Suano mie metaano namisi mefaraluuno foagono, mpahinomo mie mosaki.³² Hatoku ini miina ae'ondofi mie mongkilo, tamaka mie kodhosa neanomo dametompa'aomo podiu modaindo.”

Poasa'a

5:33-39

Mat 9:14-17; Mrk 2:18-22

³³Dopugaumo dua mie ne Yesus ambado, “Anaguhu'ino Yohanes Fokadiuno nentuhu dopoasa bhe dosambahea, pedamo dua anaguhu'indo miendo Farisi, tamaka anaguhu'imu ingka dohumaa bhe

dofoho'u." ³⁴Ambano Yesus, "Naembali bhahaa sabhangka'ino lo'ia bu'ou datumududa damoasa tangasano lo'ia bu'ou nopobhai-
anda? Ingka paise! ³⁵Tamaka nahumato kaowu tempono lo'ia
bu'ou dawowo'oe, ne na'amo kane'omo damoasa."

³⁶Yesus nofohatoanda dua kapalenda ambano, "Miina nandu-
mandooa mie mebhensino sebhini kai mai'ao ne bhadhu bu'ou
maka natumabhae ne bhadhu nggasi. Kapa'amo ane nada ana'a
bhadhu bu'ou na'a natibhensimo dua pakade kabhini bu'ou na'a pae
nakumanaa ne bhadhu nggasi na'a. ³⁷Pedamo dua na'a, miina nandu-
mandooa mie mefosingi'ino angguru bu'ou ne kaentei'a katembu-
no,^a kapa'amo ane nada na'a so kaowu naowengka'ao kaentei'ano.
Angguruno nabinasa, kaentei'ano nahumansuru. ³⁸Dadi'anomo
angguru bu'ou tabeano dotei'e ne kaentei'a bu'ou. ³⁹Pedamo dua
ana'a miina bhe so moho'uno angguru bu'ou ane padamo do-
foho'u angguru ngkodau. Kapa'amo ambado, 'Nombaka angguru
ngkodau.' "

Anaguhu'ino Yesus detobhe gandum ne oleono Sabat

6:1-5

Mat 12:1-8; Mrk 2:23-28

6 Ne oleono Sabat tangasano Yesus nolalo weo kaampono
gandum, anaguhu'ino detobhemo wunano gandum, tadoko-
ki'ao limando maka dohumaa'e. ²Tamaka seemie hodua miendo
Farisi dopugau ambado, "Noafa melempagi'ao'omu faliano oleo-
no Sabat?" ³Tamaka Yesus notobhoosida ambano, "Miina'o ba-
sae'omu gaha'a nehabuno Omputo Daud wakutuuno wutono bhe
mie mangkafie do'ahomo? ⁴Ingka nopesua weo Lambuno Laha-
ta'ala, nealamo roti kapopanga so Lahata'ala maka nohumaa'e bhe
nowa'andae dua mie mangkafie. Weo tubhono agamantoomu roti
ana'a o falia dohumaa'e mie sigao'ano, mpahinomo imamu."^b
⁵Ambano toha Yesus, "Anano Manusia Ompunomo dua oleono
Sabat, nokokuasa namotantu atorano Sabat."

Yesus nefeka'osa mie ne oleono Sabat

6:6-11

Mat 12:9-14; Mrk 3:1-6

⁶Se'oleono dua Sabat Yesus nopesuamo weo lambu kasamba-
hea'a maka nofofoina'u. Ne itu nandoo seemie mokepeno limano

^a 5:37 Kaentei'a katembuno, sakotu'uno: *kadu kangkodauno mai'ao ne bhalulano kadadi.*

^b 6:3-4 1Sam 21:1-6

sembali, o suanano. ⁷Pande-pande Kitabi bhe miendo Farisi do-ka'o-ka'ondo Yesus bhaha'i kaowu nameka'osa mie amaitu ne oleono Sabat, somo tingkuno damo'alae. ⁸Tamaka Yesus nopande'aane fekihindo, maka nopugaumo ne mie mokepeno lima maitu ambano, “Mai, meehe-ehe te wise ini.” Mie ana'a nohemo. ⁹Pada aitu Yesus nopugaumo ne andoa ambano, “Ameenakoomu, weo tubhono agamantoomu nembali dehabu ae ne oleono Sabat? Habu metaa kaa habu modai? Dafofodadi kaa dafopongko?” ¹⁰Pada aitu Yesus nofolili matano ne andoa maitu, maka nopugau ne mie mokepe na'a ambano, “Fonsoho limamu!” Mie ana'a nofonsoho limano, gaha'a no'osamo.

¹¹Miendo Farisi na'a nohehe bhakendo lasao dopugau-gau sapada-pada andoa bhaha'i damafa'iane Yesus maitu.

Yesus nesali'i rasuluno ompulu hoduanu

6:12-16

Mat 10:1-4; Mrk 3:13-19

¹²Wakutuu ana'a Yesus nofonimo te kabhawo maka kosealo'ae nosambahea ne Lahata'ala. ¹³Nomentae nosali'imo anaguhu'ino dahumatoe maka nepili ne olotando andoa maitu doompulu hodua. Andoa maitu nokonadamo rasulu. ¹⁴Nea'indo: Simon nekonando dua Petrus, Andreas kakuta'ano Simon, Yakobus bhe Yohanes, Filipus bhe Bartolomeus, ¹⁵Matius bhe Tomas, Yakobus anano Alfeus, Simon miendo Zelot,^a ¹⁶Yudas anano Yakobus bhe Yudas Iskariot. Yudas Iskariot ini hatu pandano nembalimo mowano Yesus ne limano kaewa.

Yesus nofofoina'u bhe dobhahi mie nefeka'osano

6:17-19

Mat 4:23-25

¹⁷Pada aitu dosisampu-sampu'amo mai'ao te kabhawo maka dofetumpu we patate'ano. Ne itu dobhahi sepali'a mie mangkafie dohompumo bhe dobhahi dua mie sigao'ano. Andoa maitu domai'ao ne koseka'ewa'ae kadieno Yudea, domai'ao we Yerusalem, bhe domai'ao dua we kadieno Tirus bhe Sidon we wiwino te'i. ¹⁸Kamai'ando dametingke'ao pugauno bhe so dao'osa'ao ne sakin-do. Mie nepesuakino seetani nofeka'osada dua. ¹⁹Kosasawindo mie humatono na'a do'ulei lalondo damedampa Yesus, kapa'amo

^a 6:15 Miendo Zelot na'a dokopatudhu damobebasi witenno Israel mai'ao ne kafopahinta'ano Roma.

nandoo kuasa lumimbano ne Anoa sampe kosasawindo no-feka'osada.

Wambano dawua bhe balaa

6:20-26

Mat 5:1-12

²⁰Pada ana'a Yesus no'ondomo anaguhu'ino bhe nopugau ambano,

“Kodawua mpuu, hintimiu ngkumaasi-asino,
hampano hintimiumo so mehapino Kafopahinta'ano
Lahata'ala.

²¹Kodawua mpuu hintimiu mo'ahono ampa aitu,
hampano mada kaowu damekawe'ikoomu.
Kodawua mpuu hintimiu mo'aeno ampa aitu,
hampano namada kaowu mutaa'omu.

²²Kodawua mpuu ane dabansikoomu mie bhaimiu, ane
dagumihaskoomu tawa dabihidhingikoomu bhe
dasumambili neamiu ne modai'ano hampano
mangkafiomu Anano Manusia.

²³Ne wakutuu ana'a fowulaomu lalomiu bhe
manari'ao'omu ka'ia, kapa'amo sakotu'uno
nobhala ponambomiu kumantaa-ntaano te
surugaa. Ingka pedamo dua aitu habundo
awua'indo ne ana-anabii dhamani wawono.

²⁴Tamaka balaamoomu, hintimiu mohangkaeano,
hampano weo kahangkaeamiu itu
po'awaanemoomu kalawesino lalomiu.

²⁵Balaamoomu, hintimiu mowe'ino ampa aitu,
hampano mada kaowu mo'ahoomu.
Balaamoomu, hintimiu mutaano ampa aitu,
hampano mada kaowu mopea'omu bhe mo'ae'omu.

²⁶Balaamoomu, ane kosasawindo mie damudhikoomu,
hampano pedamo dua na'a habundo awua'indo ne
mie mpahaana-anabiino.”

Moasi'ao kaewamu

6:27-36

Mat 5:38-48

²⁷“Ampamo kaowu hintimiu metingke kanau itu, amohato-
koomu, moasianda kaewamu, habu metaa ne mie bansiko, ²⁸me-
saloomu kabarakati so mie bhatata'iangko, sambahea'andaomu

mie me'awutiko. ²⁹ Ane dotofa bhagamu, fodoliane dua bhagamu sewetano. Ane doala bhetamu^a wa'anda dua bhe bhadhumu. ³⁰ Ane bhe mie nokonisalo ne hintu, wa'anda. Ane fehebua'amu doalaemo mie bhaimu, koise suli mesaloe. ³¹ Bhahi-bhahi'ae kapoindalomu so nehabundo mie bhaimu ne hintu, habue dua ne mie bhaimu.

³² Ane moasi'ao kaowu mie moasiangko, o ae gaha'a so tipudhi'ano? Ingka mahingga mie kodhosa doasi'ao dua mie moasi-anda. ³³ Ane humabu metaa kaowu ne mie humabu metaano ne hintu, o ae gaha'a so tipudhi'ano? Ingka mie kodhosa dohabu dua peda na'a. ³⁴ Ane konifoada kaowu ne mie bhaimu mba'inomo posahuna'ao damosuliangkoe, o ae gaha'a so tipudhi'ano? Ingka mie kodhosa dofoada dua mie kodhosa sigao'ano, patudhundo sumuli da'umawae napototo kabhahino. ³⁵ Tamaka hintimiu, moasianda kaewamu, habu metaa ne andoa. Fofoadada tamaka koe posahuna'ao sumuli umawae, maka me'awa ponambo bhahi. Hintimiu membaliomu ana'ino Lahata'ala foliuno kuasa, kapa'amo Lahata'ala netaa dua lalono ne mie tapa mepande'aono katumpuno lalo bhe mie modai. ³⁶ Mobhelaanda lalo mie bhaimu pedamo dua Amamu nofomobhela'ao lalo.”

Pobhita-bhitahaki

6:37-42

Mat 7:1-5

³⁷ “Koise bhitahaki mie bhaimu, keana dua nobhitahakiko Lahata'ala. Koise hukumu mie bhaimu, keana dua nohukumuko Lahata'ala. Amponida mie bhaimu maka na'umamponiko dua Lahata'ala. ³⁸ Wa'anda mie bhaimu maka Lahata'ala nama'angko dua, me'awa kaganta bhalano nefohuka bhe ne'endu ampa napondawuti dasumungkaangkoe ne awimu. Kapa'amo kaganta nepakemu mbali mie bhaimu nama'angkoe dua Lahata'ala so wutomu.”

³⁹ Yesus nofohatoanda dua sehonda kapalenda ambano, “Bhahaa naembali seemie kabunto naetonda kabunto? Ingka so kaowu daondawu'ao weo ola kohoduando. ⁴⁰ Seemie anaguhu miina namoliu'ea gurunoa, tamaka nopooli kaowu nepoguhu'aono nopototomo bhe guruno.

⁴¹ Noafa bhahaa woha'ao kanenano habha weo matano bhahitiemu, gaha'a itu kakebhano sau weo matamu miina mande'aanea?

⁴² Peda ae dua pugau'ao ne bhahitiemu, ‘Bhahitie, mai amaliangko kanenano habha weo matamu itu’, gaha'aitu kakebhano sau weo

^a 6:29 Sakotu'uno: *dhubamu*.

matamu miina mohaea. Hintu mie mehaa'ulano! Alimo kadeki kakebhano sau weo matamu itu, so nentalea'ao umondo maka mali kanenano habha weo matano bhahitiemu.”

O sau bhe bhakeno

6:43-45

Mat 12:33-35

⁴³“Sau metaa pae bhe kapoolia nakobhake'ao modai'ano, pedamo dua ana'a sau tapa metaa'ano pae bhe kapoolia nakobhake'ao metaa'ano. ⁴⁴Sepu'u-sepu'u sau dopande'aane ne bhakeno. Ingka bhakeno woha'a miina da'umutae ne kahoku kokihi, tawa bhakeno angguru da'umutae ne daha-daha. ⁴⁵Mie metaa nefolimba metaa'ano nomai'ao ne kampebuni'ano lalono metaa'ano; mie modai nefolimba modai'ano. Kapa'amo tibhoka'ano ne wiwi nolua nomai'ao weo totono lalo.”

Haa honda sandi

6:46-49

Mat 7:24-27

⁴⁶“Noafa kona kanau'omu, ‘Ompu, Ompu’, gaha'aitu miina mangkafie'omu pugauku? ⁴⁷Mie maino ne Idi maka nofetingke pugauku bhe noangkafie, amohatoangkie'omu bhe la'ae pototo'ano. ⁴⁸Anoa ini nopototo bhe seemie mefoeheno lambu. Mefoeheno lambu na'a neseli nofekandalo-ndaloe maka nofongkoha sandino ne kontu dempa. Gaha'a nonandoomo luano oe bhe mawa noangkai lambu aitu tamaka miina namoolie nogegohaane hampano katangkano katifohe'ano. ⁴⁹Ampamo kaowu metingkeno pugauku tamaka miina namangkafiea, mie aitu nopototo bhe mie mefoeheno lambu te wawono wite melaa, miina nakosandia. Sanoangkai'e mawa lambu ana'a lasao nosansa, kadaha maka kadaino.”

Yesus nofeka'osa bhatuano neangkando

tantara we Kapernaum

7:1-10

Mat 8:5-13; Yoh 4:46-53

7 Nopalusi nofohatoanda bhahi-bhahi'ae na'a ne mie bhahi, Yesus nopesuamo we kotano Kapernaum. ²Ne itu nandoo seemie neangkando tantarano Roma, bhatuano nosaki mo'osa tamate'ano. Bhatuano na'a noasiane sepali'a. ³Nofetingke bhihitano Yesus, neangkando tantara maitu netudumo seemie hodua kamungkula'indo miendo Yahudi dakumala daesalo ne Yesus namai nameka'osa bhatuano. ⁴Dohato se Yesus, mie netuduno maitu

desalo mpuu katulumino ambado, “Neangkando tantara maitu nopantasi mpuu tumulumie,⁵ kapa'amo noasi'ao sepali'a intaodiomu miendo Yahudi ini, padamo dua nefoehe kainsami lambu kamsambahea'a.”

⁶Dadi'anomo Yesus nosekala-kala'amo bhe andoa. Doma'o bhe lambuno, neangkando tantara na'a notudumo sabhangka'ino dakumala damugau ne Yesus ambado, “Waompu, koemo mosabha kapa'amo miina amantasia mesuaki lambuku.⁷ Kanandoo'anomo aabhi wutoku miina amantasia amai ne wisemua, ampamo kaowu tapugaumo nasewobha wamba maka bhatuaku maitu tetewei nao'osa.⁸ Kapa'amo idi ini bhe neangkaku dua, maka nandoo dua tantara neowaku. Ane apugau ne seemie tantara, ‘Kala!’ lasao nokala. Ane apugau ne seemieno dua, ‘Mai!’ lasao nomai. Pedamo dua aitu ane apugau ne bhatuaku, ‘Kahadhaa aini!’ lasao nokahadhaa'e.”

⁹Nofetingke pugau ana'a, Yesus tanomente. Poowa nodoli ne mie bhahi mangkafie, nopugaumo ambano, “Amohatokoomu, kabhalano kaparasaea pedando ini miina'o sepali'a apo'awaane ne olotando miendo Israel.”¹⁰ Gaha'a hato dosuli mie netudu na'a se lambuno neangkando tantara maitu, bhatuano no'osamo.

**Yesus nefodadi seemie ana'i mo'ane mateno we kota Nain
7:11-17**

¹¹Miina naomponaa pada ana'a Yesus nokalamo we se'onu kota nekonando Nain. Anaguhu'ino dopobhaiane bhe doangka-fida dua mie bhahi.¹² Noma'o bhe kaguali bhalano mesua'ano weo kota nandoo katongkuno mie mate dolimbaane mai'ao weo kota. Mate'ano na'a ana'i mo'ane kaenseemie, anano bhihinanda. Dobhahi sepali'a miendo kota poangka'aono hobhine na'a.¹³ Nowoha bhihinanda aitu, Ompu Yesus nobhelaanemo lalono maka nopugau ambano, “Koise mo'aea.”¹⁴ Pada aitu nodhulupimo katongkuno maeati maka nodampasie sampe mie metongkuno dofetumpu. Nopugaumo Yesus ambano, “Ana'i mo'ane, ambaku wanu'o toha!”¹⁵ Ana'i mo'ane mateno na'a lasao nowanu nengkoha bhe nopugau, maka Yesus nowa'anemo inano.

¹⁶Kosasawindo mie bhahi dote'imo bhe dopudhi Lahata'ala ambado, “Seemie anabii bhalano notiumbamo ne wunta-wuntantoomu. Lahata'ala nodongawimo umatino natumulumida.”¹⁷ Bhihitano

Yesus ini nolelemo ne koseka'ewa'ae witeno Yudea bhe liwu po-ma'o-ma'oti'ano.

Yesus bhe Yohanes Fokadiuno

7:18-35

Mat 11:2-19

¹⁸Yohanes Fokadiuno nofetingke bhihitano sabhaha kadhadhia ana'a ne anaguhu'ino. ¹⁹Nesali'imo dohodua maka notududa dakumala dameena Ompu Yesus nada aini, “Hintumo bhahaa so humatono peda nedhandi'aono Lahata'ala maitu, kaa taeantagi dua mie sigao'ano?” ²⁰Dohato ne Yesus mie katuduno maitu dopugaumo ambado, “Yohanes Fokadiuno notudu kainsami ta-meenako, hintumo bhahaa so humatono peda nedhandi'aono Lahata'ala, kaa taeantagi dua mie sigao'ano?”

²¹Wakutuu ana'a dobhahi mie nefeka'osano Yesus nomai'ao ne sabhaha saki bhe kakadee-dee. Nobhahi dua seetani nefolimbano bhe kabunto nefowulano matando sampe dofowoha. ²²Dadi'ano-mo Yesus tanotobhoosidamo ambano, “Sulimoomu fohatoomu Yohanes, fohatoaneomu o ae newoha bhe nefetingkemi: kabunto suli dofowoha, mie kalu dekala-kala, kokuli modaino donggela, kapongke dofofetingke, mie mate suli dodadi, bhe mie ngkumaasi-asi defebhihitaanda Bhihita Metaa.^a ²³Dokodawua mpuu mie tapa mongahe'i kanau hampano kandidikino lalo.”

²⁴Dokundo kaowu katuduno Yohanes maitu Yesus nopugaumo ne mie bhahi nopulao'ao Yohanes ambano, “Kala me'ondoomu ae gaha'a we pandaso bhalano endefi'ini? Me'ondo-ondoomu wulu neangko-angkonu kawea bhahaa? ²⁵Ane miina kala me'ondoomu ae bhahaa? Me'ondo-ondo mie kopakea alusuno? Mie kopakea alusuno bhe dumadi pontalabhi-labhino ingka deate weo kamali. ²⁶Kaowu kala me'ondoomu ae? Mefe'ondoomu seemie anabii? Ingka anoamo, bhahamo noliu'e anoa bhe seemie anabii. ²⁷Kapa'amo Yohanes inimo nepulao'ano wambano Kitabi aini,
 [Ambano Lahata'ala] ‘Anoamo itu katuduku,
 atudue nama'induluangko,
 naebhongkaangko kaangka'a te wisemu.’^b

²⁸Amohatokoomu, ne olotando mie lumenteno ne dhunia ini miina bhe moliuno Yohanes Fokadiuno, tamaka foliuno kahobu weo Kafapahinta'ano Lahata'ala nofoliu'e kabhala.”

^a 7:22 Yes 35:5-6, 61:1

^b 7:27 Mal 3:1

²⁹ Kosasawindo mie metingkeno pugauno na'a, notilentumo dua meala'ino sewa, do'uumbetimo patudhuno Lahata'ala, hampano padamo doowa wutondo nokadiuda Yohanes. ³⁰ Tamaka miendo Farisi bhe pande-pande Kitabi doewangi patudhuno Lahata'ala, mba'inomo dongahe nakumadiuda Yohanes.

³¹ Ambano Yesus, "Apo'ibahatiane bhe ae bhahaa mie ne dhamani aini? Apototoanda bhe ae bhahaa? ³² Andoa ini tapedamo kana-ana'i mengkoha-ngkohano ne daoa maka dopolo'o-lo'oi ambado, 'Ingka taetempaangkoomu ganda^a gaha'a miina lumindaomu, taelagu-laguangkoomu kapea, ingka miina mekangko'ae'omua.' ³³ Kapa'amo Yohanes nohato, miina naomaa miina naoho'ua, ambamiu, 'Anoa maitu nopesuakie seetani.' ³⁴ Pada ana'a Anano Manusia – Idimo ini – nohato nohumaa nofoho'u, ambamiu, 'Soba ondoomu, mie kumadau-dau bhe pande foho'u, sabhangkando meala'ino sewa bhe mie kodhosa.' ³⁵ Tamaka timbangino Lahata'ala notipande'ao kakotu'uno ne kosasawindo mie tumahimae."

Yesus nominakie seemie hobhine we lambuno Simon

7:36-50

³⁶ Seemie Farisi [konea'ano Simon] nobhasi Yesus daomaa we lambuno. Yesus nokalamo se lambuno maka nengkoha nohumaa. ³⁷ Ne kota ana'a nandoo seemie hobhine tiende-endeno mie kodhosa. Nofetingke Yesus tangasano nohumaa we lambuno mieno Farisi na'a, hobhine aitu nomaimo newowo'o kabuto-butolo kani^b nopono'ao mina-mina kawondu. ³⁸ Nohato neehe-ehemo we kundono Yesus ne owano a'eno bhe no'ae. Luuno nopotuhu ne a'eno Yesus maka no'apuleiane wuluno fotuno bhe nowonoe. A'eno Yesus na'a nominakianemo dua mina-mina kawondu sa'ituini. ³⁹ Nowoha aitu, mieno Farisi bhasino Yesus na'a nokomuntumo we lalono, "Ane anoa ini kotu-kotu'u seemie anabii, tetewei namande'aane la'ae hobhine dumampasie ini, peda ae podiuno, ingka o mie kodhosa." ⁴⁰ Pada aitu Yesus nopugaumo ne kolambuno na'a ambano, "Simon, nandoo so nefohato'aoku ne hintu." Ambano Simon, "Tapugaumo pa'aa Guru."

^a 7:32 Sakotu'u'ano: *taepuntoangkoomu suli*.

^b 7:37 Sakotu'uno o kabuto-butolo ini nomai'ao ne kontu kapute nekonando pualam.

⁴¹ Ambano toha Yesus, “Nandoo dohodua kodosano ne seemie fofodosa'aono dhoi. Seemie nokodosa lima mo'ono woka pera,^a seemieno lima fulu. ⁴²Hampano miina damondoi'e dofosulie, fofoadano na'a nofosaliemo dosando kohoduando. La'ae bhahaa ne olotando hoduanano ini so foliuno kamoasi'ao ne kodhoino na'a?” ⁴³Notobhoosimo Simon ambano, “Fenaiku mobhahi'ano dosa nefosalino sa'ituini.” Ambano Yesus, “Nokotu'u fekihimu na'a.” ⁴⁴Poowa nodoli ne hobhine na'a, Yesus nopugaumo ne Simon ambano, “Wohae bhahaa hobhine aini? Idi apesua weo lambumu, tamaka miina ma'a kanau oe so amewaniu'ao a'eku. Gaha'a hobhine aini nobhehei a'eku nopake luuno maka no'apuleiane wuluno fotuno. ⁴⁵Hintu miina wono kanau tandano dopo'awa, tamaka hobhine aini notanda apesua weo lambumu ini miina nameo-meontoa nowono a'eku. ⁴⁶Fotuku miina kumatandaane mina-mina kalandaino kafosibhalamu ne Idi, tamaka hobhine aini nominaki a'eku nepake mina-mina kawondu mo'ali'ano. ⁴⁷Dadi'anomo amohatoko, kabhalano kamoasi'aono ini nofotiwohaemo putae dhosano mobhahi'ano maitu noti'amponimo. Tamaka o mie seendai'ano dhosa ti'amponi'ano, seendai kaowu dua kamoasi'aono.”

⁴⁸Pada aitu Yesus nopugaumo ne hobhine ana'a ambano, “Dhosamu noti'amponimo.” ⁴⁹O mie sigao'ano mengkoha-ngkohanomaano bhe Yesus nokodukumo we lalondo, “La'ae bhahaa mie aini sampe ne'amponi dhosa?” ⁵⁰Tamaka Yesus nopugaumo dua ne hobhine ana'a, “Hampano parasaea ne Idi, osalamatimo. Kalamo weo katohopono lalo!”

Hobhine umondofaono Yesus

8:1-3

8 Miina naomponaa pada ana'a Yesus noliligimo kota bhe liwu nefolele Bihita Metaa Kafopahinta'ano Lahata'ala. Weo kalakalano na'a dopobhaiiane anaguhu'ino ompulu hoduanano, ²bhe hobhine'i nefeka'osano nomai'ao ne kuasano seetani bhe ne sabhaha saki. Andoa na'a Maria nekonando dua Magdalena, pada nofolimbaane fitu bansa seetani mesuakie; ³Yohana hobhineno Kusa, Susana bhe hobhine'i sigao'ano. Kusa na'a mande'aonomo kamalino kolaki Herodes. Hobhine andoa ini do'ondofao kafaraluuno Yesus bhe sabhangka'ino dopake kanandoodo wutondo.

^a 7:41 Sakotu'uno: *lima mo'ono dinar*, o dinar ponambono seemie se'oleo.

Kapalendano me'ewino wine

8:4-15

Mat 13:1-23; Mrk 4:1-20

⁴Mie bhahi dosipumpu kansuhu ne Yesus domai'ao ne sabhaha kota. Dobhahi kaowu humompuno, nopugaumo nepakeanda kapalenda. ⁵Ambano, “Nandoo seemie mekaampono nokala ne'ewi wine. Tangasano no'ewi wine maitu nandoo mondawu'ano ne kaangka'a, gaha'a doangka mie dofinda-finda'ie bhe dopadae dohumaa'e ka'uhi lumola. ⁶Siga'a nondawu ne kamo'ali, hato notumbu lasao noleleu mba'inomo miina nae'awa oe. ⁷Siga'a nondawu ne wunta-wuntano kahoku kokihi notumbu nopoowa-owa, tamaka no'onti'ie kahoku kokihi na'a ampa nomate. ⁸Sigao'ano dua nondawu ne wite menowu, hato nokobhake sampe mo'ono lentu'a kabhahino.” Pada nopugau peda na'a, Yesus nopugaumo nofekabhala suahano, “Ane dokotingala, tabeano dametingke!”

⁹Pada aitu anaguhu'ino dofeena'aomo ma'anano kapalenda sa'ituini ne Yesus. ¹⁰Anoa notobhoosidamo ambano, “Hintimiu do-wa'angkoomu kadawu so mande'ao'omu rahasioano Kafopahinta'ano Lahata'ala, tamaka mie sigao'ano dofohatoda weo kapalenda, neanomo mahingga da'umondo-ondoe pae damohaea, mahingga dametingke pae dalumosangiea.^a

¹¹Ma'anano kapalenda sa'ituini peda aini. O wine na'a bhoasano Lahata'ala. ¹²Mondawu'ano ne wiwino kaangka'a ma'anano mie metingkeno tamaka nomai Kafeompu'ando seetani noala bhoasao ana'a mai'ao weo totono lalondo keana doparasaea, keana dua dosalamati. ¹³Mondawu'ano ne kamo'ali, ma'anano mie metingkeno bhoasaono Lahata'ala na'a, lasao dotahimae bhe do'ia'ane, tamaka miina nakopahakaa weo totono lalondo. Doparasaea sebantaha kaowu, sade'awa kasabha dohunsu kaparasaeando kosowo-sowondo. ¹⁴Mondawu'ano weo kahoku kokihi ma'anano mie metingkeno bhoasaono Lahata'ala tamaka nobhahi dofekihi so kadadi'ando, so kahangkaeando bhe so kambakano namisindo. Kosasawi'ae na'a nopesua weo totono lalondo maka no'onti'i bhoasaono Lahata'ala sampe miina nakohasilia. ¹⁵Mondawu'ano ne wite menowu ma'anano mie metingkeno bhoasaono Lahata'ala, dofekataa'e mpuu weo totono lalondo metaa'ano. Andoa dopotaami kansuhu ampa dokohasili.”

^a 8:10 Yes 6:9

Kapalendano kantalea

8:16-18

Mrk 4:21-25

¹⁶Nopugaumo toha Yesus ambano, “Miina bhe mesulano kantalea maka dosongkowiane bhengki tawa dotei'e we pandano kaodo'a. Tamaka ane desula kantalea dohunsae ne kangkailao'ano neanomo kosasawindo mie mesuano weo lambu damoha tilanganono. ¹⁷Kapa'amo kosasawi'ae tifebuni'ano damotiumbae, sabhaha rahasia damekantalea'ie bhe damolelee ne mie bhahi. ¹⁸Dadi'ano mo ta'o tingalamu fekataa-taa'e! La'ae kokanandoono datumbuahiane; tamaka tapa kokanandoono, o ae maka dua nekonano kanandoono damalae.”

Inano bhe bhahitie'ino Yesus

8:19-21

Mat 12:46-50; Mrk 3:31-35

¹⁹Pada aitu dohatomo inano bhe bhahitie'ino Yesus tamaka miina damoolia dapowaane hampano kabhahindo mie. ²⁰Dofohatoemo mie ambado, “Inamu bhe bhahitie'imu deehe-ehe we simbali, gaondo dapowaangko!” ²¹Tamaka Yesus tanotobhoosi ambano, “Mie metingkeno bhe dhumalangino bhoasaono Lahata'ala, andoamo ini inaku bhe bhahitie'iku.”

Yesus nefoonto kawea mo'osa

8:22-25

Mat 8:23-27; Mrk 4:35-41

²²Se'oleo Yesus bhe anaguhu'ino dosawimo ne bhangka maka nopugauanda ambano, “Dopolimbaanaomu we sewetano!” Dadi'ano mo dobhosemo. ²³Tangasano dohela Yesus noodomo. Gaha'a tansihato'amo gahuha weo te'i na'a sampe bhangkando noi'i dewisekimo balaa. ²⁴Anaguhu'ino lasao dofowanue, ambado, “Guru, guru, dabinasamoomu.” Yesus nowanu lasao nobhoohai kawea bhe oe mamuhuno maitu, sampe dofeontomo. Oeno te'i suli nolinto. ²⁵Ambano Yesus, “Ne amai gaha'a kaparasaeamiu?” Anaguhu'ino dote'i bhe domente maka dopuga-pugau sapada-pada andoa ambado, “O mie ae bhahaa Anoa ini? Mahingga nepahintangi kawea bhe oe doangkafie!”

Yesus nefolimba seetani nomai'ao ne miendo Gerasa

8:26-39

Mat 8:28-34; Mrk 5:1-20

²⁶Yesus bhe anaguhu'ino dosedemo we liwundo miendo Gerasa we sewetano te'ino Galilea. ²⁷Safonino te wite nosumpui'emo seemie mo'ane nomai'ao ne kota aitu. Mie ana'a nopesuakie seetani; nomponamo nelembi, miina naeate weo lambu tamaka neate ne tombuno lia kafokobuhu'a. ²⁸Sanowoha Yesus nekei-keimo maka nosudhumo notaohao sombano bhe nopugau ampa kabhalano suahano, "O ae patudhumu ne idi ini, Yesus Anano Lahata'ala foliuno kuasa? Aesalo mpuu koise fodee-dee kanaua." ²⁹Kapugau'ano peda na'a mba'inomo Yesus nopenhantangi seetani na'a nalumimba namai'ao ne mie aitu. Seetani ana'a nentelamo nokuasai mie amaitu. Mbali nomuda'ao dhagani'ano dohantee bhe dolangkee, tamaka katapuno na'a nopadae nobhotulie maka nowowo'oe seetani we pada molino'ano. ³⁰Yesus nofeenamo ambano, "La'ae gaha'a neamu?" Ambano, "Neaku Legion",^a kapa'amo dobhahi seetani mesuakie. ³¹Pada peda na'a seetani maitu desalomo ne Yesus koise natumududa damesua weo ola tapa kotompa.

³²Ne itu nandoo kawaindo wewi [nekanea] tangasano doliwu te laano kabhawo. Seetani andoa na'a desalomo ne Yesus na'umunda'aanda damesuaki kawaindo wewi aitu. Yesus no'undapi kame-salondo. ³³Dadi'anomo seetani lasao dolimba mai'ao ne mie aitu maka dopesuaki kawaindo wewi na'a. Kosekawaindo wewi maitu dofilei we wiwino pimpi maka do'ohofi wutondo weo te'i sampe dolomo.

³⁴Sadowoha kadhadhia aitu, dhaga'ino wewi [kakanea] na'a lasao dofilei defolele bhihita we kota bhe liwu-liwu moma'o'ano. ³⁵Dadi'anomo miendo liwu dofisilimba-limba'amo da'umondo kadhadhia ana'a. Dohato ne Yesus, dowohamo mie nekadunsano seetani na'a nengkoha-ngkoha ne wiseno Yesus, nokopakeamo bhe nototomo. Andoa dote'i sepali'a. ³⁶Mie moha'aono wuntano matano kadhadhia amaitu dofohatomo mie bhahi peda amai mie nepesuakino seetani maitu dofosalamatie. ³⁷Pada na'a kosasawindo mie ne kadieno Gerasa maitu desalo ne Yesus nakumalamo napikihunsa'ao liwundo, kapa'amo dote'i sepali'a. Dadi'anomo Yesus nosawimo ne bhangka maka dahumela dasumuli kundodo. ³⁸Gaha'a mie nehunsano seetani na'a nesalomo ne Yesus na'umunda'aane namangkafie. Tamaka Yesus notudue nakumala ambano, ³⁹"Sulimo

^a 8:30 Ma'anano Legion setagua tantara.

se lambumu maka metula-tula'aomo sabhaha nehabuno Lahata'ala ne wutomu.” Dadi'anomo mie aitu noliligimo koseka'ewa'ae kota nopolele'ao sabhaha nehabuno Yesus ne wutono.

Yesus nofodadi anano Yairus bhe nefeka'osa seemie hobhine

8:40-56

Mat 9:18-26; Mrk 5:21-43

⁴⁰Hato nosuli, mie bhahi do'ia sepali'a dosumpui'emo hampano kosasawindo daanumo doanta-antagiemo. ⁴¹Gaha'a nomaimo seemie mande'aono lambu kasambahea'a, neano Yairus. Anoa nosudhu notaohao sombano nesalo ne Yesus nakumala se lambuno, ⁴²kapa'amo anano hobhine kaenseemie tamate'ano; umuhuno napeompulu haa ta'umo. Weo kala-kalano dahumope se lambuno Yairus, mie bhahi dopo'ua-ua ne sohihino Yesus.

⁴³Gaha'a ne itu nandoo seemie hobhine, ompulu haa ta'umo nomai'ie kansuhu wulano miina bhe katiehea. Tanopadamo kandoono nopoagoane, tamaka bhe seemie miina bhe moolie.

⁴⁴Hobhine aitu noma'oti Yesus mai'ao we kundo maka nodingku dhambeno dhubano. Gaha'a tanosimo'osa'amo, o hea nofetumpumo. ⁴⁵Ambano Yesus, “La'ae gaha'a dumingku kanau?” Tamaka miina bhe mekapunano. Dadi'anomo nopugaumo Petrus ambano, “Guru, ingka wohada kabhahindo mie lumibuko bhe umua-uako!”

⁴⁶Tamaka ambano Yesus, “Nandoo seemie dumingku kanau, kapa'amo anamisi bhe kuasa lumimba'ano mai'ao ne wutoku.” ⁴⁷Nopande'aomo lalono gaha'a habuno maitu notipande'aomo, hobhine maitu nodhulu te wise nogugue kate'ino. Lasao nosudhu notaohao sombano ne Yesus maka netula-tula ne mie bhahi noafa katidingku'ano Yesus bhe peda amai tanosimo'osa'amo. ⁴⁸Ambano Yesus ne hobhine ana'a, “Anaku, hampano kaparasaeamu ne Idi, osalamatimo. Kalamo weo katohopo.”

⁴⁹Tangasano Yesus nopugau, nohatomo seemie katudu mai'ao we lambuno Yairus bhe nopugau ambano, “Anamu nomatemo, koemo dua fekasabha Gurua.” ⁵⁰Tamaka Yesus nofetingkee, tanopugau ne Yairus ambano, “Koe tikendaa, taparasaeamo ne Idi, anamu tetewei nasumalamatimati.” ⁵¹Sahatondo se lambuno Yairus, Yesus miina na'umunda'aanda damangkafie weo lambu, ampamo Petrus, Yohanes bhe Yakobus, poowa inano bhe amano ana'i ana'a. ⁵²Kosasawindo mie dekangko'ae do'aefimo ana'i aitu. Tamaka Yesus tanopugau ambano, “Koise mo'ae'omua, ana'i aini miina namatea tamaka noodo.” ⁵³Gaha'a mie bhahi tadofuta-futaa'i Yesus kapa'amo

ana'i aitu dopande'aane nomatemo. ⁵⁴Pada ana'a Yesus nointahamo limano ana'i aitu bhe nopugau ambano, "Anaku wanu'o toha!" ⁵⁵Inawano ana'i aitu nosuli maka tanosiwanu'amo. Yesus notududamo damakandee. ⁵⁶Kamungkulano ana'i ana'a domente sepali'a, tamaka Yesus no'ele'aanda daetula-tula'ao kadhadhia aitu ne la'ae maka dua.

Yesus notudu anaguhu'ino ompulu hoduanano

9:1-6

Mat 10:5-15; Mrk 6:7-13

9 Palusi ana'a Yesus nosali'imo anaguhu'ino ompulu hoduanano, nowa'anda kuasa bhe kapooli so daefolimba'ao seetani bhe so daefeka'osa'ao sabhaha mie mosaki. ²Pada aitu notudadamo daefolele bhihita Kafopahinta'ano Lahata'ala bhe daefeka'osa mie mosaki. ³Ambano Yesus, "Koise koniwowo'oomua weo kala-kalamiu, koise mewowo'oomu katuko, tawa kakaduno bhaku bhaha'i oti tawa dhoi tawa bhadhu nahaa tuwu. ⁴Ane datumahimakoomu ne se'onu lambu, meateomu ne itu ampa humunsaomu liwu aitu. ⁵Ane pae datumahimakoomu, hunsaomu kota aitu, mahingga bungahasi ne a'emiu tantae'omu somo tandano kafodhagando." ⁶Pada ana'a anaguhu'ino dokalamo doliligi sabhaha liwu defolele Bhihita Metaa bhe defeka'osa mie mosaki ne amai maka kahato'ando.

Herodes bhe Yesus

9:7-9

Mat 14:1-12; Mrk 6:14-29

⁷Kolaki Herodes mowano kadieno Galilea aitu, nofetingke sabhaha kadhadhia ana'a. Tamaka nopoibhaha dua lalono, kapa'amo nandoo mekapunano Yohanes suli nodadi. ⁸Nandoo dua mugauno anabii Elia nofenduamo dua notiumba, maka nandoo dua mugau-no putae seemie anabii ne dhamani wawono suli nodadi. ⁹Tamaka ambano Herodes, "Yohanes ingka pada atoto'e wu'uno. La'ae bhahaa mie nefetingkeku humabuno sabhaha kadhadhia ana'a?" Dadi'ano-mo Herodes no'ulei'e lalono napo'awa bhe Yesus.

Yesus nepakande mie dolima hewu

9:10-17

*Mat 14:13-21;**Mrk 6:30-44; Yoh 6:1-14*

¹⁰Dosuli kaowu ne Yesus, rasulu detula-tulaanemo kosasawi'ae nehabundo. Yesus nowowo'odamo dagumampi ne se'onu liwu,

patudhuno tadamoisa. Neano liwu ana'a Betsaida. ¹¹Tamaka mie bhahi dopande'aane lasao doangkafie. Yesus notahimada maka nofoina'uanda Kafopahinta'ano Lahata'ala bhe nofeka'osa mie mefaraluuno katotomata.

¹²Nepanda kaowu oleo domaimo anaguhu'ino ompulu hoduano ambado, "Tududamo mie bhahi ini dasumuli, dokala'ao ne liwu-liwu bhe komie'ano ne owa ini, dae'ondofi kabutu'a bhe nehumaando. Kapa'amo intaodiomu ini we molino'ano." ¹³Tamaka Yesus tanopugau ambano, "Hintimiu so makandeda." Anaguhu'ino dotobhoosimo ambado, "Ingka roti lima onu kaowu ndumandoo'ano bhe kentano haa ulu. Bhahaa tabeano takumala tae'oli oti so mie bhahi inia?" ¹⁴Humatono ne itu mo'ane kaowu dapelima hewu kabhahindo. Nopugaumo toha Yesus ne anaguhu'ino ambano, "Tududaomu daengkoha datumombu-tombu wutondo dapelima fulu setombu." ¹⁵Anaguhu'ino doangkafi katuduno, maka kosa-sawindo mie bhahi na'a dofongkohada. ¹⁶Pada noala roti lima onuno bhe kenta haa uluno na'a, Yesus nototohanamo te lani, nefoampe katumpuno lalo ne Lahata'ala. Pada ana'a roti aitu nobhebhehaemo maka nowa'andae anaguhu'ino dadumawu-dawu-andae mie bhahi. ¹⁷Kosasawindo dohumaa ampa dowe'i. Pada dohumaa dofo'onumo kabhila'ando, nopono ompulu haa kalangka.

Kamangakuno Petrus

9:18-21

Mat 16:13-20; Mrk 8:27-30

¹⁸Sewakutuu tangasano Yesus nosambahea nomoisa domai'ie-mo anaguhu'ino. Yesus nofeenadamo ambano, "O mie dokona kanau la'ae bhahaa Idi ini?" ¹⁹Dotobhoosimo ambado, "Nandoo kumonako Yohanes Fokadiuno, nandoo kumonako dua anabii Elia, tamaka nandoo dua mugauno seemie anabii dhamani wawono suli nodadi." ²⁰Yesus nofeenadamo dua ambano, "Ane hintimiu, kona kanau'omu la'ae Idi ini?" Notobhoosimo Petrus, "Hintumo Mesias, Omputo Fosalamatino mai'aono ne Lahata'ala." ²¹Tamaka Yesus no'ele'aandamo sepali'a daekapuna ne la'ae maka dua.

Kafohato kabhao-bhaono kakadee-deeno Yesus

9:22-27

Mat 16:21-28; Mrk 8:31-9:1

²²Nopugaumo Yesus ambano, "Anano Manusia tetewei nabhahi naenamisi kakadee-dee bhe dabansie kamu-kamungkula'i, neangka'indo imam bhe pande-pande Kitabi, damongkoe maka ne katolu

oleono namanu namai'ao ne mate.”²³ Kosasawindo nofohatodamo ambano, “La'ae maka so mangkafi kanau tabeano nahumunsa kafaraluuno wutono, natumongku sau salipuno se'o-se'oleo ma'ana-no do'unda mahingga damate, maka namangkafi kanau.”²⁴ La'ae so potaami'aono inawano, namiinae inawano. Tamaka la'ae miinae-no inawa mba'inomo noangkafi Idi, tetewei namehapi dadi mpuuno.²⁵ O ae fahalaano seemie manusia nae'awa kosasawi'ae khangkaeano dhunia ini tamaka naohugi'ao inawano bhe nabinasa?²⁶ Kapa'amo ane doambano doangkafi kanau bhe kafoina'uku, Anano Manusia naoambanoane dua mie aitu humato namai weo kakalabhiano wutono bhe kakalabhiano Amano, dalumibu-libue mala'ekati mongkilono.²⁷ Amohatokoomu, kotu-kotu'u ne olotando mie meehe-eheno aitu nandoo so tapa'o mateno ane pae'o daoha Kafopahinta'ano Lahata'ala.”

Anaguhii'ino dowoha kakalabhiano Yesus te kabhawo

9:28-36

Mat 17:1-8; Mrk 9:2-8

²⁸Napealu oleo pada nofofoina'u peda na'a Yesus nowowo'omo Petrus, Yohanes bhe Yakobus dofoni te kabhawo dosambahea.²⁹ Gaha'a tangasano dosambahea ulano Yesus tanotibhaliimo, pakeano nopute kosilo.³⁰ Dotiwohamo dua mie dohodua dopotulata bhe Anoa, andoa ini anabii Musa bhe anabii Elia.³¹ Kohoduando dotiwoha weo kakalabhiando dopuga-pugau'ao takano so nedhalangino, so kamate'ano we Yerusalem.

³²Wakutuu aitu Petrus bhe sabhangka'ino dempaumo sampe doodo. Hato dowanu, gaha'a dowohamo Yesus weo kakalabhiano bhe mie hoduanano na'a deehe-ehe ne sohihino.³³ Wakutuuno mie hoduanano damealaimo Yesus, nopugaumo Petrus ambano, “Guru, netaa domai'omu ne ini! Naetaa taefoehe natolu bhantea, se'onu so Hintu, se'onu so anabii Musa bhe se'onuno so anabii Elia.” Tamaka Petrus miina namande'aane ma'anano pugauno na'a.

³⁴Tangasano nopugau peda na'a tanokaolumidamo olu. Sapesuando weo olu na'a dote'imo sepali'a.³⁵ Tanotifetingskemo dua suaha nomai'ao weo olu na'a ambano, “Ainimo Anaku nepiliku, fetingskee'omu.”³⁶ Pada dofetingke suaha na'a, anaguhu'ino dowohamo Yesus tanomoisa. Kadhadhia aini doforahasia'e, miina sepali'a daetula-tulaane newohando na'a ne la'ae maka dua.

Yesus nefeka'osa ana'i nepesuakino seetani

9:37-43a

Mat 17:14-21; Mrk 9:14-29

³⁷Nomentae kaowu [Yesus bhe anaguhu'ino totoluno] dosampumo mai'ao te kabhawo. Gaha'a dohatomo mie bhahi dobhatompa dopo'awa'ao Yesus. ³⁸Seemie ne olotando mie bhahi na'a nopugaumo nofekabhala-bhala suahano ambano, “Guru, aesalo umondo anaku, anaku ini kaenseemie ka'asi. ³⁹Tamba'omo giagi nokuasai'e seetani sampe tanopokakei-keimo. Seetani ana'a nogegoha'iane nokokida-kida bhe uluno, nokobuha-buha bhe wobhano. Sadhia nofodee-dee'e, gaono paemo sepali'a nahumunsaea. ⁴⁰Padamo dua aesalo ne anaguhu'imu damolimba seetani aini tamaka miina damondo'ea.” ⁴¹Ambano Yesus, “Pahasili hintimiu, mie tapa marasaeano bhe kolilinono totono lalo! Tana se'ae gaha'a beano so kaomponanoa aeate bhe hintimiu? Tana se'ae bhahaa so sabahaku? Owa kana'e se ini anamu itu!” ⁴²Tangasano nekala-kala nohope ne Yesus, seetani nohambita'iao ana'i aitu ne wite maka nogegohaane. Tamaka Yesus tanobhoohai seetani ana'a, nofeka'osa ana'i aitu maka nofosulie ne amano. ^{43a}Kosasawindo mie ne itu tadomente dowoha kuasano Lahata'ala kumalabhiano.

Kafohato kahaa pakuno so kakadee-deeno Yesus

9:43b-45

Mat 17:22-23; Mrk 9:30-32

^{43b}Tangasano mie bhahi maitu dopokamente-mente'ao sabhaha nehabuno, Yesus nopugaumo ne anaguhu'ino, ⁴⁴ambano, “Ta'oomu tingalamiu, tandai'omu pugauku ini. Anano Manusia daowae ne kuasano manusia.” ⁴⁵Anaguhu'ino miina damande'aanea ma'anano pugauno na'a hampano nandoo notifebuni so andoa, tapamo katilosangi'ano. Andoa miina dua daokadoa dameena'ao ma'anano pugauno na'a.

Foliuno kabhala ne olotando anaguhu'ino Yesus

9:46-48

Mat 18:1-5; Mrk 9:33-37

⁴⁶Pada peda maitu anaguhu'ino Yesus tadopotaga-tagali'aomo dua la'ae foliuno kabhala ne olotando andoa maitu. ⁴⁷Tamaka Yesus nopande'aane fekihindo. Dadi'anomo netondamo seemie ana'i kahobu maka nofoehe-ehoe ne sohihino. ⁴⁸Yesus nopugaumo ambano, “La'ae tumahimano ana'i aini weo neaku notahimamo

Idi. La'ae tumahimano Idi notahima dua Tumudu kanau. Kapa'amo foliuno kahobu ne olotamiu itu, anoamo itu foliuno kabhala.”

Seemie suano anaguhuno Yesus nefolimba seetani

9:49-50

Mrk 9:38-40

⁴⁹Nopugaumo Yohanes ambano, “Guru, tawoha seemie nefolimba seetani nopake neamu, lasao ta'ele'aane hampano suano mie mangkafino intaodiomu ini.” ⁵⁰Yesus tanotobhoosi ambano, “Koise ele'aaneomua, kapa'amo mie tapa mewangikoomu, ingka o sabhangkamiu.”

Miendo Samaria dongahe datumahima Yesus

9:51-56

⁵¹Noma'o kaowu tempono katisangke'ano te surugaa, Yesus ne'onumo lalono nakumala we Yerusalem. ⁵²Anoa nopakatumo katuduno dopa'indulukie. Katuduno maitu dokalamo dopesua ne se'onu liwundo miendo Samaria, daefotokaane sabhaha kafaraluu-no. ⁵³Gaha'a miendo liwu na'a dongahe datumahimae, mba'inomo kala-kalano nahumope we Yerusalem. ⁵⁴Dowohae kaowu peda na'a dohodua anaguhu'ino, Yakobus bhe Yohanes dopugaumo ambado, “Ompu, poindalo bhahaa taesalo efi mai'ao te lani nahumampuni'ao andoa ini?”^a ⁵⁵Tamaka Yesus nodolikida bhe nofe'alada. ⁵⁶Pada aitu dokalamo we liwu sigao'ano.

Mie so mangkafino Yesus

9:57-62

Mat 8:19-22

⁵⁷Tangasano Yesus bhe anaguhu'ino dofopansuhu kala-kalando, nopugaumo seemie ambano, “Guru, amangkafiko ne amai maka so kakala'amu.” ⁵⁸Yesus notobhoosimo ambano, “Da'u ngkahoku bhe liano, ka'uhi lumola bhe kaufeno, tamaka Anano Manusia miina sepali'a bhe katifekalaa'i'ano towuno.”^b

⁵⁹Pada aitu nopugaumo ne seemie ambano, “Angkafi kanau!” Tamaka mie aitu tanopugau ambano, “Folalesa kanau asumuli kadeki akumobuhu amaku.” ⁶⁰Tamaka Yesus nopugaumo ambano, “Hunsa'anomo mie mate dakumobuhu mie mate bhaindo, tamaka hintu kala folele bhihita Kafopahinta'ano Lahata'ala.”

^a 9:54 2Raj 1:9-16

^b 9:58 Sakotu'u'ano: *katifondole'ano fotuno*, ma'anano kafewule'ano.

⁶¹Nandoo dua seemie nopugaumo ambano, “Amangkafiko Ompu, tamaka folalesa kanau kadeki amelai ne meateno se lambuku.”
⁶²Tamaka Yesus tanopugau ambano, “La'ae tangasano melukuno maka sadoli we kundo, pae nakofahalaa weo Kafopahinta'ano Lahata'ala.”

**Yesus netudu anaguhu'ino dofitu fulu
 damolele bhoasaono Ompu
 10:1-12**

10 Palusi ana'a Ompu Yesus nepilimo anaguhuno sigao'ano dofitu fulu, maka notududa dahodua-hodua dakumala dama'indulu ne kota bhe liwu so kaangkai'ano. ²Nopugaumo ambano, “Pehapi so netobhe daanumo nobhahi, tamaka kumahadhaano dendai. Dadi'anomo mesaloomu ne kokaampono na'a, naetudu mie dakumala datumobhe. ³Kalamoomu, atudukoomu ini tapedamo anano dhumba monaleno damesua ne wunta-wuntano da'u ngkahoku. ⁴Koise mewowo'oomu kadu-kaduno dhoi, bhaku tawa kaampini we sembalino kapakemiu, koise pofende'ao'omu bhe la'ae maka dua ne laano sala.

⁵Ane mesua'omu ne lambudo mie, feabhaomu kadeki, ‘Kabarakatino Ompu so polambu aini.’ ⁶Ane ne itu bhe mie mantasino tumahimano kabarakatino kafeabhamiu, mie aitu tetewei nati-barakati. Tamaka ane paise bhe mantasino, kabarakatino nasumuli ne wutomiu. ⁷Meateomu ne lambu aitu, humaa'omu bhe fohu'omu ampa kawa'aondo, kapa'amo mie kumahadhaano nopantasi na'umawa ponambono. Koise mebhali-bhalii'omu lambu kabutu'a. ⁸Ane mesua'omu ne se'onu kota maka datumahima metaakoomu ne itu, humaa'omu ampa kawa'aondo ne hintimiu. ⁹Feka'osadaomu mie mosaki ne itu bhe fohatodaomu, ‘Kafopahinta'ano Lahata'ala noma'omo bhe hintimiu.’ ¹⁰Tamaka ane mesua'omu ne se'onu liwu maka pae datumahima metaakoomu ne itu, liligi-omu kabhongka we liwu aitu bhe mekei-keiandaomu, ¹¹‘Mahingga bungahasino liwumi mika'ano ne a'e mani, tatumantae ne wisemiu. [Aini somo kafodhagamiu, miinamo bhe tai'a mani bhe hintimiu, Ampamo kaowu pande'aaneomu Kafopahinta'ano Lahata'ala noma'omo.’ ¹²Amohatokoomu, nahumato Oleono Kiama kahukumu so ne'awa kotano Sodom nandoo naosape dapototoane bhe so ne'awano liwu aitu.”^a

^a 10:12 Kej 19:24-28

Yesus nefo'ala liwu-liwu tapa marasaeano

10:13-16

Mat 11:20-24

¹³“Balaamo hintu liwuno Korasim! Balaamo dua hintu liwuno Betsaida! Ane endefi'ini we kotano Tirus bhe Sidon nakumadhadhia tanda-tanda tapa mentela newohamui ini, tetewei nomponamo dadumoli ne Lahata'ala, daepake bhida bhe daetei abu te fotundo _ppeda katandaino dososo'ao dhosando,^a ¹⁴Tamaka nahumato Oleono Kiama, naosape kahukumuno Tirus bhe Sidon bhe kahukumu so ne'awamui. ¹⁵Hintu liwuno Kapernaum! Kuna'emu dasumangkeko te lani? Paise, tamaka da'umohoko we narakaa!”^b ¹⁶Pada aitu nopugaumo ne anaguhu'ino, ambano, _j“La'ae metingke-koomu, nofetingkemo Idi. La'ae mongahe'ikoomu, nongahe'imo Idi. La'ae mongahe'ino Idi, nongahe'imo dua Tumudu kanau.”

Anaguhu'ino fitu fuluno dosulimo

10:17-20

¹⁷Palusi aitu anaguhu'ino fitu fuluno dosulimo, do'ia sepali'a. Ambado, “Ompu, mahingga seetani doangkafi pahinta mani ane tapake neamu.” ¹⁸Nopugaumo Yesus ambano, “Awoha Kafeompu'ando seetani nondawu pasae bhibhito nomai'ao te lani. ¹⁹Ingka padamo awa'angkoomu kuasa so mefinda'i'ao'omu ule bhe sabhaha ka'uhi kobisa.^c Awa'angkoomu dua kapooli so tumalo'ao'omu kuasano kae-wamui sampe paise bhe so kobalaa'ano ne wutomui. ²⁰Ampamo kaowu koise mo'ia'omu mba'inomo seetani doangkafi pahintamui, tamaka fowula lalomui hampano neamui notibuhimo te surugaa.”

Wambano katumpuno lalono Yesus

10:21-24

Mat 11:25-27; 13:16-17

²¹Wakutuumo dua aitu Yesus nowula lalono hampano noka-bhintie Rohino Lahata'ala, maka ambano, “Notumpu laloku ne Hintu, Ama, Ompuno lani bhe dhunia, kapa'amo kosasawi'ae ini febunie ne mie kotimbangi bhe mie mande, tamaka fotiwohae ne mie ndidiki tapa kokasikolano. Daanumo Ama, pedamo aitu kapohasasi'anomo lalomu.

^a **10:13** Dhosano kotano Tirus bhe Sidon, ondo Yes 23:1-18; Yeh 26:1 - 28:26

^b **10:15** Yes 14:13,15

^c **10:19** Sakotu'u'ano: *wa'ati-atikoho*.

²²Kosasawi'ae padamo nowa'a kana'e Amaku. Miina bhe mande'aono Anano Lahata'ala mpahinomo Amano. Miina dua bhe mande'aono Amano mpahinomo Anano, bhe kosasawindo mie ne'unda'aono Anano Lahata'ala damande'ao Amano.”

²³Pada aitu nodolikimo anaguhu'ino bhe nopugau, “Kakodawuamiu hampano wohaomu newohamiu ampa aitu. ²⁴Kapa'amo amohatokoomu, dobhahi anabii bhe kafeompu'a endefi'ini gaondo damoha newohamiu ampa aitu, tamaka miina damohaea. Gaondo dametingke nefetingkemi aitu, tamaka miina dametingkea.”

Mieno Samaria metaano lalo

10:25-37

²⁵Sewakutuu noehemo seemie pande Kitabi nomanso'alai Yesus. Ambano, “Guru, aeafa so ae'awa'ao dadi suhue dhamani?” ²⁶Yesus notobhoosimo ambano, “O ae tibuhi'ano weo Kitabino Musa? O ae nebasamu weo Kitabi na'a?” ²⁷Ambano mie ana'a, “Moasiane Ompu Lahata'alamu sampuu-mpuuno lalomu, sampuu-mpuuno alusumu, sampuu-mpuuno ka'osamu, sampuu-mpuuno fekihimu, bhe moasianda mie bhaimu peda kaasimu ne wutomu.”^a ²⁸Ambano Yesus, “Ingka anoamo katobhoosimu itu, angkafimo aitu maka tetewei dumadi.” ²⁹Tamaka mie aitu no'ondofi kakantibhano wutono, ambano, “La'ae bhahaa mie bhaiku?”

³⁰Yesus notobhoosiane kapalenda ambano, “Nandoo seemie no-sampu nomai'ao we Yerusalem nohope we Yeriko, gaha'a no'awae karampasi we sala. Barano dopadae doala'ie, mieno dolandakie maka dofilei tadohunsamo olotano dadi bhe mate. ³¹Miina naomponaa tanosiangka'amo seemie imam. Gaha'a sanowoha mie aitu tanolalo noangka se wiwino sala sewetano. ³²Pedamo dua na'a noangkamo seemie sampu'ano Lewi, o palima-limano imam. Gaha'a sanowoha mie aitu tanolalo dua noangka se wiwino sala sewetano. ³³Kaowu noangkamo seemie Samaria^b nakokakala'a, sanowoha mie aitu nobhelaane lalono. ³⁴Nokala'iemu maka nokakompo kakobhela-bhelano, nobubusiane mina bhe anggurunu. Pada ana'a nofosawie ne keledai kasawi'ano wutono maka noowae ne se'onu lambu kabutu'a bhe nokomadia'ane. ³⁵Nopooli nome-ntae nealamo haa woka dhoi pera maka nowa'ane kolambuno

^a 10:27 Im 19:18, Ul 6:5

^b 10:33 Miendo Samaria bhe miendo Yahudi miina sepali'a dapometaa'a.

kabutu'a na'a bhe nopugau ambano, 'Komadia'ane, ane bhe nebhalanda'aomu sigao'ano, mada'o amosuliangkoe humato asumuli.' ”

³⁶ Pada aitu Yesus nofeenamo ne pande Kitabi maitu ambano, „Weo fekihimu, la'ae bhahaa ne olotando mie totoluno na'a membalino mie bhaino so mie ne'awando karampasi sa'ituinia?”
³⁷ Ambano pande Kitabi na'a, “Mie motiwohaane kabhelano lalo.”
 Ambano toha Yesus, “Kalamo, habumo dua nada na'a!”

Yesus we lambuno Maria bhe Marta

10:38-42

³⁸ Weo kala-kalano bhe anaguhu'ino, Yesus nohatomo ne se'onu liwu. Ne itu seemie hobhine notahimada weo lambuno, neano Marta. ³⁹ Marta bhe hobhine kakuta'ano, neano Maria. Maria nengkoaha-ngkoaha ne owano a'eno Ompu, nofetingke kansuhu pugau-no, ⁴⁰ tamaka Marta nosabha noehe mengkoaha no'ondofaanda. Dadi'anomo noma'otimo Yesus bhe nopugau ambano, “Ompu, miina moheruanea gaha'a Maria nohunsu kanau aehe mengkoaha amoisa? Fohatoe natumulumi kanau.” ⁴¹ Tamaka Ompu tanoto-bhoosimo ambano, “Marta, Marta, hintu ini nomihilalomu bhe fekasabha wutomu ne sabhaha giu. ⁴² Ingka ampamo sehonda maraluu'ano. Maria nopilimo metaa'ano, maka paise damalae mie bhaindo.”

Yesus nofoina'u anaguhu'ino dosambaheha

11:1-13

Mat 6:9-13; 7:7-11

11 Sewakutuu Yesus nosambaheha. Pada nosambaheha nopugaumo seemie anaguhuno ambano, “Ompu, foina'u kainsami tasumambaheha peda Yohanes Fokadiuno nofoina'u anaguhu'ino.” ² Notobhoosidamo Yesus ambano, “Ane sumambaheha'omu, pugau'omu nada ini:

Ama, notifosibhala'o toha neamu,
 nohato'o toha Kafopahinta'amu.

³ Wa'a kainsami nehumaa kafaraluu mani se'o-se'oleo.

⁴ Amponie sabhaha dhosa mani,
 kapa'amo insaodi tama'afu'ao dua koka'alano ne
 insaodi.

Koise folapasa kainsami ne sabhaha kasoba.”

⁵ Pada ana'a Yesus nopugaumo dua ambano, “Ane ibahano nandoo ne olotamiu itu seemie ne kafewunta'ino alo nakumala we

lambuno sabhangkano maka namugau, ‘O bhahitie, foada kanau rotimu natolu onu. ⁶Kapa'amo bhe sabhangkaku weo kala-kalano noangka se lambu maka miina tako'ae-aea so naomaa.’ ⁷Koasimo dua mieno lambu na'a tanapugau, ‘Koise hungga-hunggai kanau, fointo noti'ontomo, ana'iku bhe wutoku taodomo, pae naembalia amanu ama'angko roti.’ ⁸Amohatokoomu, mahinggamo kolambuno na'a nongaha namanu maka nama'ane roti mba'inomo doposabhangka, tamaka hampano nokiido naoambano, tetewei kolambuno na'a namanu maka nama'ane kafaraluuno.

⁹Dadi'anomo amohatokoomu, tamesalomo, tetewei dama'angko; ta'ondofimo, tetewei po'awaane; tamekatengkimo fointo, tetewei dalumengkaangko. ¹⁰Kapa'amo sasuka mesalono naetahima, sasuka me'ondofino naepo'awa'ao, bhe sasuka mekatengkino fointo dalumengkaane.

¹¹Nandoo bhahaa ne olotamiu itu seemie ama ane anano nesalo kenta tanowa'ao ule so kalolino? ¹²Tawa ane nesalo unteli tanowa'ao wa'ati-atikoho? ¹³Dadi'anomo sanginomo hintimiu mie modai pandemoomu wa'ao'omu metaa'ano ne anamiu, bhemo toha Amamiu te surugaa! Anoa nama'ao Rohino ne la'ae maka dua mesaloi'e.”

Yesus bhe Beelsebul

11:14-23

Mat 12:22-30; Mrk 3:22-27

¹⁴Sewakutuu Yesus nefolimba seetani mefekabhongano mie. Salimbano seetani ana'a, mie bhonga aitu nopandemo netula-tula sampe mie bhahi tadomente. ¹⁵Tamaka nandoo mugauno, “Anoa ini nefolimba seetani nopake kuasano Beelsebul, Kafeompu'andomo seetani.”

¹⁶Nandoo dua mesalono ne Yesus namotiwohaanda tanda tapa mentela so katandaino kuasano nomai'ao ne Lahata'ala, tamaka patudhundo damanso'alai'e. ¹⁷Tamaka Yesus nopande'aane fekihi-ndoa lasao nopugau ambano, “Ane se'onu kakolaki'a pae dase'ise tamaka sadhia dopoewa-ewangi tetewei nabinasa, pedamo dua ane se'onu polambu pae dase'ise tamaka sadhia dopogiha-giha tetewei nahumansuru. ¹⁸Dadi'anomo ane weo kafopahinta'ano Kafeompu'ando seetani pae dase'ise, dapoewa-ewangi sanea-nea andoa, nada amai naentara dua kafopahinta'ano seetani na'a? Kapugau'aku peda ana'a, kapa'amo ingka ambamiu aefolimba seetani apake kuasano Beelsebul. ¹⁹Dadi'anomo ane aefolimba

seetani apake kuasano Beelsebul, anaguhu'imiyo depake kuasa la'ae defolimba seetani? Dadi'anomo nehabundo maitu katandainomo ka'alano fekihimiyo. ²⁰Tamaka ane aefolimba seetani apake kuasano Lahata'ala, sakotu'uno nohatokoomu Kafopahinta'ano Lahata'ala.

²¹Ane mie mo'osa nosangka bhe ewangano nodhagani lambuno wutono, teteweimo sabhaha fehebua'ano natohopo. ²²Ampamo kaowu nahumato seemie lumiyo'e ka'osa maka napoewangiane bhe natumaloe, tetewei sabhaha katokano ewangano netangka'aono narumampasie maka sabhaha fehebua'ano nerampasino nadumawudawue.^a

²³La'ae tapa pobhaino bhe Idi noewangi kanau. La'ae tapa humamba kanau taefohompu mie, mie aitu mehabuno pogasagasa'ando mie.”

Seetani nosuli kundo

11:24-26

Mat 12:43-45

²⁴“Ane seetani nolimba nomai'ao ne manusia, tanolilimo ne wite mokekele ne'ondofi kabutu'ano, tamaka miina nae'awaa. Dadi'anomo ambano, ‘Naetaa asumuli we lambuku kahunsa'aku.’ ²⁵Hato nosuli ne itu, gaha'a lambu ana'a nonggelamo bhe notifosintuwu. ²⁶Pada ana'a nosulikimo sabhangkano dopipitu maka dopesua deate ne itu. Seetani bhai'ino maitu dofoliyo'e dua kadaindo. Panda-pandano mie aitu sedhulu'a dua kadahano bhe pakatandano.”

Mie kodawuano mpuu

11:27-28

²⁷Tangasano Yesus nopugau, nokeimo seemie hobhine ne olotando mie bhahi na'a, “Nokodawua mpuu hobhine mowoowako bhe motitiko.” ²⁸Tamaka Yesus tanopugau ambano, “Uumbe, tamaka sedhulu'a kakodawuando metingkeno bhoasaono Lahata'ala bhe doangkafie.”

Tandano kumadhadhiano ne anabii Yunus

11:29-32

Mat 12:38-42

²⁹Tangasano dolibu-libue mie bhahi maitu Yesus nopugaumo ambano, “Mie dhamani aini nodai diundo. Andoa desalo se'ise tanda tapa mentela tamaka paise dama'anda ampamo kaowu

^a 11:22 O mie mo'osa ini ka'ibahatino seetani; mie tumaloe ka'ibahatino Yesus.

tandano kumadhadhiano ne anabii Yunus. ³⁰Hampano pedamo anabii Yunus padamo nembali tanda so miendo kota Niniwe, nadamo dua aitu Anano Manusia naembali tanda so mie dhamani aini.^a ³¹Nahumato Oleono Kiama, omputo hobhine mai'aono we Salata namai nasiwanu'a bhe mie dhamani aini maka namo'alada. Kapa'amo omputo hobhine aini nomai'ao we tompano dhunia nametingke kafoina'u kotimbangino omputo Salomo. Sakotu'uno humatono ini noliu'e omputo Salomo.^b ³²Nahumato Oleono Kiama, miendo Niniwe dasiwanu-wanu'a bhe mie dhamani aini maka damo'alada. Kapa'amo miendo Niniwe dofetingke kaowu bhihita neowano anabii Yunus, dofetompa'aomo dhosando bhe dodoli ne Lahata'ala. Sakotu'uno humatono ini noliu'e anabii Yunus.”

Kantaleano mbadha

11:33-36

³³“Bhe naseemie miina bhe mesulano kantalea maka nahumunsae we wawa tawa nosongkowiane bhengki, tamaka tewei dohunsae ne kangkailao'ano, neanomo sasuka mie mesuano weo lambu damoha tilangano. ³⁴O mata kantaleanomo mbadhamu. Ane netaa matamu, nentaleamo dua mbadhamu; tamaka ane nodai matamu, nohohondomo dua mbadhamu. ³⁵Dadi'anomo posi'ondoomu, bhasasaa nahohondo tilanga ne wutomiu itu. ³⁶Ane mbadhamu nentalea, miinamo bhe mohohondo'anoa, maka kose'ulu-ulumi nentalea sepali'a, pasae notila-tilakoomu kantalea.”

Yesus nefe'ala miendo Farisi bhe pande-pande Kitabi

11:37-54

Mat 23:1-36;

Mrk 12:38-40; Luk 20:45-47

³⁷Nopalusi nofofoina'u, Yesus nosali'iemmo seemie Farisi daomaa se lambuno. Dadi'anomo Yesus nokala se lambuno maka nengkohe nohumaa. ³⁸Gaha'a miendo Farisi na'a tanomente nowoha Yesus tanohumaamo miina naewanu deki peda atorano agama. ³⁹Tamaka Ompu nopugaumo ambano, “Hintimiu miendo Farisi fewaniu'omu kundono kampomaa'a bhe kampoho'u'a tamaka we totono lalomiu nopono'ao kasaohi buku bhe podiu modai. ⁴⁰Hintimiu bhohe, ingka Lahata'ala mokonandoono tiwoha'ano we simbali, Anoamo dua mokonandoono meate'ano weo totono lalo. ⁴¹Ampamo kaowu,

^a 11:29-30 Yun 3:4-5

^b 11:31 1Raj 10:1-10, 2Taw 9:1-12

i'ino kampomaa'a bhe kampoho'u'a tabeano podawu-dawuomu dua bhe mie mokae. Ane nada ana'a naonggelamo kosasawi'ae, naetaa mbadhamiu naetaa totono lalomiu.

⁴²Tamaka balaamoomu hintimiu miendo Farisi, kapa'amo ta'o-lentu-lentuomu pehapimiu mohobu'ino peda sabhaha kagule^a femopulu dawue'omu maka sedawu gaatiemoomu so kapopanga ne Lahata'ala.^b Gaha'a o ka'adhili bhe kaasi ne Lahata'ala miina komamianeomu. Haa hondano aini tetewei dhalangie'omu, tamaka atorano agama koise dua molimpu'aneomua.

⁴³Balaamoomu hintimiu miendo Farisi kapa'amo weo lambu kasambahea'a moasianeomu sepali'a mengkohaomu ne kaengkoha'ando kabhala, moasianeomu dua sepali'a dofosibhalakoomu we wuntano daoa. ⁴⁴Balaamoomu, kapa'amo hintimiu nopototo bhe kobuhu tapa kokatandai, mie mangkano te wawono tadofinda-finda'imo miina damande'aanea.”

⁴⁵Seemie pande Kitabi notobhoosimo ambano, “Guru, pugau peda na'a ingka feka'aebumo dua bhe insaodi.” ⁴⁶Tamaka ambano Yesus, “Balaamoomu hintimiu pande-pande Kitabi, kapa'amo sabhaha tubho nehabumiu tapeda wowo'o mobhie nefotongkumiu ne mie bhaimiu, gaha'a wutumiu mongaheomu bhe dumingkue'omu. ⁴⁷Balaamoomu, kapa'amo mefekakesaomu kobuhundo ana-anabii, gaha'aitu awua'imiu mongkoda. ⁴⁸Habumiu na'a nokoma'ana'ao aku'omu dua podiundo awua'imiu moasianeomu, kapa'amo awua'imiu na'a mongkono ana-anabii andoa na'a maka hintimiu mekakesano kobuhundo. ⁴⁹Dadi'anomo Lahata'ala kotimbangino nokobhoasao ambano, ‘Aetudu ana-anabii bhe rasulu'i dakumala se andoa, siga'a damongkoda bhe damodee-deeda.’ ⁵⁰Kanandoo'ano peda ana'a neanomo mie dhamani aini damotongkuanda ka'ala defolimba heando kosasawindo anabii mpini pakatifokonandoono dhunia. ⁵¹Ma'anano notanda ne katipongko'ano Habel ampa ne katipongko'ano Zakaria, nepongkondo ne kadeteno Lambuno Lahata'ala ne olotano medha kaefoampe'a bhe Boloku mongkilo.^c Amohatokoomu dua, kosasawi'ae ka'ala na'a damotongkuandae mie dhamani aini.

⁵²Balaamoomu hintimiu pande-pande Kitabi, kapa'amo hintimiu mintahano kunsino fointono kapande ma'anano kafoina'u so

^a 11:42 Sabhaha kagule, sakotu'uno: *selasi, inggu bhe sabhaha kambulu.*

^b 11:42 Im 27:30

^c 11:51 Habel Kej 4:8; Zakaria 2Taw 24:20-22

dasumalamati'ao, Gaha'a wutomiu kiido mesua'omu bhe mie mo-indalono mesuano onto-ontomidaomu.”

⁵³Nokala kaowu nomai'ao ne itu pande-pande Kitabi bhe miendo Farisi dopoewangianemo sepali'a bhe doangka-angkafiane kansuhu sabhaha kafeena. ⁵⁴Patudhundo dakumabua alano wambano, somo tingkundo dahumakoe.

Kafoina'u kafepuuni so anaguhu'ino Yesus

12:1-12

Mat 10:26-33, 19-20

12 Wakutuu ana'a nehewundo mie dopohato-hatomo tado-pogua-guamo. Yesus netandakimo nofofoina'u, kabhao-bhaono nopugaumo ne anaguhu'ino ambano, “Posi'ondoomu bhe kodhagaomu ne ragindo miendo Farisi, ma'anano kafehaa'ulando. ²Kapa'amo kosasawi'ae tifebuni'ano damotiumbae, sabhaha ti-songkowi'ano dalumengkae. ³Dadi'anomo pugaumiu kohondo'a natifetingke ole-oleo, nepokamuntui'aomiu weo boloku damolelee ne mie bhahi.

⁴Hintimiu sabhangka'iku, amohatokoomu, koise mote'iomu ne mepongkono mbadha, hampano namada ana'a paemo daeafa-afaa. ⁵Amohatoangko'e'omu so nemote'imiu. Mote'iomu Lahata'ala, kapa'amo pada nofopongko, nokokuasa dua nofo'oho we narakaa. Kotu-kotu'u amohatokoomu mote'iomu ne Anoa.

⁶Ingka dopande'aanemo o rone doasoe lima ulu haa dhoi, tamaka mahinggamo peda na'a bhe nase'ulu miina bhe nemolimpu'aono Lahata'ala. ⁷Hintimiu itu bhemo wuluno fotumiu dopadae do'epie. Dadi'anomo koise mote'iomu, noliu'e kako-fahalaamiu bhe kawaindo rone.

Koemo dote'i dopugau doangkafi Yesus

12:8-12

Mat 10:32-33, 12:32, 10:19-20

⁸Amohatokoomu, la'a-la'ae pugauno ne wisendo manusia putae noangkafi Idi, Anano Manusia, asumakusiiane dua te wisendo mala'ekatino Lahata'ala. ⁹Tamaka la'a-la'ae gumagano ne wiseno manusia putae anoa miina namangkafi Idi, agumagai'e dua ne wiseno mala'ekatino Lahata'ala. ¹⁰Ane o mie nopahampugau noewangi Anano Manusia, nati'amponi; tamaka ane dopahampugau dofe-ka'aebu Rohino Lahata'ala paise nati'amponia.

¹¹Ane daowakoomu weo lambu kasambahea'a dabhitahakikoomu, ne wisendo pamarinta tawa ne wisendo kabhala, koemo

nekenda-kenda handamiu bhaha'i nada amai potundu'ao wutomiu tawa pugau'ao'omu ae. ¹²Kapa'amo wakutuu aitu dua namoina'u-koomu Rohino Lahata'ala o ae so nepugau'aomiu.”

Kapalendano mie hangkaea kumabhohe-bhoheno

12:13-21

¹³Nopugau seemie ne olotando mie bhahi na'a ne Yesus ambano, “Guru, fohato kanau isaku nadumawu kanau dua kahunsa'ao-no ama mani.” ¹⁴Tamaka Yesus tanotobhoosi ambano, “Lamo'ane, la'ae bhahaa sumangke kanau so bhitahakikoomu tawa so dumawuno kahunsa'aomiu?” ¹⁵Ambano toha Yesus ne mie bhahi, “Posi'ondoomu bhe kodhagaomu ne sabhaha kakadau-dau, kapa'amo mahinggamo mie napontalabhi-labhi kahangkaeano, dadino miina naeate ne kahangkaeano na'a.”

¹⁶Pada aitu nopugaumo nepakeanda kapalenda ambano, “Nandoo seemie hangkaea, pehapino witenno nopontalabhi-labhi. ¹⁷Nokodukumo lalono, ‘Aeafamo bhahaa, ingka miinamo bhe lambu so katihompu'ano pehapiku ini?’ ¹⁸Ambano toha mie ana'a, ‘Nada ini so nehabuku. Ahumunggada bhantea kaehompu'aku pehapi ini maka aefohe guda sedhulu'ano kabhala'i, ne itumo so katihompu'ano kosasawi'ae paeku bhe sabhaha fehebua'aku. ¹⁹Mada aitu amugaumo ne wutoku, “Hintu itu nobhahimo kanandoomu, tane-kanta-kantawumo pae bhe kawoloa ntini ta'u-ta'u. Fewule'o toha, humaa foho'u, fekataa'i namisimu!” ²⁰Tamaka Lahata'ala nokobhoasaomo ne mie ana'a, ‘Hintu mobhohe, alo aini dua inawamu damalaemo, maka kanandoo nefontaa-ntaamu itu so la'ae bhahaa?’ ²¹Nadamo aitu so netompaloino mie mefo'onuno kahangkaea so wutono, tamaka miina nahumangkaea ne pomatano Lahata'ala.”

Kamihino lalo

12:22-34

Mat 6:25-34, 19-21

²²Yesus nopugaumo ne anaguhu'ino ambano, “Dadi'anomo amohatokoomu, koise nomihini lalomiu ne kadadi'amiu bhaha'i momaa'omu ae, koise dua nomihini lalomiu ne mbadhamiu bhaha'i mepakeomu ae. ²³Ingka noliu'e dadi ini bhe oti, noliu'e dua mbadha bhe pakea. ²⁴Soba fe'o-fe'ondoomu kaa maitu, miina dahumooa miina dakumapea, miina dua dakobhantea tawa o a'u so kaefo'onu'ano pehapi, tamaka nopakandeda Lahata'ala. Ingka foliuda hintimiu bhe ka'uhi lumolano maitu. ²⁵La'ae bhahaa ne

olotamiu itu hampano kamihino lalo namooli namodhulu dadino naseendai kaowu? ²⁶Dadi'anomo ane giu mohobuno pedando na'a pae mondoi'eomu mehabuomu, noafa nomihia'ao lalomiu ne giu sigao'ano?

²⁷Soba fe'o-fe'ondo kambeano kuni, miina dakumahadhaa, miina dua damoohu. Tamaka omputo Salomo foliuno kahangkaea maitu, pakeano miina naehatoa ne kakesano kamba-kamba aitu! ^a ²⁸Kahoku tumumbu'ano we pada oleo itu, namentae datumawuemo. Sanginomo kahoku maitu nolegasiemo Lahata'ala, bhemo toha hintimiu. Kakuhano dua kaparasaeamiu! ²⁹Dadi'anomo koise fekihiomu kansuhu o ae so nehumaamiu, o ae so nefoho'umiu pakade koise nekenda-kenda handamiu. ³⁰Kosasawi'ae na'a nefosibhalandomo sabhaha bansano liwu ne dhunia ini tapa mande'aono Lahata'ala. Tamaka Amamiu nopande'aane kosasawi'ae na'a ingka faraluu'eomu. ³¹Ampamo kaowu ondofiomu kadeki Kafopahinta'ano Lahata'ala maka kosasawi'ae kafaraluumiu na'a nama'angkoe'omu dua.

³²Hintimiu pata bhabhahino, koise mote'iomu! Kapa'amo Amamiu nopindalomo nosangkekoomu so mieno Kafopahinta'ano. ³³Asopie'omu fehebu'amiu maka dhoino wa'andae mie mokae! Mehabuomu kadu-kaduno dhoi so tapa molusa'ano, ma'anano kahangkaea te surugaa tapa mowoowolono. Kahangkaea ana'a paise nahumatoe kasibu, paise dua naomaa'e faa. ³⁴Kapa'amo ne amai kanandoo'ano kahangkaeamiu, ne itu'aemo dua totono lalomiu."

Bhatua sadhia mantaa-ntaano

12:35-40

³⁵Ambano toha Yesus, "Naetaa meate mantaa-ntaa'omu so kahato'aku. Sadhia mekawaweomu bhe kantaleamiu sahende, ³⁶peda mie ntumaa-ntaano kafeompu'ando nomai'ao we hamehameno kagaa. Ane nasumuli kafeompu'ando na'a maka naekatengki fointo lasao dalumengkaane. ³⁷Dokodawua mpuu bhatua nehatofino kafeompu'ando nandoo demboto bhe dodhaga. Amohatokoomu, kotu-kotu'u kafeompu'a aitu nalumoli pakeano maka napugauanda bhatuano na'a daengkoha bhe naetaganaanda daomaa. ³⁸Ane nahumato kafewunta'ino alo tawa nama'o kamentae maka nahumatofida dodhaga, dakodawua mpuu bhatua andoa

^a 12:27 1Raj 10:4-7; 2Taw 9:3-6

maitu. ³⁹Tamaka naetaa mande'aaneomu, ane kolambuno namande'aane hambi se'ae so hato'ano kaso'o, teteweimo pae tanakumatahomoa lambuno dalumeloe. ⁴⁰Dadi'anomo hintimiu mantaa-ntaa'omu dua, kapa'amo Anano Manusia nahumato ne waktuu pata nepotu-potulu'ao.”

Bhatua motuhuno lalo bhe tapa motuhuno lalo

12:41-48

Mat 24:45-51

⁴¹Nopugaumo Petrus ambano, “Ompu, patudhuno kapalenda na'a so insaodi kaa so kosasawindo manusia?” ⁴²Ambano Ompu Yesus, “Kaowu la'ae bhahaa mie mande'aono lambuno kafeompu'ano motuhuno lalo bhe kotimbangino maitu? Anoamo maitu so ne-sangkeno kafeompu'a so neangkando kosasawindo bhatua so metaganaanda daomaa napobutu bhe tempono. ⁴³Nokodawua mpuu bhatua na'a ane nohatofie kafeompu'ano tangasano noala'i gunano. ⁴⁴Amohatokoomu, kotu-kotu'u kafeompu'a na'a nasumangke bhatua aitu somo mande'aono sabhaha fehebua'ano. ⁴⁵Ampamo kaowu ane bhatua na'a nokoduku we lalono, ‘Ingka kafeompu'aku nandoo naompona maka nasumuli’, maka namepeki bhatua sigao'ano namo'ane nahobhine, naomaa bhe naoho'u sampe nalolanu. ⁴⁶Gaha'a kafeompu'ano tamba'omo nahumato ne oleo tapa nepotu-potulu'ao, ne tempo tapa nenamu-namu. Bhatua ana'a namehaakebhae, kahukumu napototoane bhe mie pata meangkano ne Lahata'ala. ⁴⁷Seemie bhatua mande'aono kapoindalono kafeompu'ano tamaka miina namantaa-ntaa tawa miina nadhumalangiea, naobhahi nae'awa kabhebhe. ⁴⁸Tamaka seemie bhatua tapa mande'aono kapoindalono kafeompu'ano maka nehabu ka'ala sampe nopantasimo dabhebhee, seendai nae'awa kabhebhe. Kapa'amo mie metahimano nobhahi, naobhahi dua datumuntue; mie neposahuna'aono nobhahi, naobhahi dua so nesonso ne anoa.”

Yesus neowa kapowengke'a

12:49-53

Mat 10:34-36

⁴⁹“Hatoku ini ae'o'ho efi we dhunia ini; gaoku mpuu efi aini nohendemo! ⁵⁰Idi ini tetewei aenamisi kakadee-dee,^a nosabha sepali'a handaku ane pae'o namalusi kakadee-dee ana'a. ⁵¹Kuna'emiu hatoku ini aeowa pometaa te dhunia ini? Miina

^a 12:50 Sakotu'uno: *o kakadiu*.

sepali'a! Amohatokoomu, suano pometaa'a, tamaka powengke-wengke'a. ⁵²Kapa'amo notanda aitu, ane dolidima weo polambu dapowengke-wengke, totoluno damewangi hoduano, hoduano damewangi totoluno. ⁵³Amano namewangi anano mo'ane, ana mo'ane namewangi amano. Inano namewangi anano hobhine, ana'i hobhine namewangi inano. Kamungkula hobhine namewangi poniano hobhine, ponia hobhine namewangi kamungkulano hobhine.”

Damande'ao tandano dhamani

12:54-59

Mat 16:2-3

⁵⁴Yesus nopugaumo dua ne mie bhahi maitu ambano, “Ane wohaomu olu nofoni we bhaha lasao pugau'omu, ‘Ingka nako'use’, maka kotu-kotu'u noko'use. ⁵⁵Ane wohaomu kawea nofinda salata, ambamiu, ‘Naombena oleo se'oleo itu’, maka kotu-kotu'u nombena. ⁵⁶Hintimiu mie mehaa'ulano! Tanda-tanda te lani bhe we dhunia pande'aane ma'anakie'omu. Koasimo dua miina mande'aane ma'anakiomu tanda kumadhadhiano ne dhamani aini!

⁵⁷Koasi'amo dua miina mondoi'eomu mebhotusi'ao'omu wuto-miu medando ae kumotu'u'ano? ⁵⁸Kapa'amo ane bhe so mobhie-angko te wiseno kabhala, ulei lalomu pometaa'ane tinangke we laano sala. Ane paise kaewamu itu nabuluko ne wisendo pande bhitaha, maka pande bhitaha na'a namowako ne limano dhagano katohongku maka anoa na'umohoko weo katohongku. ⁵⁹Amohatokoomu, kotu-kotu'u paise sepali'a damolimbako ane pae'omomea'e kosasawi'ae dosamu.”

Dhosa bhe kakadee-dee

13:1-5

13 Wakutuu ana'a dohatomo seemie hodua ne Yesus. Andoa ini deowaane bhihita miendo Galilea nepongkono Pilatus tangasano deowa kapopanga ne Lahata'ala, heando noposalomo bhe heano kadadi nesumbelendo mbali kapopanga. ²Notobhoosimo Yesus ambano, “Kuna'emiu miendo Galilea na'a nofoliu kabhie-no dhosando bhe kosasawindo miendo Galilea sigao'ano hampano kadaino kolaundo na'a? ³Amohatokoomu, miina sepali'a. Ampamo kaowu, ane pae metompa'ao dhosamiu, kosasawimiu itu binasaomu dua nada andoa na'a. ⁴Pedamo dua mie ompulu aluno mateno notabuhikida menara kontu we owano Siloam. Kuna'emiu

nofoliu kabhalano ka'alando bhe kosasawindo meateno we Yerusalem? ⁵Amohatokoomu, miina sepali'a. Ampamo kaowu, ane paise metompa'ao dhosamiu, kosasawimiu itu binasaomu dua nada andoa na'a."

Kapalendano pu'uno ara tapa kobhake

13:6-9

⁶Pada ana'a Yesus nepakeanda kapalenda ambano, "Nandoo see-mie bhe pu'uno arano notumbu weo kaampono anggurunu. Se'oleo nomai no'ondo bhakeno gaha'a miina naewohaa maumo nase'onu. ⁷Nopugaumo ne dhagano kaampono anggurunu, 'Tolu ta'umo amai a'ondo bhakeno pu'uno ara aini, tamaka miina akoni'awaa. Nae-taa tu'oemo, ingka nefekatembe kaowu wite.' ⁸Ambano dhagano kaampono na'a, 'Waompu, hunsa'anomo kadeki ta'u aini. Mada'o asuma'erae witenno maka ahumewutie, ⁹bhaha'i kaowu ta'u te wise ini nakobhakemo. Ane paise ingka datumu'oemo.' "

Yesus nefeka'osa mie mosaki ne oleono Sabat

13:10-17

¹⁰Sewakutuu ne oleono Sabat Yesus tangasano nofofoina'u ne se'onu lambu kasambahe'a. ¹¹Ne itu nandoo seemie hobhine ompulu alu ta'umo nopesuakie seetani sampe nosaki. Nobungku-mo towuno, miinamo sepali'a namoolia noehe nofekalaa. ¹²No-woha hobhine amaitu Yesus nolo'oi'emo bhe nopugau ambano, "Wa'ina mo'osaanemo sakimu itu." ¹³Pada aitu noteimo limano ne hobhine ana'a. Hobhine aitu lasao noehe nofekalaa maka nofe-kakalabhia Lahata'ala.

¹⁴Tamaka mie mande'aono lambu kasambahe'a na'a nohehewu lalono mba'inomo Yesus nefeka'osa mie mosaki ne oleono Sabat. Anoa nopugaumo ne mie bhahi ambano, "Nandoo nomo oleo so dakoguna'ao, dadi'anomo mai'omu dameka'osakoomu ne nomo oleono na'a, sumanomo koise ne oleono Sabat." ¹⁵Tamaka Ompu Yesus notobhoosiemu ambano, "Hintimiu mie mehaa'ulano! Ingka kosasawimiu ini sadhia lenseomu sapi tawa keledaimiu maka tondae'omu we simbali fefoho'utie'omu, mahingga ne oleono Sabat. ¹⁶Ingka hobhine aini sampu'ano dua Abraham. Gaha'a ompulu alu ta'umo nogogantue Kafeompu'ando seetani. Dadi'anomo da-lumensee tabeano, mahingga ne oleono Sabat." ¹⁷Pugauno Yesus

na'a doambanoane kosasawindo mewangie, tamaka mie bhahi do'ia sepali'a mba'inomo sabhaha kakalabhia nehabuno.

Kapalendano onuno wonoita bhe ragi

13:18-21

Mat 13:31-33; Mrk 4:30-32

¹⁸Yesus nopugaumo toha ambano, “Dapototoane bhe ae bhahaa Kafopahinta'ano Lahata'ala maitu? Amalendaane ae bhahaa so metaa'anoa? ¹⁹Kafopahinta'ano Lahata'ala tapedamo onuno sau wonoita se'onu^a noalae mie maka nohoo'e te kaampono. Hato notumbu nembalimo pu'uno sau bhalano sampe ka'uhi lumola domai dofekaufe ne ha'a'ino.”

²⁰Ambano dua, “Apototoane bhe ae dua Kafopahinta'ano Lahata'ala? ²¹Kafopahinta'ano Lahata'ala tapedamo ragi nealano see-mie hobhine mbali kaefo'ende'ano roti. Ragi aini nokunsaloe bhe tariguno fato fulu baa ampa no'ende kosasawi'ae.”

Mie so sumalamatino

13:22-30

²²Weo kala-kalano nohope we Yerusalem, Yesus nopontaala-ala'ao kota bhe liwu poowa nofofoina'u. ²³Nandoo seemie meena-no ambano, “Ompu, naseendai kaowu bhahaa so sumalamatino?”

²⁴Notobhoosimo Yesus ne mie bhahi ambano, “Ulei'omu lalomiu pesua'omu ne fointo moseke'ano. Kapa'amo amohatokoomu do-bhahi mie mesobano damesua, tamaka paise damoolia. ²⁵Nahumato kaowu kolambuno namehemo maka na'umonto fointono, hintimiu tameeche-ehemoomu we simbali, mekate-katengkiomu fointo bhe pugau'omu, ‘Waompu, lengka kainsami fointo!’ Tamaka anoa tanamugau ambano, ‘Miina amande'aangkoomua mai'ao'omu ne amai.’ ²⁶Maka ambamiu dua, ‘Insaodi pada tahumaa tafoho'u tapombali bhe hintu, ingka hintu dua padamo fofoina'u we kangka'ano liwu mani.’ ²⁷Tamaka anoa tanamugau ambano, ‘Miina amande'aangkoomu mai'ao'omu ne amai, gampiomu ne wiseku ini hintimiu humabu modaino!’^b ²⁸Wakutuu ana'a maka mohaomu Abraham, Ishak bhe Yakub bhe kosasawindo anabii weo Kafopahinta'ano Lahata'ala, gaha'a hintimiu da'umohokoomu we simbali, ne na'a ta'o kangko'ae bhe ku'ino wangka. ²⁹O mie damai'ao te mata oleo bhe we kansoopa, te napa bhe we salata maka daengkoaha

^a 13:19 Sakotu'uno: *onuno sawi*.

^b 13:27 Mzm 6:8

daomaa weo Kafopahinta'ano Lahata'ala. ³⁰Kotu-kotu'u dabhahi mie mbuhumaino sumuli dama'induluo, ma'induluno sumuli dabuhumai.”

Fedeeno Yesus ne kotano Yerusalem

13:31-35

Mat 23:37-39

³¹Ne waktuu ana'a dohatomo seemie hodua miendo Farisi dopugau ne Yesus ambado, “Kala'o toha, hunsamo liwu aini, hampano kolaki Herodes nokopatudhu namongkoko.” ³²Notobhoosimo Yesus ambano, “Kalaomu, fohatoomu kilau na'a, 'Idi aefolimba seetani bhe aefeka'osa mie mosaki se'oleo itu bhe naewine, naefua atumokaemo kahadhaaku.’ ³³Ampamo kaowu oleo itu, naewine bhe naefua tetewei amopansuhu kala-kalaku, kapa'amo miina namantasia seemie anabii damongkoe we simbalino kotano Yerusalem. ³⁴Yerusalem, Yerusalem! Hintumo mongkono ana-anabii bhe bhatumbulino mie netudu ne hintu. Nentuhumo nokamba laloku ne hintu, amohompu ra'eatimu, kanggetu inano manu nofohompu anano we towawano panino, tamaka hintimiu mokiidoomu. ³⁵Kotu-kotu'u lambumu ini natihunsamo bhe naolino, maka amohatookoomu paemo moha kanau'omua ampa mugau'omu, 'Notibarakati maino weo neano Ompu!’ ”^a

Yesus nefeka'osa toha mie mosaki ne oleono Sabat

14:1-6

14 Sewaktuu ne oleono Sabat, Yesus nokalamo se lambuno seemie neangkando Farisi naomaa ne itu. Kosasawindo mie humatono dofe'o-fe'ondoe. ²Tamba'omo nohato seemie kobehebeheno, tanokoweo-weomo kose'ulu-uluno. Sahatono neehe-ehe ne wiseno Yesus. ³Nopugaumo Yesus ne pande-pande Kitabi bhe miendo Farisi ambano, “Weo tubhono agamantoomu naembali bhahaa daefeka'osa mie mosaki ne oleono Sabat kaa paise?” ⁴Tamaka andoa miina dakodiua. Pada aitu Yesus nointahamo limano mie mosaki na'a, nofeka'osae maka notudue nakumala.

⁵Pada peda maitu nopugaumo ne andoa ambano, “Ane ibahano ne olotamiu itu nandoo seemie nondawu anano tawa o sapino weo sumu ne oleono Sabat, pae nahumelae bhahaa?” ⁶Tamaka andoa miinamo dakowobhaa datumobhoosiea.

^a 13:35 Mzm 118:26

Kaengkoha'a te wise bhe kaengkoha'a we kundo

14:7-11

⁷Yesus nowoha mie humatono sadhia de'ondefi kaengkoha'a te wise. Dadi'anomo nopugaumo nepakeanda kapalenda. ⁸Ambano, "Ane ibahano dobhasiko ne hame-hameno kakawi, koise mengkoha te wise, kapa'amo bheanea kolambuno nebhasi dua mie lumiuko katifosibhala. ⁹Ane nada na'a bheanea kolambuno bhasikoomu kohoduamiu na'a namai namohatoko, 'Aesalo maafu, kaengkoha'amu ini so mie amaitu.' Nada kaowu ana'a hintu moambanomo, pakade kumalamo mengkoha ne kaengkoha'a we kundo-kundo. ¹⁰Tamaka ane ibahano dobhasiko, kalamo mengkoha ne kaengkoha'a we kundo. Bheanea kolambuno bhasiko namai namugauangko, 'Maimo sabhangka, mengkoha te wise ini.' Ane nada na'a hintu me'awa kafosibhala ne kosasawindo mie humatono. ¹¹Kapa'amo sasuka mekalangkeno wutono namekapandae Ompu, sasuka mekapandano wutono namekalangkee."

Mie so nebhasi

14:12-14

¹²Nopugaumo Yesus ne kolambuno bhasie na'a ambano, "Ane mefokonandoo kahame ole-oleo tawa kohondo'a, koise bhasi sabhangka'imu, kakuta'amu tawa bhahitie'imu tawa santiene'imu mohangkaeano. Kapa'amo mada kaowu andoa maitu dabhasiko dua maka hintu tumahimamo kabhoosino habu metaamu. ¹³Tamaka ane mehabu kahame mebhasi mie mokae, tapa maiwuluno, kakempa bhe kabunto. ¹⁴Ane nada na'a hintu kodawua mpuu, kapa'amo andoa maitu miina bhe ae-aenondoa so kabhoosino habu metaamu. Habu metaamu na'a nabholosiangkoe Lahata'ala nahumato kawanu'ando mie banara mai'ao ne mate."

Kapalendano mie metingku-tingkuno

14:15-24

Mat 22:1-10

¹⁵Nofetingke peda na'a seemie ne olotando mie humatono nopugaumo ne Yesus ambano, "Dokodawua mpuu mie so poharoano weo Kafopahinta'ano Lahata'ala." ¹⁶Tamaka Yesus tanotobhoosi ambano, "Nandoo seemie mehabuno kahame bhalano, mie nebhasino dobhahi sepali'a. ¹⁷Nohato wakutuuno dapoharoa, notudumo

bhatuano nasumunsumi mie nebhasino, ambano ‘Maimoomu, bhahibhahi’ae notokamo.’¹⁸ Tamaka kosasawindo desalo ma’afu de’ondofi tingku. Nopugaumo seemie ambano, ‘Kane’o ae’oli kaampo, dadi’anomomo akumala a’umondoe beano. Aesalo ma’afu.’¹⁹ Seemieno nopugau dua ambano, ‘Kane’o ae’oli sapi lima pasa, akumala asumobae kadeki. Aesalo ma’afu.’²⁰ Seemieno dua nopugau ambano, ‘Idi kane’o agaa, dadi’anomomo pae naembalia amai.’

²¹ Pada aitu bhatua ana’a nosulimo nofohato kafeompu’ano. Nofetingke peda na’a kafeompu’ano no’amaha sepali’a bhe nopugau ne bhatuano, ‘Fekahimba kalaomu ne sabhaha kaangka’a bhe kampuna weo kota maka bhasidaomu kosasawindo mie mokae, tapa maiwuluno, kabunto bhe kakempa maka owadaomu se ini.’²² Palusi ana’a nohatomo bhatua nopolele ambano, ‘Pahinta waompu padamo adhalangie, tamaka nandoo dua kaengkoha’a.’²³ Nopugaumo dua kafeompu’a na’a, ‘Kalaomu ne amai kabhongka bhe salano kaampo, fosuhudaomu mie nepo’awa’aomiu ne itu damesua, neanomolambuku naopono!’²⁴ Amohatokoomu, mie kabhao-bhaono nebhasi bhe naseemie paise bhe so menamisino otino hameku.’ ”

Kosasawi’ae damosipulie so damangkafi’ao Yesus

14:25-35

²⁵ Weo kala-kalano dobhahi sepali’a mie dobhatompa doangkafi Yesus. Yesus nodolikidamo bhe nopugau ambano,²⁶ “Ane seemie namai ne Idi, tabeano nakumukundo amano bhe inano, hobhineno bhe ana’ino, kakuta’ano mo’ane bhe hobhine bhahamo nabansi inawano wutono. Ane paise, pae naembalia so anaguhuku.”²⁷ La’ae so tapa tumongkuno sau salipuno^a maka namangkafi kanau, pae naembali so anaguhuku.²⁸ Ane ibahano ne olotamiu itu nandoo seemie gaono naefoehe lambu melangke. Ingka tetewei naengkohangkohadeki nalumentu-lentu ongosono bhaha’i nakumapoi’e dhoi-no sampe natumokae bhaha’i paise.²⁹ Kapa’amo mada kaowu namongkohasandino tamaka paise namoolie namotokae, ingka kosasawindo mie mohae damuta-mutaa’ie³⁰ bhe dapugau ambado, ‘Mie aitu netandaki nefoehe lambu, gaha’aitu miina namondoie’e namotokae.’³¹ Pedamo dua ana’a, ane seemie kolaki bhe tantarano ompulu hewu nakumala napopahisa bhe kolaki sigao’ano bhe tantarano haa fulu hewu, ingka tetewei naengkohangkohadeki nalumentu-lentu lalono, bhaha’i namondoie’e namewangi kaewa so

^a 14:27 Ma’anano: do’unda mahingga domate.

mai'ie maitu bhaha'i paise. ³²Ane paise namondoie, tetewei naepakatu deki katudu tinangke kaewano nandoo nokodo'o nae-salomo dhalano dapometaa. ³³Pedamo dua ana'a hintimiu, la'ae tapa mosipulino wutono mai'ao ne sabhaha fehebua'ano, paise naembali so anaguhuku.

³⁴O gaha maitu daanumo netaa, tamaka ane nosimotembe'a, kiha-kiha damekakahaane dua ae? ³⁵Ingka paemo nakofahalaa'a, pae natipakea te kaampo, paemo dua naembali so kahewutino kantisa, tada'umoho. Ane dokotingala, tabeano dametingke!"

Kapalendano dhumba miinae'ano

15:1-7

Mat 18:12-14

15 Dobhahi meala'ino sewa bhe mie kodhosa sadhia domai ne Yesus dofetingke kafoina'uno. ²Miendo Farisi bhe pandepande Kitabi dokamuntu-muntu ambado, "Pahasili, mie aini netahima mie kodhosa bhe nohumaa nopombali-mbalianda."

³Dadi'anomo Yesus nofohatoandamo kapalenda aini.

⁴"Ane ibahano ne olotamiu itu nandoo seemie kodhumbano mo'ono ulu, gaha'a namiinae se'ulu, naeafamo bhahaa? Ingka teteweimo nahumunsada siuma fulu siuma uluno na'a we pada maka na'umondofi se'uluno miinae'ano na'a ampa na'umawae. ⁵Sati'awano natumongkuemo, ka'osano ka'iano. ⁶Sahatono we lambu nsumali'imo sabhangka'ino bhe santieneno maka napugauanda, 'Mo'ia kaitaomu, dhumbaku miinae'ano a'awaemo.' ⁷Amohatookoomu, nadamo dua ana'a te surugaa dao'ia hampano seemie kodhosa metompa'aono dhosano, nalumiu'e ka'iando mba'inomo mie banara siuma fulu sisuano tapa maraluuno dametompa'ao dhosando."

Kapalendano dhoi pera miinae'ano

15:8-10

⁸Ambano toha, "Ane ibahano seemie hobhine bhe dhoino ompulu woka pera, gaha'a namiinae sewoka, naeafamo bhahaa? Ingka teteweimo naesula kantalea maka nae'aho weo lambuno na'na'umondofie namotinda-tindae ampa na'umawae. ⁹Sati'awano nabhasimo sabhangka'ino bhe santieneno maka namugau, 'Mo'ia kaitaomu, hampano dhoiku miinae'ano a'awaemo.' ¹⁰Amohatookoomu, nadamo dua ana'a mala'ekatino Lahata'ala dao'ia hampano seemie kodhosa metompa'aono dhosano."

Kapalendano ana'i mo'ane miinae'ano

15:11-32

¹¹ [Ambano toha Yesus,] “Nandoo seemie bhe ana mo'aneno dohodua. ¹² Nopugaumo ka'epu ne amano ambano, ‘Ama, wa'a kanau-mo dawuku mai'ao ne kahunsa'ao mani itu!’ Amando lasao nopodawuanda kahangkaeano. ¹³ Miina naompona pada aitu ka'epu noasomo kosasawi'ae dawuno maka nokala we koliwuno, nokodo'o sepali'a. Nohato we koliwuno nopokamasa'ao dhoino, nodadi noangkafi namisino. ¹⁴ Hato nopuli kosasawi'ae dhoino, liwu aitu nofinda'iemu gaba, anoa nenamisimo kakae. ¹⁵ Dadi'anomo nokalamo nokahadhaa ne seemie meateno ne liwu aitu. Mie ana'a notudue nakumala we kaampo nadhumagani wewi [kakaneano,] ¹⁶ Ka'osano ka'ahono sampe mahingga oti kabhila'a so nehumaano wewi gaonoa tanaomaamo, tamaka miina dua bhe ma'anea.

¹⁷ Panda-pandano nopande'aomo lalono. Nokoduku we lalono ambano, ‘Kabhahindo mie mealano ponambo ne amaku dohumaa nopontabhila-bhila, gaha'a idi ne ini amate'ao oti. ¹⁸ Naetaamo asumuli ne amaku maka amohatoe, “Ama, akodhosamo ne Lahata'ala bhe ne hintu. ¹⁹ Miinamo amantasia kumona kanau anamu, hunsa'anomo aembali nada mealano ponambo.”’ ²⁰ Pada ana'a noehemo maka nosuli we amano. Gaha'a nandoo nokodo'o nowohaemo amano. Kabhelano maka lalono amano, lasao notende nopo'awaane, nokakopue bhe nowonoe. ²¹ Ambano ana mo'ane ana'a ne amano, ‘Ama, akodhosamo ne Lahata'ala bhe ne hintu, paemo amantasia kumona kanau anamu.’ ²² Tamaka amano tanopugau ne bhatua'ino, ‘Fekahimba owa kanau'omu dhuba foliuno kakesa maka fepakeanie'omu, fosukoaneomu singkahu ne wunano limano bhe fokanaaneomu kaampini ne a'eno. ²³ Meala kaitaomu anano sapi kampuhibuku maka sumbelee'omu. Maimoomu, daomaa'omu bhe dahumame-hameomu. ²⁴ Kapa'amo anaku ini kanggetu nomatemo, gaha'a sulimo nodadi. Nomiinae, sulimo apo'awaane.’ Pada aitu dohame-hamemo.

²⁵ Tamaka anano titiisa nandoo'e te kaampo. Hato nosuli noma'o bhe lambu nofetingkemo ndiino mbololo bhe ganda^a bhe lagulagu manari. ²⁶ Anoa nebhasimo seemie bhatua maka nofeena'ao ma'anano bhahi-bhahi'ae maitu. ²⁷ Ambano bhatua na'a, ‘Ingka o aimu nosulimo. Amamu padamo nesumbele sapi kampuhibuku,

^a 15:25 Sakotu'uno: *ndiino musik*.

kapa'amo aimu suli nopo'awa'ane weo katotomata.' ²⁸Nofetingke peda aitu, ana'i titiisa na'a no'amahamo bhe nokiidomo namesua. Dadi'anomo amano nolimbamo nopo'awaane nomalu-malusie namesua. ²⁹Tamaka tanotobhoosi ne amano ambano, 'Ingka ntini ta'u-ta'umo afeompuni'iko, bhe nasepaku miina alumempagi pahintamu. Tamaka bhe nase'ulu anano membe miina ma'a kanau so ahumame-hame'ao bhe sabhangka'iku. ³⁰Aitu kane'o nohato anamu pokamasa'aono fehebua'amu bhe hobhine'i karambole, gaha'a lasao mesumbeleane sapi kampuhobuku.' ³¹Notobhoosimo amano, 'Anaku, ingka hintu sadhia pobhai bhe idi; sabhaha fehebua'aku fehebua'amumo dua. ³²Nopantasi mpuu dao'ia'omu bhe dahumame-hameomu kapa'amo aimu kanggetu nomatemo, gaha'a sulimo nodadi, nomiinae sulimo apo'awaane.' "

Kapalendano meintahano dhoi tapa melaano lalo

16:1-9

16 Yesus nopugaumo toha ne anaguhu'ino ambano, "Nandoo seemie hangkaea bhe mie mintahano kahangkaeano. Mie hangkaea maitu dofohatoe mie putae mintahano kahangkaeano na'a nopokamasa'aomo kanandoono. ²Nofetingke peda maitu, mintahano kahangkaea na'a nobhasiemo maka nofeenae ambano, 'Peda ae bhahaa pofetingkeku ini, ingka dopulao'ao hintu? Soba buhi kana'e bhahi-bhahi'ae nehabumu kaomponano intaha kahangkaeaku ini, kapa'amo paemo membalia so mintahano kahangkaeaku.' ³Dukuno lalono mie ana'a, 'Aeafa'imo bhahaa? Ingka kafeompu'aku ini namosabu kanaumo. Aesa'era pae atumanggoa, aesalo-salo ingka aambano. ⁴Apande'aanemo so nehabuku, neanomo ane damosabu kanau kaowu nandoo dua so tumahima kanau ne lambudo.' ⁵Pada aitu nobhasimo kodosano ne kafeompu'ano seemie-seemie. Ambano ne kabhao-bhao humatono, 'Se'ae gaha'a dosamu ne kafeompu'aku?' ⁶Ambano mie ana'a, 'O mina mo'ono wua gusi.' Ambano toha ne mie ana'a, 'Aini suhano dosamu itu, mengkoha maka fekahimba mebuhi suha bu'ou, dosamu lima fulu wua gusi kaowu.' ⁷Pada ana'a nopugaumo dua ne seemiemo, 'Hintu se'ae dosamu?' Notobhoosimo mie aitu, 'Mo'ono lambeha pae.' Ambano toha, 'Aini suhano dosamu itu, mehabu suha bu'ou dosamu alu fulu lambeha kaowu.'

⁸Kafeompu'ano nopudhi sepali'a mintahano kahangkaeano tapa melaano lalo na'a hampano kako'akalano. Daanumo miendo dhunia

ini dofoliu kako'akalando ne mie bhaindo ane dopototoane bhe miendo kantalea. ⁹Ambano toha Yesus, Amohatokoomu, pakeomu kanandoono dhunia ini^a so posabhangkaomu mie bhaimiu, neanomo pae kaowu nakofahalaa kanandoono dhunia ini, hintimiu nandoo dua datumahimakoomu weo lambu kadadi'a suhue dhamani.”

Sabhaha kafoina'u sigao'ano
16:10-18

¹⁰Ambano toha Yesus, “Ane seemie nembali daposahuna'aane giu mohobu, tetewei natiposahuna'ao dua ne giu bhalano. Tamaka ane miina naembali daposahuna'aane giu mohobu, tetewei dua paise natiposahuna'ao ne giu bhalano. ¹¹Dadi'anomo ane pae naembali daposahuna'aangkoomu kahangkaeano dhunia, ingka tetewei pae dua daposahuna'aangkoomu kahangkaea sakotu'uno, [ma'ana no dadi bu'ou]. ¹²Ane miina naembali daposahuna'aangkoomu kahangkaeando mie bhaimiu, nama'angko la'ae bhahaa kahangkaeaumu wutomu?”

¹³Miina bhe bhatua dahodua kafeompu'ano. Ane nada na'a tetewei seemie nabansie, seemie namasiane, tawa nakumampuumpuu lalono ne seemieno bhe seemieno miina nakumona'ie miea. Hintimiu pae naembali meompuomu ne Lahata'ala bhe ne kahangkaeano dhunia.”^b

¹⁴Kosasawi'ae na'a dofetingkee dua miendo Farisi tamaka tadebheu, hampano andoa ini sanea bhatuano dhoi. ¹⁵Nopugaumo Yesus ne andoa ambano, “Hintimiu ini fotiwoha wutomiu ne wise ndo manusia peda mie banara, tamaka Lahata'ala nopande'aane totono lalomiu. Kapa'amo diu nekonando manusia foliunomo kakesa, nobansie Lahata'ala. ¹⁶Kitabino Musa bhe Kitabino ana-anabii sadaa-daa nolaku ampa ne dhamanino Yohanes, tamaka notanda ne dhamanino Yohanes Kafopahinta'ano Lahata'ala dofoleleemo maka sabhaha mie dopogolo-golo damesua. ¹⁷Tamaka nandoo nomuda naosali lani bhe dhunia bhe nabatala nasetanda buhi weo Kitabino Musa.

¹⁸Sasuka humunsano hobhineno maka nogaa bhe hobhine sigao'ano mie aitu nomonsule, bhe sasuka gumaano bhe hobhine nehunsano mo'aneno, mie aitu nomonsule dua.”

^a 16:9 Sakotu'uno: *Mamon pata melaano lalo*; pedamo dua ne aeati 11.

^b 16:13 Sakotu'u'ano: *Mamon*, ma'anano o dhoi.

Mie hangkaea bhe Lasarus kumadee-deeno
16:19-31

¹⁹Nopugaumo toha Yesus ambano, “Nandoo seemie hangkaea sadhia nepake dhuba biludhu bhe kai alusu. Ka'osano kahangkaea-no se'o-se'oleo nohame-hame. ²⁰Nandoo dua seemie kumadee-dee, neano Lasarus. Mbadhano nopono'ao kanda, nendole-ndole ne wiseno fointono lambuno mie hangkaea na'a. ²¹Nowoha kapondawuno mai'aono ne medhano mie hangkaea na'a, Lasarus ini gaono tanaomaamo nako'i'ao kaowu handano. Gaha'a domai'iemo dua da'u dodelapi kandano. ²²Kaowu mie kumadee-deeno na'a nomatemo, maka doampee mala'ekati te awino Abraham. ²³Gaha'a mie hangkaea na'a nomatemo dua maka dokobuhue. We dhuniando mie mate nokadee-dee sepali'a. Wakutuu nototohana, gaha'a nowohamo Abraham te mokodo'o'ano no'awi Lasarus. ²⁴Mie hangkaea na'a nokeimo ambano, ‘Amaku Abraham, mobhela kanau lalo! Tudu kanaumo Lasarus namolondo wunano limano ne oe maka namekahindima lelaku hampano notolau kakadee-deeku weo hendeno efi ini.’

²⁵Tamaka Abraham tanopugau ambano, ‘Anaku, tandai'e hintu padamo namisie sabhaha mombaka'ano weo dadimu, tamaka Lasarus nonamisi sabhaha mopa'i'ano. Ampa aini anoa notilawesimo lalono ne ini, tamaka hintu notolau kakadee-deemu. ²⁶Pakade olotano insaodi bhe hintimiu nandoo kantie tapa tilempagi, neanomo so kumalano mai'ao ne ini pae damoolia dapolimba we hintimiu, tawa mai'aono we hintimiu itu pae damai te ini.’ ²⁷Ambano mie hangkaea na'a, ‘Ane nada na'a, aesalo tudu Lasarus nakumala we ndo amaku, ²⁸kapa'amo nandoo kakuta'aku tadolidima, neanomo namodhagada mpuu keana dopesua bhe andoa weo kakadee-dee aini.’ ²⁹Tamaka ambano Abraham, ‘Ingka nandoo Kitabino Musa bhe Kitabindo anabii ne andoa, hunsa'anomo dametingke kafoina'u ana'a.’ ³⁰Tamaka ambano dua mie hangkaea na'a, ‘Paise amaku Abraham, ane nandoo mie mate so sumuli dumadino maka nakumala namodhagada, tetewei dametempa'ao dhosando.’ ³¹Ambano toha Abraham, ‘Ane pae dametingke kafoina'uno anabii Musa bhe ana-anabii sigao'ano, teteweimo pae dua damarasaea'a mahingamo nahumatoda seemie manuno mai'ao ne mate.’ ”

Kafoina'uno dhosa bhe kaparasaea

17:1-6

Mat 18:6-7, 21-22; Mrk 9:42

17 Nopugaumo Yesus ne anaguhu'ino ambano, “Tingkuno dhosa tetewei nandumandoo, tamaka nobalaamo mie mehabuno tingkuno dhosa na'a. ²Mie medando na'a naetaa dakumantaiane kagili kontu ne wu'uno maka damotondue we te'i. Naetaa nada ana'a bhe nehabu tingkuno dhosa so mie ndidiki ini. ³Dhaga'ao wutomiu! Ane bhahitiemu nehabu ka'ala mefe'ulaiane, ane nasumosoane ma'afuane. ⁴Mahinggamo se'oleo nafitu paku nako-ka'ala ne hintu bhe nafitu paku dua nasumuli ne wisemu maka napugau, 'Asumosoane'o toha', tetewei ma'afuane.”

⁵Dopugaumo rasulu'i ne Ompu Yesus ambado, “Tubhahie kaparasaea mani.” ⁶Ambano Ompu, “Ane kabhalano kaparasaeamiu nada onuno wonoita se'onu,^a naembali pugau'omu ne pu'uno ara ini, 'Buna wutomu maka tisa wutomu we te'i', pu'uno sau maitu tetewei namangkafi pugaumiu.”

Kafeompu'a bhe bhatuano

17:7-10

⁷“Ibahano ne olotamiu itu nandoo kobhatuano mbali melukuno te kaampo tawa dhumaganino kadadino. Ane bhatua na'a nohato nomai'ao te kaampo, bhahaa nasumali'ie, 'Mai, lasaomo humaa'? Ingka paise. ⁸Tetewei napugau ne bhatua na'a, 'Mefotoka kanau otiku. Loli kadeki pakeamu maka ondofa kanau ampa namada aomaa bhe aoho'u. Mada ana'a kane'omo naembali momaa bhe moho'u.' ⁹Bhahaa naefoampe katumpuno lalo ne bhatua na'a, hampano padamo nodhalangi takano? Ingka paise. ¹⁰Pedamo dua hintimiu itu, ane madamo dhumalangi kosasawi'ae takamiu, naetaa pugau'omu, 'Insaodi ini sena'a-na'a bhatua, tadhalangi kaowu taka netudu'ao mani.' ”

Yesus nefeka'osa doompulu mie kokuli modaino

17:11-19

¹¹Weo kala-kalano nohope we Yerusalem, Yesus nosohaki potida'ano kadieno Samaria bhe Galilea. ¹²Wakutuu nopesua ne se'onu liwu, dosumpui'emo kokuli modaino doompulu. Andoa ini deehe-ehe se mokodo'o'ano ¹³bhe dokei ambado, “Guru Yesus!

^a 17:6 Sakotu'uno: *onuno sawi*.

Mobhela kainsami lalo!”¹⁴ Yesus no'ondoda maka nopugau ambano, “Kala fotiwoha wutomiu ne imamu'i damahakesaa kulimiu.”^a Gaha'a we laano sala tadosimonggela'amo.

¹⁵ Seemie ne olotando doompulu maitu, sanowoha wutono nnggelamo, lasao nosuli nopokakei-kei nopudhi Lahata'ala. ¹⁶ Nohato nolongkomo ne a'eno Yesus maka nefoampe katumpuno lalo. Gaha'a mie ana'a miendo Samaria. ¹⁷ Nopugaumo Yesus ambano, “Kuna'ekumo koompulundo donggelamo. Ne amaida bhahaa sisiuano? ¹⁸ Miina bhe sigao'ano bhahaa so sumulino mudhino Lahata'ala mpahinomo koliwuno ini?” ¹⁹ Pada aitu nopugaumo ne mie ana'a, “Ehe'o toha maka kala, hampano parasaea ne Idi, osalamatimo.”

Kahato'ano Kafopahinta'ano Lahata'ala

17:20-37

Mat 24:23-28, 36-41

²⁰ Yesus dofeenae miendo Farisi bhaha'i naefie nahumato Kafopahinta'ano Lahata'ala. Yesus notobhoosidamo ambano, “Tanda-tandano kahato'ano kafopahinta'ano Lahata'ala miina natiwohaa. ²¹ Pakade pae dua bhe so pugauno, ‘Ondoe itu, aini'ae tawa atatu'ae’, kapa'amo sakotu'uno Kafopahinta'ano Lahata'ala nandoomo ne olotamiu itu.” ²² Pada ana'a nopugaumo ne anaguhu'ino, “Mada kaowu gaomiu mohaomu tempono kahato'ano Anano Manusia, mahingga nase'oleo kaowu, tamaka pae sepali'a mohaomua. ²³ Nandumandoo mie so pugauno ne hintimiu, ‘Ondoe'omu atatu'ae tawa aini'ae Anano Manusia.’ Tamaka koise kalaomua, koise dua angkafie'omua. ²⁴ Kapa'amo oleono kahato'ano Anano Manusia nada adhono bhighbito, nakosilaka te lani mai'ao te setompano ampa we setompano. ²⁵ Ampamo kaowu Anano Manusia tabeano nabhahi naenamisi kadeki kakadee-dee bhe dabansie mie dhamani aini. ²⁶ Peda koeatendo manusia ne dhamanino Nuh, nadamo dua ana'a ne oleono kahato'ano Anano Manusia. ²⁷ O mie dohumaa dofoho'u, dogaa bhe dofogaada, ampa oleono Nuh nopesua weo bhangka bhalano. Wakutuu ana'a nohato luano oe bhalano nofobinasada kosasawindo.^b ²⁸ Pedamo dua ne dhamanino Lot, o mie dohumaa dofoho'u, dopo'oli poaso, domontisa bhe defelambu. ²⁹ Tamaka ne oleono Lot nohunsa kotano Sodom, nosampumo efi

^a 17:14 Im 14:1-32

^b 17:26-27 Kej psl 6-8

bhe waleha kabeanga o use nomai'ao te lani nofobinasada kosa-sawindo.^a ³⁰Nadamo dua ana'a so kumadhadhiano ne oleono Anano Manusia namotiwoha Wutono.

³¹Ne oleo ana'a, mie we tambi koemo dopesua dakoniala weo lambu,^b pedamo dua mie te kaampo koemo dosulia we liwu. ³²Fe'ulai'omu kumadhadhia'ano ne hobhineno Lot.^c ³³La'ae so potaami'aono inawa patudhuno so nasumalamati'ao, namiinae inawano. Tamaka la'ae so miinaeno inawa, ingka nasumalamati. ³⁴Amohatokoomu, ane alo ana'a dahodua sekaodo'a, seemie dawowo'oe, seemieno dahumunsae. ³⁵Ane dahodua hobhine tanga-sano megilino kahitela,^d seemie dawowo'oe, seemieno dahumunsae. ³⁶[Ane dahodua kumadhadhaano te kaampo, seemie dawowo'oe, seemieno dahumunsae.] ³⁷Dofeenamo dua ne Yesus, "Ne amai Ompu?" Notobhoosimo Yesus ambano, "Ne amai kobhangke'ano, ne itumo kaefo'onu'ando kaa."

Kapalendano bhihinanda bhe pande bhitaha

18:1-8

18 Yesus nopugaumo toha nepakeanda kapalenda. Patudhuno nofoina'u anaguhu'ino putae sadhia dasumambahea pae daongoongaraa. ²Ambano, "Ne se'onu kota nandoo seemie pande bhitaha tapa mote'ino ne Lahata'ala bhe miina nakonidhampangia mie bhainoa. ³Ne kota aitu nandoo dua seemie bhihinanda sadhia nokala ne pande bhitaha na'a ambano, 'Potundu'a kanau ne kaewaku.' ⁴Ampa se'oleo haa oleo pande bhitaha na'a nokiido natumulumie. Tamaka pada ana'a nokodukumo we lalono, 'Daanumo miina aote'ia ne Lahata'ala, miina dua akonidhampangia mie bhaiku, ⁵ampamo kaowu bhihinanda aini ingka nofekasabha kanau kansuhu, naetaa apotundu'aanemo, keana sadhia nomai'i kanau bhe namekawule kanau.' "

⁶Ambano Ompu Yesus, "Tandai'eomu pugauno pande bhitaha pata melaano lalo na'a! ⁷Bhahaa Lahata'ala pae napotundu'ao umati tipilino metondalano ne Anoa mentae mohondo? Bhahaa

^a 17:28-29 Kej 18:20 - 19:25

^b 17:31 Sakotu'uno: *ndumandoono te ato potate'ano, koemo dosampu damesua dakoniala weo lambu.*

^c 17:32 Kej 19:26

^d 17:35 Sakotu'uno: *gandum.*

Lahata'ala naefodhulu-dhulu tempo maka natumulumida? ⁸Amohatokoomu, Lahata'ala lasao napotundu'aanda. Ampamo kaowu humato nasumuli Anano Manusia, nandoo napo'awa'ao bhahaa mie so marasaeano ne Anoa te dhunia ini?"

Kapalendano miendo Farisi bhe mealano sewa

18:9-14

⁹Yesu nepakemo dua kapalenda aini ne mie mabhino wutondo mie banara bhe misakino mie bhaindo. ¹⁰Ambano, "Nandoo dohodua dokala we Lambuno Lahata'ala dosambahea. Seemie miendo Farisi, seemieno mealano sewa. ¹¹Miendo Farisi maitu neeheehe bhe nosambahea weo totono lalono peda ini, 'O Lahata'ala, notumpu mpuu laloku ne Hintu, hampano miina apototoa bhe mie sigao'ano, peda mie forampasino, mie modai tawa mie monsuleno. Idi miina dua apototoa bhe mealano sewa ini. ¹²Idi apoasa haa paku se'ahadhi, pakade pehapiku afeompulu dawue, sedawu nembali kafoampe so Hintu.' ¹³Tamaka mealano sewa na'a neeheehe se mokodo'o'ano, bhe miina naokadoa natumotohana. Anoa tanotofa-tofa mbadhano ka'osano sosono bhe nopugau, 'O Lahata'ala, mobhela kanau lalo, idi mie kodhosano ini.' ¹⁴Amohatokoomu, mie mealano sewa ini nosuli se lambuno nembalimo mie banara ne wiseno Lahata'ala, tamaka seemieno miina. Kapa'amo sasuka mekalangkeno wutono namekapandae Ompu, sasuka mekapandano wutono namekalangkee."

Yesu nebarakati ana'i

18:15-17

Mat 19:13-15; Mrk 10:13-16

¹⁵Pada aitu dohatomo mie meowano ana'i kahobu ne Yesu, patudhundo daefekadampada. Dowoha peda maitu, anaguhu'ino Yesu do'amahakidamo. ¹⁶Tamaka Yesu nolo'oimo ana'i andoa maitu bhe nopugau ne anaguhu'ino ambano, "Hunsa'anomo ana'i andoa itu damai se Idi, koise ele'aandaomu, kapa'amo mie medandomo andoa ini so mieno Kafopahinta'ano Lahata'ala. ¹⁷Amohatokoomu, kotu-kotu'u ane pae datumahima Lahata'ala so mahintangino dadindo nameda ana'i kahobu, pae naembalia damesua weo Kafopahinta'ano Lahata'ala."

**Mie hangkaea no'ali damesua weo
Kafopahinta'ano Lahata'ala**

18:18-27 *Mat 19:16-26; Mrk 10:17-27*

¹⁸Nandoo seemie neangkando miendo Yahudi nofeenamo ne Yesus ambano, “Guru, hintu metaano lalo, aeafa bhahaa so ae'awa'ao dadi suhue dhamani?” ¹⁹Notobhoosimo Yesus, “Noafa gaha'a kona kanau metaano lalo? Ingka miina bhe metaano lalo, mpahinomo wutono Lahata'ala. ²⁰Ingka pande'aanemo padaa sabhaha pahinta'ano Lahata'ala: Koe monsule, koe fopongko, koe mbolaku, koe membali sakusii kopaha, fosibhalada inamu bhe amamu.”^a ²¹Ambano mie ana'a, “Kosasawi'ae pahinta na'a adhalangiemo mpini kaana'iku.”

²²Nofetingke peda na'a Yesus nopugaumo ambano, “Tadua sehonda so nedhalangimua, asoe sabhaha fehebua'amu, olino dawu-dawuandae mie mokae maka me'awa arataa te surugaa. Mada ana'a maimo angkafi kanau!” ²³Nofetingke pugau ana'a mie aitu nokompeaha sepali'a lalono hampano nohangkaea sepali'a. ²⁴Yesus no'ondoe bhe nopugau ambano, “Ka'ali maka mie kodhoi damesua weo Kafopahinta'ano Lahata'ala. ²⁵Nomuda se'ulu kahumbau^b namangka ne kabhentano deu, bhe seemie hangkaea namesua weo Kafopahinta'ano Lahata'ala.” ²⁶Mie metingkeno dopugaumo ambado, “Ane peda na'a, la'ae bhahaa so sumalamatino?” ²⁷Ambano Yesus, “Tapa nemondoino manusia, nomondoi'e Lahata'ala.”

Ponambono mie mangkafino Yesus

18:28-30 *Mat 19:27-30; Mrk 10:28-31*

²⁸Nopugaumo Petrus ambano, “Ingka insaodi ini tahuksaemo sabhaha fehebua'a mani maka taangkafiko.” ²⁹Ambano Yesus, “Amohatokoomu, sasuka humunsano lambuno, hobhineno, tawa bhahitieno, kamungkulano tawa ana'ino hampano nofosibhala Kafopahinta'ano Lahata'ala, nandoo so ne'awano. ³⁰Ne dhamani aini nae'awa sedhulu'a dua kabhahino bhe nehunsano, maka nahumato dhamani mbuhumai nae'awa dadi suhue dhamani.”

^a 18:20 Kel 20:12-16; Ul 5:16-20

^b 18:25 Sakotu'uno: *se'ulu unta*.

Kafohato katolu pakuno so kakadee-deeno Yesus

18:31-34

Mat 20:17-19; Mrk 10:32-34

³¹Pada ana'a Yesus nosali'imo anaguhu'ino ompulu hoduanu maka nofohatoda ambano, "Aitu dokalaomu we Yerusalem. Ne na'a kosasawi'ae nebuhiro ana-anabii mulao'aono Anano Manusia – Idimo ini – nako'ulamo. ³²Kapa'amo Anano Manusia daowae ne limando mie tapa mande'aono Lahata'ala maka damele-elee, dameka'aebue bhe dakumapehasie. ³³Anoa maitu damepekie bhe damongkoe tamaka ne katolu oleono namanu namai'ao ne mate." ³⁴Tamaka kosasawi'ae na'a miina dalumosangiea anaguhu'ino. Ma'anano pugauno maitu notifebuni ne andoa, sampe miina damande'aanea o ae patudhuno.

Yesus nefeka'osa seemie kabunto we owano kota Yeriko

18:35-43

Mat 20:29-34; Mrk 10:46-52

³⁵Wakutuuno Yesus noma'omo nahumato we Yeriko, nandoo seemie kabunto nengko-ha-ngkoha ne wiwino sala nesalo-salo. ³⁶Wakutuuno kabunto maitu nofetingke mie bhahi dolalo ne itu, nofeenamo ambano, "O ae na'a?" ³⁷Ambado mie, "Yesus miendo Nasaret noangka ne ini." ³⁸Nokeimo kabunto ana'a ambano, "Yesus sampu'ano Daud, mobhela kanau lalo!" ³⁹Mie ma'induluno do'ama-hakiemo bhe dopugauane pae nakodiua. Tamaka tanodhulu kahaai' nokeia, "Sampu'ano Daud, mobhela kanau lalo!" ⁴⁰Gaha'a Yesus nofetumpumo maka netudu mie datumondaane kabunto na'a. Nohato se owano Yesus nofeenaemo ambano, ⁴¹"Mekapoindalo ae bhahaa? Amafa'iangko gaomu?" Ambano mie aitu, "Ompu, gaoku afowoha!" ⁴²Ambano Yesus, "Fowoha'o toha, hampano parasaea ne Idi, osalamatimo!" ⁴³Mie ana'a lasao nofowoha maka noangkafi Yesus poowa nofekakalabhia Lahata'ala. Kosasawindo mie mohano kadhadhia amaitu, dopudhimo dua Lahata'ala.

Yesus bhe Zakeus

19:1-10

19 Yesus nopesuamo we kotano Yeriko tamaka tanolaloi. ²Ne itu nandoo seemie neangkando meala'ino sewa, nohangkaea sepali'a. Neano Zakeus. ³Zakeus gaono mpuu namohae dua mie medando ae Yesus maitu, tamaka miina namoolia mba'inomo dobhahi sepali'a mie pakade nepanda fewutoino.

⁴Dadi'anomo notendemo nopa'induluki mie bhahi, nekamponea ne pu'uno ara na'umondo Yesus so lumalono ne itu. ⁵Nohato ne putaa'ano, Yesus nototohanamo bhe nopugau ambano, “Zakeus, sampumo fekahimba, kapa'amo se'oleo itu tetewei abutu se lambumu.” ⁶Zakeus nosampu nofekahimba-himba maka notahima Yesus se lambuno. Kawulano maka lalono. ⁷Tamaka kosasawindo mie mohano kadhadhia aitu tadokomuntu'a ambado, “Ingka nobutu ne lambuno mie kodhosa.”

⁸Palusi ana'a Zakeus noehemo maka nopugau ne Ompu ambano, “Ompu, nselabunta kanandooku ini adumawuandae mie mokae. Pakade ane nandoo mie nebhohe-bhohe'iku, kahugindo abhoosie nafato lentu'a.” ⁹Ambano Yesus, “Se'oleo itu mieno polambu aini detahimamo kasalamati, hampano mie aini sampu'ano dua Abraham. ¹⁰Kapa'amo Anano Manusia – Idimo ini – nomai na'umondofi bhe namosalamati mie kolilinono totono lalo.”

Kapalendano dhoi bulawa

19:11-27

Mat 25:14-30

¹¹Tangasano mie bhahi dofetingke pugauno ini, Yesus nofokansuhumo pugauno nepake toha sehonda kapalenda. Kapa'amo waktuu aitu noma'omo bhe kotano Yerusalem pakade kuna'endomo mie bhahi na'a Kafopahinta'ano Lahata'ala napikitiwohamo. ¹²Ambano Yesus, “Nandoo seemie kafeompu'a nakumala we liwu mokodo'o'ano damoehee so kolaki mowano liwuno. Namalusi kaowu nasumulimo. ¹³Miina'o nakumalaa, kafeompu'a maitu nosali'imo bhatuano doompulu, maka nowa'anda dhoi bulawa^a sewoka seemie bhe nopugauanda ambano, ‘Podaga'ao'omu dhoi aini ampa asumuli.’ ¹⁴Tamaka saliwuno dobansie sampe detudumo mie dosunsumie deowa suahando miendo liwu, ‘Mie aini miina tamoindaloe so kolakino liwu mani.’

¹⁵Gaha'a palusi dofoehee nembali kolaki nosulimo. Sahatono we liwuno netudumo mie dalumo'oi bhatua'ino me'awano dhoi bulawa endefi'ini. Patudhuno namande'ao labando dopodaga seemie-seemie. ¹⁶Mie kabhao-bhaono nomaimo bhe nopugau ambano, ‘Waompu, dhoi bulawa sewokano endefi'ini akolabaanemo dua ompulu woka.’ ¹⁷Nopugaumo kafeompu'a na'a ambano, ‘Nokesa sepali'a itu, hintu bhatua metaa, notuhu lalomu ne taka mohobu, dadi'anomo ama'angko meowa naompulu onu liwu.’ ¹⁸Nomaimo dua seemieno bhe

^a 19:13 Sakotu'uno: *dhoi mina*.

nopugau ambano, 'Waompu, dhoi bulawa sewokano endefi'ini akolabaanemo dua lima woka.' ¹⁹ Ambano kafeompu'a na'a, 'Hintu ama'angko meowa nalima onu liwu.'

²⁰ Nohatomo dua seemieno bhe nopugau ambano, 'Waompu, aini'ae dhoi bulawa kawa'aomu, ta'afeka-fekataamo weo kapusuli. ²¹ Kapa'amo aote'i waompu, hampano ka'osano lalomu. Hintu ta-mealamo tapa nehunsamu, kape ne kaampo tapa kamontisa'amu.' ²² Ambano kafeompu'a na'a, 'Bhatua modai, abhotusiko naposahataa bhe pugaumu itu. Ingka pande'a kanaumo mie mo'osano lalo, aeala tapa nehunsaku, akape ne kaampo tapa kamontisa'aku. ²³ Ane peda na'a noafa dhoiku maitu miina ma'andae mie mefowaweno dhoi? Neanomo sasuliku atumahimae bhe oeno.' ²⁴ Nopugaumo kafeompu'a na'a ne mie meehe-eheno ne itu ambano, 'Alae'omu dhoi bulawa neintahano mie aini maka wa'aneomu bhatua kolaba'ano ompulu wokano sa'ituini.' ²⁵ Ambado mie netuduno na'a, 'Waompu, ingka bhemo dhoino ompulu woka.' ²⁶ Ambano toha kafeompu'a na'a, 'Amohatokoomu, sasuka mie kokanandoono datumabhahiane, tamaka tapa kokanandoono, o ae maka dua kanandoono damadae damala'ie. ²⁷ Tamaka kosasawindo kaewaku tapa moindalo kanau aembali kolakindo, owadaomu se ini maka pongkodaomu ne wiseku ini.' "

Yesus do'ia-ia'e we kotano Yerusalem

19:28-44

*Mat 21:1-9;
Mrk 11:1-10; Yoh 12:12-15*

²⁸ Nopalusi nopugau peda na'a Yesus nopa'indulukidamo, nofopansuhu kala-kalano we Yerusalem. ²⁹ Nohato we owano Betfage bhe Betania we laano kabhawo nekonando kabhawono Zaitun, Yesus netudumo dohodua anaguhuno dama'indulu. ³⁰ Andoa ini nofohatoda, "Kalaomu we liwu te wise watu. Samesua'omu weo liwu mohaomu se'ulu anano keledai dotapue, miina'o sepali'a natisawikia. Lense'omu katapuno maka tondae'omu we ini. ³¹ Ane bhe so meenakoomu, 'Noafa lenseaneomu?', fohatodaomu putae, 'Nofaraluu'e Ompu.' " ³² Pada aitu anaguhuno netuduno dokalamo, nepo'awa'aondo nopobutu bhe pugauno Yesus. ³³ Tangasano dolense katapuno keledai aitu, dofeenadamo kokeledaino na'a ambado, "Noafa lenseaneomu?" ³⁴ Ambado toha, "Nofaraluu'e Ompu." ³⁵ Keledai ana'a dotondaemo ne Yesus, towuno dolempeiane pakeando mbali kaengkoha'ano maka dofosawi Yesus te wawono.

³⁶Wakutuuno Yesus nolalo nosawi ne keledai na'a, mie bhahi dobhakesaane pakeando ne kaangka'a. ³⁷Nohato we owano Yerusalem, ne kainsibuluno kabhawono Zaitun, mie bhahi mangkafie na'a dopokakei-kei'aomo ka'ia dopudhi Lahata'ala, hampano sabhaha tanda tapa mentela newohando. ³⁸Ambado,

“Nobarakati omputo maino weo neano Ompu,
kathopopo te surugaa,
kakalabhiano Lahata'ala te wawono wawo.”^a

³⁹Seemie hodua miendo Farisi mangkafino mie bhahi na'a dopugaumo ne Yesus ambado, “Guru, tududa anaguhu'imu ini koe dokodiua!” ⁴⁰Notobhoosimo Yesus, “Amohatokoomu, ane andoa ini pae dakadiu-diu, tetewei o kontu ini so pokakei-keino.” ⁴¹Nohato we owano kota, nowoha Yerusalem, Yesus no'aefiemo. ⁴²Ambano, “Ka'asimu hintu kotano Yerusalem, naetaa mpuu ane se'oleo itu lumosangie o ae maraluu'ano so kataa bhe kathopono ngkoha-ngkohamu! Ampamo kaowu ana'a notifebuni, miina mohaea. ⁴³Kapa'amo mada kaowu dahumato kaewamu dakumalibu-angko bente maka dakumombuko bhe dasumekehiko damai fato wala. ⁴⁴Andoa na'a damohansuruko bhe kosasawindo mie meatefiko. Ne kahondomino bentemu pae daehunsaangko kontu so potapi'ano nahaa poi, mba'inomo miina motindae wakutuuno Lahata'ala nofotiwohaangkomo kaasino.”

Yesus nofekangkilo Lambuno Lahata'ala

19:45-48

Mat 21:12-13;

Mrk 11:15-18; Yoh 2:13-16

⁴⁵Pada ana'a Yesus nopesuamo weo kadeteno Lambuno Lahata'ala maka nogihasi sabhaha podaoano ne itu. ⁴⁶Ambano Yesus, “Nandoo notibuhi weo Kitabi peda ini, ‘Lambuku lambu kasambahe'a, tamaka hintimiu habue'omu mbali lia ka'onu'ando mie modai.’”^b

⁴⁷Se'o-se'oleo Yesus nofofoina'u weo Lambuno Lahata'ala. Neangka'indo imamu, pande-pande Kitabi bhe neangka'indo miendo Yahudi de'ondefi akala damongkoe. ⁴⁸Ampamo kaowu miina damande'aanea nada amai dhalano, kapa'amo kosasawindo ra'eati notihela lalondo dametingke kafoina'uno.

^a 19:38 Mzm 118:26

^b 19:46 Yes 56:7; Yer 7:11

Dofeena'ao kuasano Yesus

20:1-8

Mat 21:23-27; Mrk 11:27-33

20 Se'oleo Yesus nefoina'u mie bhahi weo Lambuno Laha-ta'ala bhe nofohatoanda Bhihita Metaa. Gaha'a dohatomo dua neangka'indo imam, pande-pande Kitabi bhe kamu-kamungkula'indo Yahudi. ²Andoa ini dopugaumo ne Yesus ambado, “Fohato kainsami: o ae gaha'a kaengkoha'ano kuasa mehabu sabhaha giu itu. Nofopooliko la'ae bhahaa?” ³Yesus tanotobhoosi ambano, “O Idi ameena dua. Soba fohato kanau'omu. ⁴Nomai'ao ne amai bhahaa kuasano Yohanes nofokadiu? Nomai'ao ne Laha-ta'ala kaa nomai'ao ne manusia?” ⁵Pada aitu dopuga-pugaumo sapada-pada andoa ambado, “Ane dapugau'omu nomai'ao ne Laha-ta'ala, tetewei namugau, ‘Noafa gaha'a miina marasaea'aneomua?’ ⁶Tamaka ane dapugau nomai'ao ne manusia, kosasawindo ra'eati dafobhatumbuli'ao kontu, kapa'amo doparasaea'e mpuu Yohanes maitu seemie anabii.” ⁷Pada aitu dotobhoosimo, “Miina tamande'aanea.” ⁸Ambano toha Yesus, “Ane peda itu, paise dua amohatokoomua kaengkoha'ano kuasaku aehabu sabhaha giu amaitu.”

Kapalendano kumahadhaano te kaampono angguru

20:9-19

Mat 21:33-46; Mrk 12:1-12

⁹Pada peda na'a Yesus netula-tula'aomo kapalenda aini ne mie bhahi. “Nandoo seemie nelengka kaampo maka nekantisaane angguru. Pada aitu neponambomo mie so kumahadhaa'e maka nokala we koliwuno miina nakotempo. ¹⁰Nohato wulano defo'onu pehapi, netudumo seemie bhatuano nakumala ne kumahadhaano te kaampono anggurunu na'a, so namala'ao dawuno. Tamaka mie kumahadhaano tadohambisi bhatua ana'a maka dotudue nasumuli haa mbali limano. ¹¹Pada aitu kafeompu'a na'a netudumo dua bhatua sigao'ano, tamaka katuduno maitu dohambisiemo dua bhe dofekonsana-nsanai'e maka dotudue nasumuli haa mbali limano. ¹²Pada aitu ne katolu pakumo netudu toha seemie bhatua, tamaka tadobhelai maka do'ohoe we kundo ala. ¹³Nokodukumo lalono kafeompu'a kokaampono na'a, ‘Kaowu aeafamo bhahaa? Ingka atumudumo anaku kamoasi'aoku ini, tetewei daengatie.’ ¹⁴Tamaka sadowoha anano kafeompu'ando, kumahadhaano dopugau-gaumo ambado, ‘Anoamo ini so kohaku'aono kahunsa'aono, dopongkoe'anaomu, neanomo kahunsa'aono somo

intaodiomu.’¹⁵ Pada ana'a dobulue we kundo ala maka dopongkoe.”
 [Pada aitu Yesus nofeenadamo ambano,] “Nasumuli kokaampono,
 namafa'iandamo bhahaa kumahadhaano na'a? ¹⁶Ingka tetewei
 namai namongkolida, maka kaampono na'a nama'andae mie si-
 gao'ano so kumahadhaa'e.” Dofetingke peda maitu mie bhahi
 dopugaumo ambado, “Tetewei paise!” ¹⁷Tamaka Yesus no'ondoda
 bhe nopugau ambano, “Ane peda na'a, o ae bhahaa ma'anano
 aeatino Kitabi aini? ‘Kontu ne'ohondo mefelambuno, gaha'a ne-
 mbalimo sandi bhalano!’^a ¹⁸Sasuka mondawuno te wawono kontu
 ana'a naowita, nendawutino kontu aitu naopuhu.” ¹⁹Pande-pande
 Kitabi bhe neangka'indo imamumu de'ondofi akala dahumakoe,
 kapa'amo dopande'aane kapalenda amaitu nokantibha andoa,
 tamaka dote'i mie bhahi.

Tandua'ano sewa ne Omputo Kaisar

20:20-26

Mat 22:15-22; Mrk 12:13-17

²⁰ Pande-pande Kitabi bhe neangka'indo imamumu doka'o-ka'ondo
 Yesus. Detuduanemo mata-mata woha-woha'ano mie melaano lalo,
 so dametando'ao alano wambano. Patudhundo neanomo naembali
 dahumakoe maka daowae ne limano gubernur, mintahano kuasa
 bhe kabhotusi weo liwu. ²¹Mie andoa maitu dofeenaemo ambado,
 “Guru, tapande'aane sabhaha pugau bhe kafoina'umu nokotu'u,
 miina po'ala-alaanda manusia, tamaka weo kalaano lalomu fo-
 foina'u'ao sala metaano Lahata'ala so manusia. ²²Weo tubhono
 agamantoomu, naembali bhahaa datumanduo sewa ne Omputo
 Kaisar kaa paise?” ²³Tamaka Yesus nopande'aane patudhundo
 da'umakalai'e, dadi nopugaumo ambano, ²⁴“Fotiwoha kanau'omu
 nasewoka dhoi pera itu. Gambarano ula bhe nea la'ae gaha'a ini?”
 Ambado, “Ulano bhe neano Omputo Kaisar.” ²⁵Nopugaumo toha
 Yesus ambano, “Bahangka peda na'a, fehebua'ano Omputo Kaisar
 wa'aneomu Omputo Kaisar; fehebua'ano Lahata'ala wa'aneomu
 Lahata'ala!” ²⁶Andoa miina damooliea dofetando alano wambano
 ne wisendo mie bhahi; tadomente dofetingke katobhoosino, sampe
 miina dakowobhaa.

^a 20:17 Mzm 118:22

Miendo Saduki dofeena'ao kawanu'ando mie mate

20:27-40

Mat 22:23-33; Mrk 12:18-27

²⁷Nandoo seemie hodua miendo Saduki domai ne Yesus. Andoa ini miina damarasaea kawanu'ando mie mate. ²⁸Dofeenamo ne Yesus ambado, “Guru, anabii Musa nebuhi pahinta so intaodiomu peda ini: Ane seemie mo'ane nomate tamaka hobhineno miina'o nakoanaa, maka kakuta'ano mo'ane tetewei nagumaa bhe bhihinandano na'a, neanomo kakuta'ano mateno maitu nakosampu'a dua.^a ²⁹Gaha'a nandoo dopipitu dosekakuta'a sanea mo'ane. Titiisa nogaa tamaka nomate miina'o nakoanaa. ³⁰Dadi'anomo katuluno nogaamo bhe bhihinandano na'a tamaka miina'o nakoanaa nomatemo dua. ³¹Pada aitu hobhine ana'a nogaa'anemo dua katuluno, tapedamo aitu kopipitundo dopotulu-tulu dogaa'ane tamaka sanea domate miina dakoanaa. ³²Panda-pandano hobhine na'a nomatemo dua. ³³Kaowu nada amai ne oleo kawanu'ando mie mate? Somo mieno lambu la'ae bhahaa hobhine amaitu? Ingka kopipitundo sanea gumaa'ane?” ³⁴Notobhoosimo Yesus ambano, “Mie te dhunia ini dogaa bhe dofogaada, ³⁵tamaka nahumato oleo kawanu'ando mie mate, mie mantasino so mesuano we dhunia bu'ou na'a pae dagumaa, pae dua damogaada. ³⁶Andoa na'a paemo bhe kapoolia damatea, dapototomo bhe mala'ekati. Kapa'amo andoa maitu ana'inomo Lahata'ala, mie toka nefowanuno mai'ao ne mate. ³⁷Ingka wutono anabii Musa padamo nofohato kaita mentalea-mentalea so kawanu'ando mie mate. Aini notibuhi weo Kitabino metula-tula'aono sau kokihi humendeno. Ne itu Ompu nokonae Lahata'alano Abraham, Lahata'alano Ishak bhe Lahata'alano Yakub.^b ³⁸Ompu suano Lahata'alando mie mate, tamaka Lahata'alando mie dumadi. Kapa'amo ne wiseno Lahata'ala kosa-sawindo mie dodadi.” ³⁹Dofetingke peda na'a pande-pande Kitabi seemie hodua dopugaumo ambado, “Guru, ingka netaa mpuu katobhoosimu na'a.” ⁴⁰Dadi'anomo miinamo daokadoa dakoni-feena'ao ne Yesus.

^a 20:28 Ul 25:5

^b 20:37 Kel 3:6

Pokai'ano Yesus bhe Daud

20:41-44

Mat 22:41-46; Mrk 12:35-37

⁴¹Nopugaumo toha Yesus ambano, “Noafa bhahaa Mesias Omputo Fosalamatino maitu dokonaane sampu'ano Daud? ⁴²Kapa'amo wutono Daud weo Kitabino Laguno nopugau peda ini,

‘Ompu Lahata'ala nokowambamo ne Ompuku,
Mengkohamo ne suanaku ini,

⁴³ampa kosasawindo kaewamu ahumabuda so
kafinda'amu.’^a

⁴⁴Dadi'anomo ane Daud nokonae Ompuno, noafa'ao dua nembali sampu'ano?”

Yesus nofodhaga daposi'ondo ne pande-pande Kitabi

20:45-47

Mat 23:5-7; Mrk 12:38-40

⁴⁵Tangasano mie bhahi dofetingke kafoina'uno, nopugaumo Yesus ne anaguhu'ino ambano, ⁴⁶“Posi'ondoomu ne pande-pande Kitabi! Andoa maitu doasiane dolili depake dhuba kawanta bhe do-poindalo sepali'a dofosibhalada we wuntano dao. Weo lambu kasambahea'a doasiane dengkohe te wise-wise, weo kahame dengkohe ne kaengkoha'ando kabhala. ⁴⁷Andoa debhohe-bhohe'i bhihinanda maka dorampasi lambudo. Pakade keana notipande'ao kadaino isikadhindo, tadofekawanta-wantamo sambaheando. Dadi'anomo nasedhulu'a dua kabhie kahukumu so ne'awando.”

Sadhakaano bhihinanda mokaeno

21:1-4

Mrk 12:41-44

21 Weo Lambuno Lahata'ala Yesus nofowanu fotuno, gaha'a no-wohamo mie hangkaea dofopesua sadhakaando ne sohonga-no sadhaka. ²Tanowohamo dua seemie bhihinanda mokaeno nofopesua sadhakaano haa kepe weo sohonga na'a. ³Nopugaumo Yesus ambano, “Amohatokoomu inia, kotu-kotu'u nobhahi kafopesua'ano bhihinanda mokaeno ini bhe kosasawi'ae kafopesua'ando mie sigao'ano. ⁴Kapa'amo mie bhahi maitu dosadhaka'ao labhino kanandoodo, tamaka bhihinanda aini weo kakaeno nofowa'ao kosasawi'ae so kadadi'ano.”

^a 20:42-43 Mzm 110:1

Yesus nokowamba'ao so kahansuru'ano Lambuno Lahata'ala

21:5-6

Mat 24:1-2; Mrk 13:1-2

⁵Nandoo mie detula-tula'ao Lambuno Lahata'ala, damente'ao kakesano dolegasiane sabhaha kontu mokesa bhe sabhaha bara kafoampendo mie. Tamaka Yesus nopugaumo ambano, ⁶“Sabhaha newohamiau itu, nahumato tempono bhe nasepoi kontu pae bhe so tumapi'ano te wawono kontu bhaino, kosasawi'ae damadae damohansurue.”

Katanda'ano kakadee-dee

21:7-19

Mat 24:3-14; Mrk 13:3-13

⁷Dofeenamo anaguhu'ino ne Yesus ambado, “Guru, naefie bhahaa kosasawi'ae na'a nakumadhadhia? Maka o ae so katandaino ane nahumato tempono?” ⁸Ambano Yesus, “Kodhagaomu, bhahasaa dofokolilino totono lalomiu. Kapa'amo dobhahi mie so maino damake neaku bhe dapugau, ‘Idimo ini Mesias, tempono nomamo.’ Koise angkafidaomua. ⁹Ane me'awaomu bhihitano popahisa'a tawa kahungano liwu koise koheduomua, kapa'amo kosasawi'ae maitu tetewei nakumadhadhia deki. Ampamo kaowu miina nakoma'ana putae nahumatomo dua aitu kafetompaino dhamani.” ¹⁰Nofohatodamo dua ambano, “Liwu dapowangi bhe liwu, kakolaki'a dapowangi bhe kakolaki'a. ¹¹Ne'amai-ne'amai nandumandoo luali bhalano, hopu bhe gaba. Nakumadhadhia dua katikenda'a lalo bhe tanda-tanda timote'i te lani. ¹²Ampamo kaowu pae'o nakumadhadhia kosasawi'ae na'a, dahumakokoomu maka damodee-deekoomu, dabhitahakikoomu weo lambu kasambahea'a bhe datumohongkukoomu. Datumondakoomu ne wisendo kabhalano liwu bhe kafeompu'a mba'inomo kaparasaeamiau ne Idi. ¹³Anoa na'a somo katolalamiu membaliomu sakusiiku.

¹⁴Dadi'anomo fotohoomu lalomiu, koemo pa'indulu nekendakenda handamiau nada amai potundu'ao wutomiu. ¹⁵Kapa'amo wutoku so ma'angkoomu pugau kotimbang, sampe kosasawindo kaewamiau paise damondoiea dapowangiane tawa dagumagai pugamiau. ¹⁶Kamungkula'imiu damowakoomu ne limando kaewa, pedamo dua kakuta'amiau, bhahitie'imiu bhe sabhangka'imiu, sampe seemie hodua ne olotamiau itu damongkoda. ¹⁷Hintimiu dabansikoomu sabhaha mie hampano kaparasaeamiau ne Idi. ¹⁸Tamaka

bhe nasetangke wuluno fotumiu pae namiinaea. ¹⁹ Ane potaamiomu, sumalamatiomu bhe me'awaomu dadi sakotu'uno.”

So kahansuru'ano Yerusalem

21:20-24

Mat 24:15-21; Mrk 13:14-19

²⁰“Ane mohaomu kaowu kotano Yerusalem dalumibu-libue tantara, pande'aneanoomu ingka tempono so kahansuru'ano noma'omo. ²¹Wakutuu ana'a mie we kadieno Yudea tabeano damilei te kokabhawo'ano so dasumalamati'ao, mie weo kota tabeano dagumampi we simbalino kota, bhe mie we sembalino kota koemo dopesua weo kota. ²²Kapa'amo ana'a temponomo kahukumu mai'ao ne Lahata'ala, somo nako'ula'ao kosasawi'ae tibuhino weo Kitabi. ²³Kadaino maka kolaundo hobhine'i fowoowano tawa fofotitino ne wakutuu ana'a, kapa'amo ne na'a ne kosekadie'ae nandumandoo kasabha foliuno kabhibhiisa. Weo amahano Lahata'ala nahumukumu miendo Israel. ²⁴Siga'a damongkoanda kampue, siga'a dawowo'oda so katohongku ne sabhaha onuno liwu ne dhunia ini. Kotano Yerusalem dapokafinda'iane sabhaha bansano liwu tapa mande'ao-no Lahata'ala ampa nakumapo tempo nefotantuno Lahata'ala so andoa.”

Kahato'ano Anano Manusia

21:25-28

Mat 24:29-31; Mrk 13:24-27

²⁵“Mada kaowu natiwoha tanda-tanda ne wula, ne oleo bhe kulipopo. Ne dhunia ini sabhaha bansano liwu daote'i sepali'a bhe miinamo dakototonolaloa dawiseki guhuntumano bhe ewono te'i. ²⁶Mie damate'aomo kate'i mba'inomo kamihino lalondo dawiseki sabhaha kumadhadhia'ano ne dhunia, kapa'amo sabhaha waweno alamu naohungga. ²⁷Wakutuu ana'a Anano Manusia – Idimo ini – damohae namai te olu, natiwoha weo kakalabhiano bhe kuasa bhalano.^a ²⁸Ane mohaomu kaowu kafetompuna'ino kadhadhia amaitu, eheomu, fowanu fotumiu kapa'amo noma'omo tempono damosalamatikoomu.”

^a 21:27 Dan 7:13

Kapalendano pu'uno woha'a

21:29-33

Mat 24:32-35; Mrk 13:28-31

²⁹Pada ana'a Yesus nofohotoandamo kapalenda ambano, “Soba fe'ondoomu pu'uno woha'a^a bhe pu'uno sau sigao'ano. ³⁰Ane mo-haomu kaowu pu'uno sau na'a natumawo, ingka pande'aaneomu noma'omo nako'oleo. ³¹Pedamo dua na'a ane mohaemoomu sabhaha kadhadhia nepulao'aoku sa'ituini, pande'aanemoomu Kafopahinta'ano Lahata'ala noma'omo. ³²Amohatokoomu! Kotu-kotu'u mie dhamani aini pae'o daopulia damate, nakumadhadhiamu kosasawi'ae na'a. ³³O lani bhe dhunia naosali, tamaka wambaku ini pae bhe kasalia.”

Katangahi dakodhaga

21:34-38

³⁴“Dhagani wutomiu, bhasasaa totono lalomiu notahusu'ao fe-kihiano kahame bhe foho-foho'u bhe kafaraluuno dhunia. Kapa'amo ane nada ana'a Oleono Ompu nakumahatokoomu kabeanga kabhahinta. ³⁵Kapa'amo oleo ana'a nakumangkanai kosasawindo mie meateno te dhunia ini. ³⁶Kodha-kodhagaomu bhe sadhia sambahea'omu, neanomo me'awaomu ka'osa lumapa'ao'omu ne sabhaha so kumadhadhia'ano na'a bhe naembali meehe-eheomu te wiseno Anano Manusia.”

³⁷Ole-oleo Yesus nofofoina'u weo Lambuno Lahata'ala, hatu kohondo'a nokalamo noodu te kabhawo konea'ano kabhawono Zaitun. ³⁸Hangko-hangkowine kosasawindo mie bhahi dohatomo ne Yesus weo Lambuno Lahata'ala dametingke'ao pugauno.

Patudhu damongko Yesus

22:1-2

*Mat 26:1-5;**Mrk 14:1-2; Yoh 11:45-53*

22 Hoha'ano Roti Pata Koragi'ano nekonando Paska noma'omo. ²Neangka'indo imamu bhe pande-pande Kitabi de'ondofi dhala damongko Yesus tamaka pae daefemata-mataa, hampano dote'i mie bhahi.

^a 21:29 Sakotu'uno: *pu'uno ara*.

Isikadhi modaino Yudas

22:3-6

Mat 26:14-16; Mrk 14:10-11

³Wakutuu ana'a totono lalono Yudas Iskariot nopesuakiemo Kafeompu'ando seetani. Anoa ini seemie mai'ao ne anaguhu'ino Yesus ompulu hoduanu. ⁴Dadi'anomo Yudas nokalamo ne meangka'indo imam u bhe neangka'indo dhagano Lambuno Lahata'ala napokanagau'ao dhalano namowaanda Yesus. ⁵Andoa maitu do'ia sepali'a sampe domafakaane dama'ane dhoi. ⁶Yudas no'undapida maka notanda ne na'a ne'ondofimo katolala metaa namowaandae, tamaka pae naefemata-mataa ne mie bhahi.

Fotoka'ano haroano Paska

22:7-13

Mat 26:17-19; Mrk 14:12-16

⁷Hohaea'ano Roti Pata Koragi'ano nohatomo. Ne oleo ana'a mien do Yahudi tabeano desumbele dhumbano Paska. ⁸Yesus notudumo Petrus bhe Yohanes ambano, “Kala mefotoka kaitaomu haroano Paska so daomaa'omu.” ⁹Dopugaumo ambado, “Taefotoka ne amai bhahaa gaomu?” ¹⁰Ambano Yesus, “Mesua'omu kaowu weo kota po'awa'ao'omu seemie bhe kasodano kai'ino oe. Angkafie'omu ampa se lambu kapesua'ano. ¹¹Fohatoomu kolambuno na'a putae, ‘Guru nofeena'ao bhaha'i boloku amai so napoharoa'ao Paska bhe anaguhu'ino.’ ¹²Mie ana'a namosusuangkoomu boloku bhalano te wawo nosangkamo katokano. Mefotoka kaitaomu ne itu.” ¹³Anaguhu'ino hoduanu na'a dokalamo maka dopo'awa'ao nopobutu bhe pugauno Yesus. Pada aitu defotokamo haroano Paska.

Haroano Ompu

22:14-23

*Mat 26:20-29; Mrk 14:17-25;**Yoh 13:21-30; 1Kor 11:23-25*

¹⁴Nohato kaowu tempono, Yesus nengkohamo naomaa napombali-mbali bhe rasulu'ino. ¹⁵Nopugaumo ne anaguhu'ino ambano, “Nokamba mpuu laloku aomaa haroano Paska ini bhe hintimiu tinangke miina'o akumadee-dee. ¹⁶Amohatokoomu: haroa medando aini paemo aomaa'ea sampe nako'ula ma'anano haroa aini weo dhunia bu'ou Kafopahinta'ano Lahata'ala.” ¹⁷Pada aitu nealamo kampoho'u'a, nfoampe katumpuno lalo ne Lahata'ala maka ambano, “Alae'omu maka podawu-dawue'omu. ¹⁸Kapa'amo amohatokoomu notanda aitu paemo aoho'u angguru sampe nahumato

Kafopahinta'ano Lahata'ala.”¹⁹ Pada ana'a nealamo dua roti, nefoampe katumpuno lalo, nobhebhehae maka nodawu-dawuandae anaguhu'ino. Ambano, “Mbadhakumo inia, newa'aoku so hintimiu, habuomu nada ini somo kafe'ulaimiu ne Idi.”²⁰ Peda dua ana'a palusi dohumaa nealamo toha kampoho'u'a bhe nopugau, “Kampoho'u'a aini podhandi bu'ouno Lahata'ala bhe manusia, dofekatangkaane tuhuno heaku. Heakumo ini nefotuhu so hintimiu.²¹ Tamaka, soba ondoomu, limano mie so mowa kanau ne kaewa, nopobhai kanau ne medha aini.²² Kapa'amo Anano Manusia tetewei namate peda toka nefotantuno Lahata'ala, tamaka nabalaamo mie mowae ne kaewa!”²³ Anaguhu'ino tadopofee-feenamona sapada-pada andoa bhaha'i la'ae ne olotando so mehabuno nada na'a.

Potaga-tagali'a tangasano dopoharoa

22:24-30

²⁴Gaha'a nonandoomo dua potaga-tagali'a ne olotando anaguhu'ino, bhaha'i la'ae ne olotando maitu so mantasi'ano doabhie foliuno kabhala.²⁵ Nopugaumo Yesus ne andoa ambano, “Ingka pande'aaneomu kafeompu'ando sabhaha bansano liwu pata mande'aono Lahata'ala dopahintangi ra'eatindo, mie mintahano kuasa dokonadamo kafeolu'ando ra'eati.²⁶ Tamaka hintimiu pae naembali nada na'a. Mie nefokoisa foliuno kabhala tabeano nahumabu nada mie nefokoai, mie neangka tabeano na'umondofao kafaraluundo mie bhaindo.²⁷ La'ae bhahaa foliuno kabhala? Mengkohano momaano kaa fo'ondofaono? Ingka momaano. Tamaka Idi ini ne olotamiu kanggetu fo'ondofaono.²⁸ Hintimiu sadaa-daa pobhai kanau'omu weo sabhaha kasabha netompaloiku.²⁹ Tapedamo Amaku nowa'a kanau kuasa afopahintangi, nadamo dua o Idi ama'angkoomu kuasa fopahintangiomu.³⁰ Ne na'a hintimiu naembali momaa'omu mohouomu pombaliomu bhe Idi weo Kafopahinta'aku, bhe mengkohaomu ne kaengkoha'ano kolaki so mande'aono miendo Israel ompulu haa sampu'ano.”

Petrus nagumaga miina namande'ao Yesus

22:31-38

Mat 26:31-35;

Mrk 14:27-31; Yoh 13:36-38

³¹“Simon, Simon, fetingke kanau'o. Kafeompu'ando seetani pada nofealai nasumolo-solokoomu, tapedamo mie detepisao pae.

³²Tamaka Idi padamo asambahea'angko keana nosali kaparasaeamu. Nasumuli kaowu lalomu, fekatangkada lalondo bhahitie'imu.” ³³Ambano Petrus, “Ompu, a'undamo atitohongku bhe amate apoowa bhe Hintu!” ³⁴Tamaka ambano Yesus, “Petrus, amohatoko. Alo aini dua pae'o nakumakuhua manu, natolu pakumu gumaga putae miina mande'a kanau.”

³⁵Pada ana'a nofeenadamo ambano, “Wakutuuno atudukoomu paise mewowo'omu kadu-kaduno dhoi, bhaku tawa kaampini, bhahaa mokae'ao'omu ae?” ³⁶Ambado, “Miina sepali'a.” Ambano toha Yesus, “Tamaka aitu la'ae kokadu-kaduno dhoino tetewei nawowo'e, pedamo dua ana'a kobhakuno. Maka la'ae tapa kokampueno naetaa naeaso pakeano maka nae'oli kampue. ³⁷Kapa'amo amohatokoomu, aeatino Kitabi tetewei nako'ulamo ne Idi peda ini, 'Anoa notilentu mie modai.’^a Hampano sabhaha tibuhino mulao'aono Idi napikiko'ulamo.” ³⁸Dopugaumo anaguhu'ino, “Ingka nandoo kampue ne ini haa mata.” Ambano Yesus, “Netaamo.”

Te kaendeano Getsemani

22:39-46

Mat 26:36-46; Mrk 14:32-42

³⁹Pada ana'a Yesus nokalamo we simbalino kota, peda kaneano nohope te kabhawono Zaitun. Anaguhu'ino doangkafie dua. ⁴⁰Sahatono ne itu nopugaumo ambano, “Sambahea'omu keana nokangkanaikoomu kasoba.” ⁴¹Palusi aitu nofogaati wutono nape sekakulambi'a kakodo'ono, nofongkohamo tuuno maka nosambahea. ⁴²Ambano, “Amaku, ane umunda fogampi kana'e sabhaha kakadee-dee so netompaloiku,^b ampamo kaowu suano kapoindaloku tamaka kapoindalomu so kumadhadhia'ano.” ⁴³Gaha'a nomai'iemoseemie mala'ekati nomai'ao te lani nofekatangka lalono. ⁴⁴Yesus nomahasai sepali'a lalono maka sadhulu-dhulu kakampuu-mpuu nosambahea. Antino tapedamo hea nobubuka nopotuhu ne wite. ⁴⁵Palusi nosambahea, nohemo nosuli se anaguhu'ino tamaka nohatofida nandoo doodo hampano kakompeahano lalondo. ⁴⁶Nopugaumo Yesus ambano, “Noafa gaha'a moodo'ao'omu? Wanumoomu sambahea'omu keana nokangkanaikoomu kasoba.”

^a 22:37 Yes 53:12

^b 22:42 Sakotu'uno: *kampoho'u'a ini*.

Yesus dohakoe

22:47-53

*Mat 26:47-56;
Mrk 14:43-50; Yoh 18:1-11*

⁴⁷Tangasano Yesus nopugau, dohatomo mie setagua, nopa'induluanda Yudas, seemie mai'aono ne anaguhuno ompulu hoduano. Nohato Yudas noma'otimo Yesus bhe nowonoe. ⁴⁸Ambano Yesus, "Yudas, o kawono gaha'a tanda nepakemu mowa Anano Manusia ne limando kaewa?" ⁴⁹Dowoha so kumadhadhia'ano maitu mie poangkafi'aono Yesus dofeenamo, "Ompu, tatumoweliandamo kampue bhahaa?" ⁵⁰Seemie anaguhu'ino notowe bhatuano imamubhalano sampe nondawu tingalano we suana. ⁵¹Tamaka Yesus tanopugau ambano, "Da'omo itu." Lasao nofedampa tingalano mie ana'a maka nofeka'uhie.

⁵²Palusi ana'a nopugaumo Yesus ne meangka'indo imamub, angka'indo dhagano Lambuno Lahata'ala bhe kamu-kamungkula'i maino so humakoe, ambano, "Kona kanau'omu mie modai gaha'a sampe metaguomu kampue bhe kawangku?" ⁵³Ingka se'o-se'oleo apoowa-owa bhe hintimiu weo Lambuno Lahata'ala tamaka miina humako kanau'omu. Ampamo kaowu aitu nohatomo wakutuumiu, aini'aemo tempono kuasano kahohondo."

Petrus nogaga miina namande'ao Yesus

22:54-62

*Mat 26:57-58, 69-75;
Mrk 14:53-54, 66-72; Yoh 18:12-18, 25-27*

⁵⁴Pada ana'a Yesus dohakoemo maka dowowo'oe we lambuno Imamubhalano. Petrus noangka-angka mbonoda. ⁵⁵We wuntawuntano kadeteno lambu na'a bhe mie detampo efi maka dengkoha dolibu-libue. Petrus nengkohamo dua bhe andoa. ⁵⁶Gaha'a seemie bhatua hobhine nowoha Petrus nengkoha-ngkoha ne owano efi, nofoti-fotindaemo maka nopugau ambano, "Mie aini ingka pobhai'ano mie amaitu." ⁵⁷Tamaka Petrus nogaga ambano, "Alee hobhine, ingka miina amande'aanea mie amaitu." ⁵⁸Miina naompona nowohaemo dua mie sigao'ano bhe nopugau, "Hintu ini seemie dua sabhangkando!" Tamaka ambano Petrus, "Alee mo'ane, suano idia!" ⁵⁹Napesedhamu pada ana'a nopugaumo dua seemie ambano, "Kotu-kotu'u anoa ini pobhai'anomo, kapa'amo anoa ini mieno Galilea dua." ⁶⁰Tamaka ambano Petrus, "Alee mo'ane, ingka suano! Miina amande'aanea ma'anano pugaumu na'a." Gaha'a

tangasano nopugau tanosikakuhua'amo manu. ⁶¹Ompu nodoli no'ondomo Petrus, maka Petrus nofe'ulaimo pugauno Ompu, "Pae'o nakumakuhua'a manu alo aini, natolu pakumo gumaga miina mande'a kanau." ⁶²Petrus lasao nolimba bhe no'ae, nokompeaha sepali'a lalono.

Yesus ne wiseno Sahano Agama

22:63-71

Mat 26:63-68;

Mrk 14:60-65; Yoh 18:19-24

⁶³Mie dhumaganino Yesus doele-elee bhe dohambisie. ⁶⁴Mata-no dodampue maka dofeenae ambado, "Alee anabii, soba bhotoe la'ae humambisiko itua?" ⁶⁵Nobhahi dua kafeka'aebu sigao'ano nepugau'aondo ne Anoa. ⁶⁶Hato nomentae dosihompumo kamu-kamungkula'indo Yahudi, neangka'indo imamumu bhe pande-pande Kitabi maka doowa Yesus te wiseno Sahano Agama. ⁶⁷Ambado, "Ane hintu ini kotu'u Mesias Omputo Fosalamatino, fohato kainsami." Ambano Yesus, "Mahingga amohatokoomu, tetewei pae marasaea'omua. ⁶⁸Mahingga ameenakoomu, ingka pae tumobhoosi kanau'omua. ⁶⁹Notandamo aitu Anano Manusia nengkohamo ne suanano Lahata'ala kokuasano." ⁷⁰Kosasawindo dopugau ambado, "Ane peda na'a, gaha'a hintu ini Anano Lahata'ala?" Ambano Yesus, "Ingka peda pugauimu itu." ⁷¹Ambado dua, "So dua ae dae'ondofiomu sakusii? Ingka dofetingkee'omu nopugau'ao wutono."

Yesus ne wiseno Pilatus

23:1-7

Mat 27:1-2, 11-14;

Mrk 15:1-5; Yoh 18:28-38

23 Kosasawindo Sahano Agama na'a doehemo maka doowa Yesus se Pilatus. ²Dohato dosangkatiemo ambado, "Tahatofie mie aini nefekakolilino ra'eati mani, pakade no'ele'a kainsami tatumanduo sewa ne Omputo Kaisar. Anoa nokona dua wutono Kristus, ma'anano Omputo Fosalamatino." ³Pilatus nofeenamo ne Yesus ambano, "Hintumo ini omputo miendo Yahudi?" Ambano Yesus, "Pedamo pugauimu na'a." ⁴Nopugaumo Pilatus ne meangka'indo imamumu bhe ne mie bhahi ambano, "Miina sepali'a aepo'awa'ao ka'alano mie aini." ⁵Tamaka andoa maitu dhulu ka'osa dowadhumpae ambado, "Anoa ini nehabu kahungga-no liwu, ra'eati ne Yudea kosekadie'ae nowudhuanda kafoina'uno,

notanda we Galilea ampa we ini.”⁶ Sanofetingke peda maitu Pilatus nofeenamo bhaha'i Yesus maitu mieno Galilea.⁷ Nopande'aane kaowu Yesus nomai'ao we kadie neowano Herodes, Pilatus nofutudumo daowae te wiseno Herodes. Wakutuu ana'a kolaki Herodes nandoo'e dua we kotano Yerusalem.

Yesus ne wiseno Herodes

23:8-12

⁸Sanowoha Yesus, kolaki Herodes no'ia sepali'a, kapa'amo nomponamo gaono namohae. Nentuhumo nofetingke bhihitano bhe gaono mpuu namoha Yesus naehabuane tanda timent'e'aono.⁹ Nobhahi nefeena'aono ne Yesus, tamaka Yesus miina sepali'a natumobhoosiea.¹⁰ Tangasano nofee-feenae na'a, neangka'indo imamu bhe pande-pande Kitabi dodhulumo te wise dokei'ao sabhaha kasangkatindo.¹¹ Notanda ne itu Herodes bhe tantara'ino dofeka'aebumo Yesus bhe doele-elee, pada ana'a dofokanaanemo dhubano kolaki maka dofosulie se Pilatus.¹² Notandamo oleo aitu Herodes bhe Pilatus doposabhangkamo; kumundo'ano sadhia dopowengke.

Yesus nosuli ne wiseno Pilatus

23:13-25

Mat 27:15-26;

Mrk 15:6-15; Yoh 18:38-19:16

¹³Pada ana'a Pilatus nofohompumo neangka'indo imamu, kamungkula'i bhe ra'eati,¹⁴ maka nopugau ne andoa ambano, “Mie aini owae'omu ne wiseku, ambamiu nefekakolilino ra'eati. Ingka padamo apahakesaa'e ne wisemiu, tamaka miina sepali'a apo'awa'ao ka'alano mie aini peda nesangkatimiu itu.¹⁵ Pedamo dua na'a kolaki Herodes, sampe mie aini nofosulie toha ne insaodi. Saktu'u'ano miina nakonihabua so mantasi'ano damongkoe.¹⁶ Dadi'ano mo amepokie maka amolapae.”

¹⁷[Ne oleono hohaea'a pedando na'a Pilatus tabeano sadhia nefolapaanda seemie katohongku.]¹⁸ Tamaka kosasawindo dosikei-kei'amo ambado, “Pongko mie aitu, folapa kainsami Barabas!”¹⁹ Gaha'aitumo Barabas ini dotohongkue mba'inomo neangkafi kahungga weo kota bhe nofopongko.²⁰ Nofendua toha Pilatus nopugau nofekahaa-haa'ie ne mie bhahi, hampano gaono namolapa Yesus.²¹ Tamaka andoa tadokei ambado, “Kantai'e te sau salipu!

Kantai'e te sau salipu!" ²²Tolu paku'aomo aini Pilatus nopugau ambano, "Tamaka habu modai medando ae gaha'a nehabuno mie aini? Ingka miina sepali'a apo'awa'ao ka'ala so mantasi'ano damongkoe. Dadi'anomo amepokie maka amolapae." ²³Tamaka dowadhumpae kansuhu bhe dokei desalo Yesus dakumantai'e te sau salipu. Panda-pandano dofotalo'aomo keindo. ²⁴Dadi'anomo Pilatus nobhotusiemo damangkafi kamesalondo. ²⁵Katohongku sa'itu-ini, mie mehabuno kahungga bhe fopongkono na'a, nofolapaandae-mo peda kamesalondo, tamaka Yesus noowaandae dahumabue ampa kapoindalondo.

Yesus dowowo'oe we sembalino kota

23:26-32

²⁶Wakutuuno dowowo'o Yesus we sembalino kota, detaangimo seemie konea'ano Simon miendo Kirene maka dofotongkuane sau salipuno Yesus bhe dotudue namangkafie. Anoa ini kane'o nosuli mai'ao we simbalino kota. ²⁷Dobhahi sepali'a mie mangkafino Yesus, ne olotando mie bhahi maitu dobhahi dua hobhine'i do'aefie bhe dekangko'ae. ²⁸Gaha'a Yesus tanodolikida bhe nopugau ambano, "Alee hobhine'ino Yerusalem, koise mo'aefiomu Idi, tamaka mo'aefi wutomiu bhe ana'imiu. ²⁹Kapa'amo mada kaowu nahumato tempono o mie dapugau, 'Nokodawua mpuu hobhine mo'afano, tapa mefolenteno ana'i bhe tapa fofotitino.' ³⁰Ne na'a mie dapugau ne gunu, 'Mosansa tabuhiki kainsami,' bhe ne kabhawo, 'Hohawu kainsami.'^a ³¹Kapa'amo ane sau mo'uhi dohabue peda ini, damafa'iane bhahaa sau kamateno?"^b ³²Nandoo dua dohodua mie modai newowo'ondo so damongko dapoowa-owa bhe Yesus.

Yesus dokantai'e te sau salipu

23:33-43

Mat 27:33-44;

Mrk 15:22-32; Yoh 19:17-24

³³Dohato te kabhawo konea'ano Ka'uada, Yesus dokantai'emo te sau salipu. Pedamo dua ana'a mie modai hoduanu, seemie we suanano, seemieno we kemano. ³⁴Nopugaumo Yesus ambano, "Ama,

^a 23:30 Hos 10:8; Pow 6:16

^b 23:31 Patudhuno sau mo'uhi ka'ibhatino mie pata koka'ala, wutono Yesus; sau kamateno ka'ibhatino mie koka'alano.

amponida kapa'amo miina damande'aanea nehabundo.” O tantara dodawu-dawumo pakeano, dopodaduane mbali notipande'aoane dawuno seemie-seemie. ³⁵Mie bhahi deehe-ehe ne itu do'ondo-ondo sabhaha kumadhadhia'ano. Kamu-kamungkula'i doele-elee ambado, “Mie sigao'ano nofosalamatida, ane kotu-kotu'u anoa ini Mesias, Omputo Fosalamatino nepilino Lahata'ala, ingka naetaamo namosalamatati wutono.” ³⁶O tantara doele-elee dua bhe domai dowa'ane angguru mokolo. ³⁷Ambado, “Ane hintu ini omputo miendo Yahudi fosalamatati wutomu.” ³⁸Te wawo, ne potala'ano fotuno, notibuhi “ANOAMO INI OMPUTO MIENDO YAHUDI.” ³⁹Seemie ne olotando mie modai tikantaino maitu nofeka'aebumo dua Yesus ambano, “Kuna'ekumo hintu ini Mesias. Soba fosalamatati wutomu bhe insaodi dua.” ⁴⁰Tamaka notangahiemo dua seemieno ambano, “Miina mote'i gaha'a ne Lahata'ala? Kahukumu ne'awamu ingka nopototo bhe anoa. ⁴¹Ampamo kaowu intaodi ini nopantasimo detahima kahukumu hampano kabhoosinomo habunto, tamaka mie aini miina sepali'a nakoka'alaa.” ⁴²Pada ana'a nopugaumo ne Yesus ambano, “Yesus, fe'ulai kanau humato membali Omputo.” ⁴³Nopugaumo Yesus ambano, “Amohatoko, se'oleo itu dua hintu pobhai kanau te surugaa.”^a

Kamate'ano Yesus

23:44-49

Mat 27:45-46;

Mrk 15:33-41; Yoh 19:28-30

⁴⁴Hambi-hambi ompulu haa mata pana oleo, kosekadie'ae ndapoe kahohondo ampa hambu tolu mata kama'oleono, ⁴⁵kapa'amo oleo miina nakotilangaa. Kai bhalano mbali kahondomi weo Lambuno Lahata'ala nopobhensi nopofelabunta.^b ⁴⁶Pada ana'a Yesus nokei nofekandii-ndii, “Ama, inawaku aposahuna'aanemo ne handano limamu.” Pada nopugau peda na'a nobhotumo. ⁴⁷Nowoha kadhadhia ana'a neangkando tantara nopudhi nofeka-kalabhia Lahata'ala ambano, “Kotu-kotu'u anoa aini mie banara!” ⁴⁸Dobhahi mie sihompuno ne itu do'ondo-ondo kumadhadhia'ano. Dowohae kaowu peda ana'a, kosasawindo dosulimo bhe dotofa mbadhandu ka'osano sosondo. ⁴⁹Kosasawindo mie popande'aono bhe Yesus tadeehe-ehemo we kodo'o'ano, pedamo dua na'a hobhine'i

^a 23:43 Sakotu'uno Firdaus, kaeate'ando mie dumadino suhue dhamani.

^b 23:45 Kel 26:31-33

mangkafie notanda we Galilea. Bhahi-bhahi'ae kadhadhia ana'a dowohae.

Yesus dokobuhue

23:50-56a

Mat 27:57-61;

Mrk 15:42-47; Yoh 19:38-42

⁵⁰Nandoo seemie konea'ano Yusuf, nopesua dua ne Sahano Agama. Anoa ini mie metaa bhe mie banara, ⁵¹sampe miina namangkafie kabhotusi bhe habundo Sahano Agama maitu. Yusuf ini nomai'ao we Arimatea, liwundo dua miendo Yahudi. Anoa neanta-antagi dua kahato'ano Kafopahinta'ano Lahata'ala. ⁵²Anoa nokalamo nopo'awa'ao Pilatus nesalo maeatino Yesus. ⁵³Pada nofosampue, maeatino Yesus nowaluanemo bhalatu mo'alusu maka nofondolee weo lia kafokobuhu'a neselindo ne kabhawono kontu. Kobuhu aitu miina'o sepali'a natipakea. ⁵⁴Oleo ana'a oleono Dhumaa,^a oleono Sabat noma'omo nahumato. ⁵⁵Hobhine'i poowa-owa'ano Yesus domai'ao we Galilea doangkafimo Yusuf. Kobuhu ana'a dowohae, bhe dowohae dua peda amai maeatino Yesus dofondolee we lalo. ^{56a}Hato dosuli defontaa-ntaamo sabhaha kagule bhe mina-mina kawondu so daminaki'ao maeatino Yesus.

Kawanu'ano Yesus

23:56b-24:12

Mat 28:1-10;

Mrk 16:1-8; Yoh 20:1-10

^{56b}Ne oleono Sabat dofewulemo doangkafi tubhono agamando.

24 Kane'o nohaha kamentae ne oleono Ahadhi, hobhine'i na'a dokalamo we kobuhu dewowo'o bhe kagule kakawondui-ndo mie mate toka nefontaa-ntaando. ²Dohato we kobuhu, gaha'a kontu kasongkono fointono kobuhu ingka notidolemo. ³Andoa dopesua weo lia kafokobuhu'a na'a, tamaka maeatino Yesus miina daohaea. ⁴Tangasano detongo-tongo'ao kadhadhia amaitu, tamba'omo nandoo mie dohodua deehe-ehe ne owando, pakeando nokosilo. ⁵Hobhine'i maitu dote'i sepali'a sampe dosudhu ampa we wite, tamaka mie hoduano maitu dopugau ambado, "Noafa gaha'a me'ondofi'ao'omu mie dumadi ne olotando mie mate?" ⁶Miinamo bhe Anoa ne ini, nowanumo mai'ao ne mate. Fe'ulai'eomu pugauno ne hintimiu we Galilea endefi'ini, ⁷ambano: Anano Manusia tabea-no daowae ne limando mie kodhosa maka dakumantai'e te sau

^a 23:54 Sakotu'uno: *oleono kaefotoka'a so oleono Sabat.*

salipu, bhe ne katolu oleono namanumo mai'ao ne mate.”⁸ Andoa lasao dofe'ulai pugauno Yesus na'a.

⁹Hato dosuli domai'ao we kobuhu, detula-tula'aomo kosa-sawi'ae kadhadhia amaitu ne koompulu seemiendo rasulu'i bhe sabhangka'indo sigao'ano. ¹⁰Hobhine'i andoa na'a ndo Maria Magdalena, Yohana bhe Maria inano Yakobus. Nandoo dua hobhine poowa'ando detula-tula dua ne rasulu'i. ¹¹Tamaka weo fekihindo rasulu'i, pugaundo hobhine'i maitu sanea tula-tula hewu, sampe miina damarasaead. ¹²Mahinggamo peda amaitu, Petrus noeh lasao notende se kobuhu. Nofeonga we lalo, gaha'a ta'o kawalu newohano. Pada aitu nosulimo. Nofeenamo totono lalono, “O ae bhahaa kumadhadhia'ano ini?”

Yesus nofotiwoha Wutono we kaangka'a humope'ano we Emaus
24:13-35

¹³Oleo aitu dua dohodua anaguhu'ino Yesus dokalamo we se'onu liwu konea'ano Emaus, kakodo'ono bhe Yerusalem nape-ompulu sekilo. ¹⁴Weo kala-kalando na'a detula-tula'aomo sabhaha kadhadhia mada'ano maitu. ¹⁵Tangasano detula-tula dopolo-poli'ao fekihindo, nomaimo wutono Yesus noma'otida maka nekala-kala nopoowa-owa bhe andoa. ¹⁶Andoa dowohae, tamaka nandoo bhe umontomino matando sampe miina damande'aane la'ae mie maitu. ¹⁷Yesus nofeenadamo ambano, “Metula-tula'ao'omu ae bhahaa we laano sala ini?” Andoa lasao dofetumpu, woha'ano ulando noguguhu sepali'a. ¹⁸Seemie konea'ano Kleopas notobhoosimo ambano, “Bhahaa seemie-miemu hintu ini mie humato we Yerusalem tapa mande'aono kadhadhia ha'oleo ini ne watu?” ¹⁹Ambano Yesus, “O ae bhahaa?” Dotobhoosimo ambado, “Kadhadhiano Yesus miendo Nasaret. Anoa seemie anabii, pugauno bhe habuno nokokuasa weo pomatano Lahata'ala bhe weo pomatano kosasawindo mie. ²⁰Tamaka neangka'indo imamumu bhe kamu-kamungkula'i mani doowae ne kaewa dobhotusiane mate maka dokantai'e te sau salipu! ²¹Gaha'aitumo endefi'ini taposahuna'ao anoamo so mobebasino miendo Israel, maka ampa aini tolu oleomo nopalusi sabhaha kadhadhia ana'a. ²²Pakade inia dofekatikenda kainsami hobhine'i sabhangka mani. Kane'o nohaha kamentae andoa dokala we kobuhu, ²³tamaka miina damohae maeatino. Dosuli deowamo dua bhihita, ambado dokopowoha'ao mala'ekati dopugau ne andoa putae Yesus suli nodadi. ²⁴Pada ana'a seemie hodua sabhangka mani

dokala we kobuhu maka nepo'awa'aondo nopobutu bhe pugaundo hobhine'i maitu. Tamaka wutono Yesus miina daohaea.”

²⁵Nopugaumo Yesus ambano, “Kabhohemiu gaha'a, kahenteno totono lalomiu, sampe miina marasaea'omu sabhaha nekosuaha'aondo ana-anabii! ²⁶Ingka Mesias Omputo Fosalamatino tetewei naenamisi kadeki kosasawi'ae maitu so namehapi'ao kakalabhiano.” ²⁷Pada peda maitu notalesaandamo tibuhino weo sabhaha Kitabi mulao'aono Wutono, notanda ne Kitabino Musa ampa ne Kitabindo ana-anabii sigao'ano.

²⁸Dohato we owano liwu kahope'ando, woha'ano Yesus nakumala kansuhu. ²⁹Tamaka andoa dofosuhue ambado, “Angkamo kadeki bhe insaodi sealo itu, ingka naohondomo; oleo noma'omo nasumoo.” Dadi'anomo nopesuamo weo lambudo nabutu ne itu. ³⁰Hato naomaa bhe andoa, Yesus nealamo roti, nobarakatie maka nobhebhehae bhe nodawuandae. ³¹Wakutuu aitu dua matando nosimentalea'amo lasao dopande'aane Anoa maitu Yesus, gaha'a lasao noila nomai'ao ne olotando. ³²Dopugaumo sapada andoa ambado, “Ingka uumbemo, totono lalonto notisangke sepali'a wakutuu nopugau bhe intaodi we laano sala nofotalesa'ao wambano Kitabi.” ³³Wakutuu ana'a dua lasao doehe maka dosuli we Yerusalem. Dohato dopo'awa'aomo rasulu'i ompulu seemieno tangasano dopohompu-hompu bhe sabhanga'i sigao'ano. ³⁴Ambado rasulu'i, “Nokotu'u mpuu Ompu nowanumo mai'ao ne mate! Padamo nofotiwoha Wutono ne Simon!” ³⁵Anaguhu hoduano sa'ituini lasao detula-tula'aomo dua kadhadhia we laano sala bhe katipande'ao'ano wakutuuno nebhebheha roti.

Yesus nofotiwoha Wutono ne kosasawindo anaguhu'ino

24:36-49

Yoh 20:19-23

³⁶Tangasano detula-tula'ao kadhadhia ana'a, Yesus tamba'omo neehe-ehe ne wunta-wuntando bhe nopugau ambano, “Katohopono dadi so hintimiu!” ³⁷Andoa dokohedu bhe dote'i, kuna'endomo dowoha kahanda. ³⁸Tamaka Yesus nopugau ambano, “Noafa kohedu'ao'omu? Noafa nopoibhaha'ao totono lalomiu? ³⁹Fe'ondoomu limaku bhe a'eku ini. Ingka Idimo inia, kadampa kanau'omu bhe ondo kanau'omu, kapa'amo kahanda miina nakombadhaa miina nakobukua peda newohamiu ne Idi ini.” ⁴⁰Poowa nopugau peda ana'a, Yesus nofotiwohaandamo limano bhe a'eno. ⁴¹Gaha'a andoa miina'o dua damarasaea hampano ka'iendo bhe mentendo. Yesus

nopugaumo dua ambano, “Nandoo bhahaa oti nehumaa ne ini?”⁴² Dadi'anomo dowanemo sedodo kaholeno kenta. ⁴³ Yesus noalae maka nohumaa'e ne wisendo.

⁴⁴ Ambano dua, “Pedamo ini patudhuno pugauku wakutuuno apobhaiangkoomu endefi'ini. Ingka afohatokoomu kosasawi'ae tibuhino weo Kitabino Musa, Kitabindo ana-anabii bhe Kitabino Laguno Daud tetewei nako'ula.” ⁴⁵ Pada ana'a Yesus nolengkamo fekihindo sampe dolosangiemo wambano Kitabi. ⁴⁶ Ambano toha, “Notibuhi peda ini: Mesias Omputo Fosalamatino tetewei naenamisi kakadee-dee bhe namanu mai'ao ne mate ne katolu oleono. ⁴⁷ Nandoo dua notibuhi: weo neano Omputo Fosalamatino daefolele bhihita ne sabhaha bansano liwu putae dametompa'ao dhosando maka Lahata'ala na'umamponida. Bhihita ana'a damolelele natumanda we Yerusalem. ⁴⁸ Hintimiumo sakusii so mefoleleno bhihitano kadhadhia aini. ⁴⁹ Mada kaowu o Idi amakatuangkoomu toka nedhandi'aono Amaku. Ampamo kaowu hintimiu tetewei meateomu weo kota ini sampe nakumabhintikoomu kuasa namai'ao te surugaa.”

Yesus notisangke te surugaa

24:50-53

Mrk 16:19-20; Tul 1:9-11

⁵⁰ Pada peda maitu Yesus nowowo'odamo we simbalino kota ampa te owano Betania. Hato ne itu nosangke limano maka nobarakatida. ⁵¹ Tangasano nobarakatida, Yesus nogaatidamo notisangke te surugaa. ⁵² Andoa dosudhu dotaohao sombado. Pada ana'a dosulimo we Yerusalem, kawulando maka lalondo. ⁵³ Andoa sadhia weo Lambuno Lahata'ala, dopudhi dofekakalabhia Lahata'ala.